

صوت العرب
و
المجلس القومي لحقوق الإنسان

يقدمان

المسلسل الإذاعي
أحلامنا

تأليف: سمير الجمل

إخراج: هاني فؤاد

(الحلقة الأولى)

(إننا مصنوعون من مادة الأحلام نفسها)

(وليام شكسبير)

(١)

(امرأة في الأربعينات «دلال».. تجرى في منزلها هربا من زوجها «فكري»
الذي يحاول الاعتداء عليها وهي تصرخ مستغيثة)

دلال: والنبي يا خويا.. آخر مرة أعمل كدة.. سماح يا فكري سماح..

فكري: (في عصبية وغيظ) أنا غلبت منك ومن أفعالك ومش عارف أعمل ايه
معاكى.. أقولك الحاجة تعملى عكسها.. ماشية معايا بالمقلوب.. انتى حد
مسلطك عليا.. ها؟!

دلال: توبة يا فكري.. ورحمة أبوك تبعد الحزام ده بيلسع.. أنا برضة حبيبتك وأم
عيالك.. (ثم فى مسكنه «توسل») ولا يعنى اكمنى وحدانية وماليش حد
يقف لك؟

فكري: (بنفاذ صبر) بس المسلسل ابتدا

(٢)

(فى شقة شوقي المخرج.. يرن المحمول
مستخدما فى ذلك اغنية اصالة ساحتك ساحتك)

عفاف: (زوجته وهى ممثلة) انت يا عم المسامح ما ترد على تليفونك الى كل يوم
بنغمة حسب الجو

شوقي: عفاف هانم ايه الحكاياه.. هى خناقه؟!

عفاف: يا سلام

شوقي: طيب ممكن ارد على التليفون بعد اذن سيادتك.. وبعدين ده عمر محمد
المؤلف استريحتى.. (يرد) ايوه يا عمر.. لا ابدا مش متعصب ولا حاجة..
ايه الاخبار عندك.. لا يا سيدى.. انا عايزك تفتح المسلسل بمشهد عن

العنف ضد المرأة وبعد كده ناخذ مشاكل الستات واحدة واحدة.. وانت عارف طبعا مشاكلهم ملهاش اول ولا اخر عفاف: (تشعر انه يرمى عليها بالكلام ترد بطريقتها)
: قوله أن كل مشكلة بتحصل للست لازم ولا بد وحتما وراها راجل!!

(٣)

(في مكتب عمر المؤلف وهو اعزب)

عمر: الشاى يا مخرج الروائع

شوقي: الظاهر كده والله اعلم عشان نعمل مسلسل واقعى لازم نبص على نفسنا

عمر: طيب انا راجل اعزب اجيب مشاكل مينين؟!

شوقي: من الستات اللى بتعرفهم يا روميو وبعدين بلاش نضيع وقت وتسمعى كتبت ايه؟

عمر: اظن احنا متفقين أن العنف ضد المرأة.. اول واهم ملف قدامنا..

شوقي: طيب ارجع بالذاكرة لورا وافتكرك كويس: هل كان المرحوم والدك يمارس العنف ضد امك!

عمر: واشمعى والدى ما تتكلم عن نفسك؟

شوقي: ماشى يا سيدى.. لكن انت المؤلف اللى هايكتب وضرورى تتكلم عن حاجة انت عايشها.. انا ابويا انفصل عن امى لانها كانت بتعتمد على اهلها فى كل صغيرة وكبيرة وده كان بيضايقه وهى مرتبطة بيهم بشكل مرضى.. وانفصلوا بدون عنف.. هو اتجوز واحدة تانية وكأنه ما صدق.. وهى قعدت عند اهلها واحنا معاها.. وبعدين اتجوزت هى كمان..

عمر: انا اسف يا شوقي

شوقي: اسف على ايه وبعدين احنا مش بنكتب مذكراتنا وقوللى بقى هنعالج موضوع العنف ازاي؟

عمر: العنف له اشكال ومستويات كثيرة يبدأ من النظرة والكلمة لغاية القتل!

(٤)

(في بيت دلال.. وعفاف جاريتها وزوجة شوقي تجلس معها)

دلال: لا يا عفاف سايق عليكى النبى.. اوعى جوزك ياخذحكائتى مع فكري ويعملها فى المسلسل ده تبقى فضيحة!!

عفاف: انتى عبيطة يا ست انتى.. وهو يعنى لو اخذها هيقول دلال مرات فكري مهندس الديكور وجارى

دلال: امال هيقول ايه؟

عفاف: يقول اللى يقوله.. ستات كتير وبنات غيرك بيتعرضوا للعنف والتحرش والتمييز والظلم وحاجات تانية كتير.. لكن ده باين عليه ايده ثقيلة قوى انتى عينك وارمة

دلال: (تحاول تخفيف الموقف) لكن بدمتك الزرقان اللى حوالين عينى مش مديها لمسة جمال!!

عفاف: لا.. دى لمسة استهبال.. وبصراحة انا عايزه اكتب طلب للمجلس القومى للمرأة عشان يسحبوا منك كارنيه الانوثة لانك مش طبيعية ابدًا.

دلال: يعنى اقف على الواحدة واخرب البيت

عفاف: لا سيبه يعمل لك عاهة مستديمة!!

(٥)

(عمر مع شوقي في جلسة عمل)

عمر: (يحكى) عندنا شخصية بهاء اللي اتخرج من كلية الطب وهو من اسرة على قد حالها ولكن طموحاته كانت كبيرة وهو مستعجل.. عشان كده رحب جدا انه يرتبط بفايزة بنت استاذة الدكتور الكبير رغم انها كانت مطلقة وتعليمها متوسط ومستهرته اعتمادا على فلوس ابوها

شوقي: وياه العنف في كدة ده جواز مصلحة ولكن تم بالتراضى ابوها عايز يتخلص منها وبهاء عايز الفلوس.. وهى عايزة راجل تستخبي وراه

عمر: ولكن بهاء غاوى يلعب بكل الاوراق ويكوش على كل حاجة ودايما يبحاول يفكرها انه احسن منها في تعليمه خصوصا بعدما اخذ الدكتوراه واصبح من مشاهير الاطباء

شوقي: يعنى العنف نفسى ومعنوى.. بس رد فعل فايزة هيكون ايه؟.. هو ده السؤال وهى دى الدراما!

(٦)

(دلال تقرا من كتاب عن المرأة الفرعونية في مصر القديمة بصوت مسموع)

دلال: وقال حكيم الدولة الفرعونية الحديثة من الاف السنين: أن كانت زوجتك كاملة مدبرة فلا تعاملها بخشونة وغلظة بل راقب اطوارها للتعرف على احوالها ولا تسرع معها في الغضب لثلا تزرع شجرة البغضاء في دارك فان كثير من الرجال يخربون بيوتهم بايديهم لجهلهم بحقوق المرأة.. (تردد معجبة) الله الله يا عم الحكيم الفرعونى ياريتنى كنت عايشه على ايامك

فكري: (وهو يقترب منها) ايه الكلام اللي كنت باسمعه ده؟

دلال: شوية ثقافة من ايام الست نفرتيتى عن حقوق المرأة

فكري: (ساخرا) حقوق المرأة ولا حقوق عين شمس؟

دلال: مقبولة منك.. بس اوعى تنسى انى ليسانس تاريخ

فكري: لكن اللى اعرفه أن سيادتك من يوم ما اتخرجتى محاولتيش تقرى اى

كتاب وبتقولى دايمًا الثقافة دمها ثقيل على قلبك

دلال: ورجعت حسبتهاعشان خاطر ولادى مش معقول اقول لهم يقرأوا.. وانا

ماليش علاقة بالكتب.. وكمان عشان اذاكر لهم

فكري: خلاص خلاص.. ولو أن الحكاية دى وراها الست الفنانة عفاف؟

دلال: لو كان ده صح.. المفروض تشكرها.. مش عايز تقطعنى منها.. وانا

ماعرفش حد فى العمارة غيرها.. وبعدين جوزها فتح لك باب رزق حلو

بشغلك معاه فى المسلسلات

فكري: لكن مش معنى كده تلعب فى دماغك؟

دلال: (بلغة هادئة) طيب سيبك من دماغى وقولى انا مقصرة معاك فى ايه مع انى

ماشية بما يرضى الله..

فكري: ايوه.. ايوه.. دخلنا فى سكة الست امينة فى فيلم بين القصرين

دلال: وماله يا سى السيد يا سندی وراجلى وابو عيالى

فكري: (فى غيظ ودهشة من اسلوبها الجديد) الحقنى يا عم نجيب محفوظ

(٧)

(رنة تليفون شوقي على اغنية انت مين قولى «ليلى مراد»)

(فى البيت مع عفاف)

عفاف: يا عينى على الرنات الاسبششال

شوقي: دى نورا يا عفاف المساعدة بتاعتى

عفاف: (تسخر منه) ما انا عارفه انها نورا.. دراعك اليمين ودراعك الشمال

شوقي: (يتجاهلها ويرد على التليفون ويبتعد بها قليلا) ايوه يا نورا انتى فىين؟..

مستشفى.. بتقولى مستشفى وحصل ازاى الكلام ده.. طيب اقفلى انا جايلك

حالا.. سلام

عفاف: مالها الست؟!

شوقي: فى المستشفى لانها عامله حادثه استريحتى.. واحد غبى.. شافها سايقه

عربيتها.. وكانت بتتكلم مع واحدة صاحبها فى الموبايل افتكر انها

بتضحك لسيادته

عفاف: عادى.. ماهو اغلب الرجاله كده وبعدين حصل إيه؟

شوقي: حب يزئق عليها بعربيته.. ولما حاولت تفاديه وتهرب منه خبظت فى عربية

تانية

عفاف: وايه يعنى.. مالك ملهوف عليها كده ليه.. هى لو فيها حاجة.. كانت

عرفت تطلبك.. يعنى لسة عايشه؟

شوقي: ما تبطلى تلميحاتك السخيفة.. دى زميلتى والمساعدة بتاعتى اللي ما

اعرفش اشتغل من غيرها.. والمفروض دى حاجات انتى تعرفيها اكثر من
اى حد تانى.. عن اذنك

عفاف: (باسلوب حازم وقاطع) مش هتنزل يا شوقي

شوقي: نعم يا اختى!؟

عفاف: ايوه مش هتنزل لو حدك لانى هاجى معاك!!!

(نهاية الحلقة)

(الحلقة الثانية)

(١)

(في المستشفى مع نورا)

عفاف: (بشكل مبالغ فيه) الف الف سلامة يا نورا.. قدر ولطف رجاله معقدين
بعيد عنك

شوقي: سلامات يا نورا.. انتى كويسة؟

نورا: كدمات بسيطة وهاخرج بكرة أن شاء الله

عفاف: واللى ينضرب فى قلبه عملتى ايه معاه؟

نورا: هرب طبعا.. الحمد لله انا كان ممكن رحى فيها لکن العربية اتبهذلت

عفاف: فداكى الف عربية.. ما هو شوقي هاخذك فى المسلسل الجديد ما
تحمليش هم

شوقي: (بينه وبين نفسه) وبعدين بقى فى الست دى!

عفاف: بتقول حاجة يا شوقي

شوقي: هاقول ايه.. الحمد لله على كل حال

(٢)

(المحمول یرن فى بیت عمر المؤلف)

عمر: (یرد) ایوه.. أهلا یا ست منال.. ایوه الخبر اللى فى الجرايد مطبوط واحنا

فعلا بنحضر للمسلسل.. لكن انا لسه باكتب.. جميل جداً لو عندك افكار
عن مشاكل المرأة.. آه طبعاً هنتكلم عن التحرش.. لا خلاص.. نتقابل
واسمع منك واللى فيه الخير يقدمه رينا باى باى (جرس الباب يرن)

عمر: ايوه يا مخرج.. يا ابو مواعيد مضروبة (يفتح له الباب)

شوقي: سلام يا عمور

عمر: مالك بوزك شبرين ليه؟

شوقي: عفاف يا سيدى.. مصممة تعمل مشكلة مع نورا وعايزه تطفشها بأى
طريقة عشان ما تشتغلش معايا

عمر: على فكرة بقى.. فيه حد بيزن على ودن عفاف

شوقي: وأنا مش ناوى افطر في نورا.. اديك بتشوف مفيش صغيرة ولا كبيرة إلا
وبتعمل حسابها.. وبعدين مؤدبة ومحترمة

عمر: كمل كمل.. وحلوة ومش متجوزة!!

شوقي: وأنا مالي بالأموال دي؟!

عمر: مراتك مهما كانت فنانة.. ست عارف يعنى ايه ست؟

شوقي: طيب سيبك من مراتى دلوقتى.. وخلينا في الستات بتوع المسلسل.

عمر: لسه منال قافلة معايا دلوقتى وبتقولى عندها شوية قصص واقعية جداً هتفنعنا
كثير في موضوعنا

شوقي: هى دخلت على الخط.. يبقى كملت!!

(٣)

(في بيت عفاف مع دلال)

دلال: قوليلي يا عفاف.. هو انا هند رستم ولا نادية لطفى وأنا مش واخده بالي؟

عفاف: اشمعنى!!

دلال: عشان كنت في السوق باشتري لوازم البيت.. وواحد من اياهم.. ساب الستات كلها.. وفضل فاطرنى وهات يا كلام.. أى خدمة يا جميل.. أنا كل يوم هنا.. الاستايل بتاعك عمله نادرة.

عفاف: (ضاحكة) وانتي كان ايه موقفك؟

دلال: ماشية زى لوح الخشب.. ولو أنه برضة كان فيه كام كلمة حلوين والأستاذ باشمهندس فكري مضبوط على موجة الكلام الدبش

عفاف: وحصل ايه؟

دلال: بقيت في نص هدومي.. لغاية ما دخلت محل المعلم محمود الجزار

عفاف: وطبعاً محدش في الشارع حاول يقول له خلى عندك دم

دلال: كأن الشارع مفيش فيه غير أنا وهو

عفاف: يا خسارة على الشهامة والمروءة

دلال: أمال لو أنا واحدة مدندشة ولا بسه حاجة مكشوفة كان عمل ايه؟

عفاف: بالمناسبة ماما اللي عندها ٦٥ كان حد بيعاكسها من كام يوم

دلال: يا واد يا تانت يا جامد

عفاف: جامد قوى.. لأنها فرجت عليه أمة لا إله إلا الله والناس اتلموا.. ومسكوه

وعملت له محضر في القسم.. ولما عرفت أنه طالب في الجامعة.. اتنازلت
عشان مستقبله

دلال: تفتكرى اللى بيحصل ده سببه ايه؟

(٤)

(في بيت عمر المؤلف مع نورا وشوقي)

نورا: انا جمعت شوية مادة واقعية عن التحرش.. عايزه مسلسل بحاله

شوقي: قولى عايزه مؤلف كويس يعرف يطلع منها حاجة!

عمر: أهو ده تحرش.. لكن معلش.. انتى كتبتى الكلام ده ولا سجلتية؟

نورا: الستات خافوا يقولوا اساميتها ورفضوا التسجيل.. وغيرهم رفض يتكلم في
الموضوع نهائياً

شوقي: ده أمر طبيعي.. عشان كده فكرت أن انتى اللى تدورى على المادة

عمر: خليها تحكى بقى يا مخرج.. وانا هاخذ نقط وراها واشتغل عليها

نورا: اولاً انا لاحظت أن أغلب موضوعات التحرش بيتم في المواصلات الزحة

شوقي: وفي الشارع خصوصاً المناطق الشعبية على النواصى والقهاوى

عمر: استنوا استنوا.. ده نقطة مهمة جداً ولازم نشتغل عليها.. لان المناطق

الشعبية طول عمرها.. عنوان الجدعنه والرجولة.. يعنى الشباب لا يمكن

يعاكس بنت منطقته

نورا: الكلام ده كان زمان يا استاذ!!

شوقي: ده اللى لازم نوضحه هو ايه اللى حصل لأولاد البلد.. وايه اللى غيرهم؟

والموضوع ده مسئولية مين؟ البيت ولا المدرسة ولا الجامعة ولا الجامع
ولا الشارع!!

(٥)

(في استديو تليفزيونى ولقاء مع عفاف)

صوت المخرج: ثرى تون.. هوا يا حضرات

المذيعة: وفي برنامجنا الأسبوعى (ست الكل) يسرنا أن نستضيف الفنانة عفاف
ابراهيم لكى تحدثنا عن مسلسلها الجديد الذى يتناول مشاكل وهموم
المرأة المصرية ومنها قضية التحرش.. أهلاً وسهلاً يا استاذة.

عفاف: أهلاً بكل مشاهدى البرنامج اللى باعتبره من أهم البرامج.. وسعيده انى
معاكم

المذيعة: قرينا أن المسلسل بيتتم تحضيره حالياً.. لكن ياترى البطولة هتكون من
نصيبك باعتبار المخرج جوز حضرتك

عفاف: أهو ده تحرش أنا أرفضه.. وبعدين أنا كنت فنانة معروفة قبل ارتباطى
بشوقى

المذيعة: مظبوط لكننا بنسمع أن حضرتك بيكون لك رأى فى الترشيحات
والأدوار

عفاف: هو انا حرام يبقى لى رأى زى أى حد بيشتغل فى المسلسل بالعكس شوقى
ساعات بيحيب زملا أو زميلات أنا بيكون لى رأى فيهم ومع ذلك.. كلامه
اللى ييمشى وده أمر طبيعى

المذيعة: وفي المسلسل ده اللى هو (احلامنا) فيه حد انتى مش راضيه عنه أو مش
مقتنعه بيه؟

عفاف: من غير لف ودوران ولا اجابه دبلوماسية ايوه فيه!!

المذبة: نقدر نعرفهم؟

عفاف: هاقولك بعد البرنامج!!

المذبة: لكن الكلام ده ممكن يزعل الاستاذ شوقي

عفاف: يبقى مكانش فيه داعى للسؤال من أصله!!

المذبة: واضح انه هيكون مسلسل من نار

(٦)

(في بيت عمر نورا وشوقي)

شوقي: ها يا نورا كملى كلام الست دى عن التحرش يطلع منه شغل ما حصلش!

نورا: انا اسفه مش هاقدر أكمل

عمر: اقعدى يا نورا.. ايه اللى جرى لك بعد المكالمة اللى جت لك من شوية

نورا: لما الأستاذ شوقي هيرجع البيت هيعرف؟

شوقي: بيت ايه وغيط ايه.. هو لعب عيال.. ما تفهمينا ايه اللى قلب كيانك كده؟

نورا: الاستاذة عفاف كان عندها لقاء تليفزيونى على الهوا وجابت سيرتى بشكل

غير مباشر

شوقي: سيرتك انتى بالذات!!

نورا: لما سألوها أن كانت بتتدخل فى شغلك ولا لا؟

وبعدين الكلام الناس كلها سمعته والحمد لله انه كان مباشر وإلا كان عمل لك

مشكلة كبيرة معاها

شوقي: يبقى أنا اللى لازم أمشى دلوقتى حالاً

عمر: والشغل.. انا خلاص المسلسل كله بقى فى دماغى

شوقي: كملوا انت ونورا

عمر: يا شوقي صلى على النبى واهدا.. انت ممكن تروح تعمل مشكلة معاها؟

شوقي: عارف.. ومش مشكلة واحدة.. أهى فرصة اخلص القديم والجديد عن اذنكم

نورا: يا استاذ شوقي أنا اسفه اللى قلت لك.. وبعدين انا سامحتها لانها ما قلتش اسمى بشكل صريح

شوقي: انتى اتنازلى عن حقل زى ما انتى عايزه.. لكن انا لا.. والف لا (يمشى غاضباً)

(٧)

(بيت شوقي.. عفاف تقرأ القرآن الكريم فى تأثر واضح)

عفاف: أعود بالله من الشيطان الرجيم.. بسم الله الرحمن الرحيم ﴿يَأْتِيهَا النَّاسُ آتِفُوا رَبِّكُمْ الَّذِي خَلَقَكُمْ مِنْ نَفْسٍ وَجِدَةٍ وَخَلَقَ مِنْهَا زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً وَاتَّقُوا اللَّهَ الَّذِي تَسَاءَلُونَ بِهِ وَالْأَرْحَامَ إِنَّ اللَّهَ كَانَ عَلَيْكُمْ رَقِيبًا ﴿١﴾﴾ [النساء].

شوقي: صدق الله العظيم

عفاف: صدق الله العظيم.. انت جيت من امتى يا شوقي؟

شوقي: من أول اتقوا ربكم

عفاف: شكلك مش طبيعى واسلوبك مش طبيعى!!

شوقي: واللى حضرتك قولتبه فى التليفزيون هو اللى طبيعى!؟

(نهاية الحلقة)

(الحلقة الثالثة)

(١)

(في مطبخ فكري وقد سقط منه براد الشاي الساخن فوق يده ويصرخ من الألم)

فكري: آه يا ايدي.. الميه المغليه حرقتنى.. آه يا ايدي

دلال: (وقد جاءت على صوت صراخه) فكري ايه مالك يا فكري؟

فكري: هاتى معجون الاسنان من الحمام بسرعة يقولوا بيمنع التهابات الحروق.. بسرعة يا ست

دلال: انا مش فاهمه ايه اللي جابك عند البراد والبوتاجاز!!

فكري: سمعت صوت جاي من عند شوقي باين عليه كان بيتخانق مع مراته
ماعرفش ليه؟

دلال: ورينى ايدك!

فكري: انتى بتكسرى البيضه ليه.. انا مش عايز او مليت

دلال: بلاش رغى.. صفار البيض بيهدى الحروق امى الله يرحمها كانت بتقولى كده!

فكري: بالراحه ايدي ملهلبه

دلال: عشان تحرم تتصنت على الناس!!

فكري: انا كنت باتظمن أن فيه ناس غيرنا بتخانق!

(٢)

(في سيارة شوقي على الطريق في شارع مزدحم يأتي

صوت راديو السيارة أغنية نانسي عجرم يابنات يابنات)

شوقي: (يقلب محطات مختلفة بين مباراة وأغنية أخرى وجزء من تمثيلية مناسبة

لجوا المسلسل حتى يصل إلى قارئ نشرة الاخبار)

قارئ النشرة: والخبر الأخير في هذه النشرة.. احالت محكمة الجنيات أوراق

المتهم «سلومة ابو المكارم» إلى فضيلة المفتي بعد اتهامه بإغتصاب طفلة

في العاشرة من عمرها ثم قتلها.. هنا القاهرة

(موبايل شوقي يرن بأغنية عبد الحليم حافظ اسبقنى يا قلبى اسبقنى على الجنة

الحلوة اسبقنى)

شوقي: (يرد في قرف) ايوه يا عمر.. باين على صوتى إن مزاجى زفت.. لما اجيلك

هاشرح لك؟

شوقي: يا عمر ما ينفعش الكلام في التليفون وانا سايق احسن ما البس في حد

قدامى.. اقل بقى سلام

(٣)

(في بيت عفاف مع دلال)

دلال: لا اله الا الله اتحسدتوا ولا ايه؟.. وبعدين طول عمرى باقول عليكى عاقله

وياحاول اتعلم منك.. جرى ايه؟

عفاف: بصراحة يا دلال انا بافكر اطلب الطلاق

دلال: طلاق.. اعوذ بالله هى حصلت!

عفاف: الست لماتحس أن الرجل اللي بتحبه بيعاملها على انها درجة تانية وهو درجة اولى تبقى كارثة.. وشوقي كل مسلسل يشتغله مع البنت اللي اسمها نورا يبقى حاله مقلوب ومش طبعى

دلال: والكلام اللي قولتیه فى التليفزيون على الملاء.. كان شوية..

عفاف: المفروض الكلام ده يبسطه مش يزعله

دلال: يا سلام لما تقولى راسى برأسه ده يبسطه!

عفاف: لو هو حقانى .. لكن للأسف زيه زى أغلب الرجالة.. الست بالنسبة لهم جارية مهما كان.. علمها ومكانتها

دلال: ولما ربنا سبحانه وتعالى بيقول قوامون على النساء

عفاف: كملى.. بما فضلنا بعضهم على بعض.. لكن لو كانت فى نفس مستواه أن لم يكن احسن وبعدين انتى ناسيه أن القران الكريم فيه سورة النساء ومفيش سورة الرجال والنبي عليه الصلاة والسلام قال له امك ثم امك ثم امك وبعدين ابوك

دلال: لا يا اختى انا هاقوم قبل ما تلعبى فى دماغى وانا مصدقت فكري بقى كويس معايا اليومين دول

عفاف: محدش مضيع الدنيا غير نوعية الستات اللي زيك يا مرات المحروق

دلال: وعرفتى منين!!

عفاف: شفته فى الأسانسير.. لكن معقول الشاى يعمل فيه كل ده!!

دلال: أصله كان شاى ثقيل!

(٤)

(في بيت عمر مع شوقي)

عمر: شوف يا سيدى احنا هنعمل مقدمة المسلسل عبارة عن تركيبة روحانية جميلة من أول سورة النساء عشان معنى المساواة مش بس بين الرجل والست لكن بين الناس كلهم الى أصلهم واحد من ادم وحواء وبعد كده ندخل على آيه بديعة من الانجيل الاصحاح رقم ٣١

شوقي: بتقول ايه؟

عمر: إمراة فاضلة.. من يجدها؟ لان ثمنها يفوق اللآلى بها يثق قلب زوجها فلا يحتاج إلى غنيمة.. تصنع له خيرا لا اشرا كل أيام حياتها

شوقي: بس الآية ممكن بعض الناس يفسروها على أن الست الغالية الفاضلة عملة نادرة ومش موجودة!

عمر: نقول لهم لما يبقى الرجل من ذهب يبقى يدور على ست لؤلؤة

شوقي: كل ده فى مقدمة المسلسل؟

عمر: ما انت هتعمل صورة تأكد المعنى اللي عايزين نقوله

شوقي: (فى عصبية واضحة) ما تيجى سيادتك تخرج المسلسل وتريحنا

عمر: ايه يا شوقي اللهجة التى بتكلمنى بيها دى.. انا داخل انام عن اذنك (بيتعد)

شوقي: معلش يا عمر انا اسف.. لان اعصابى تعبانة وانا حكيت لك

عمر: يبقى انت اللي محتاج تنام؟

شوقي: انا فعلا محتاج ارتاح شوية.. لكن حاول تطلب نورا ممكن تكون فتحت تليفونها

عمر: نورا مش عايزة تشتغل في المسلسل وبصراحه طلبت منى ابلك
شوقي: (في ضيق بالغ) وبعدين بقى في لعب العيال ده هو انا ناقصها!!

(٥)

(في مكتب أسماء عكاشة منتجة المسلسل مع نورا)

أسماء: غلطانه يا نورا في اللي عمليته

نورا: مش عايزة اكون سبب في مشكلة بين شوقي وعفاف

أسماء: انا منتجة المسلسل وخلص مضيت معاكى وابتديتى تشتغلى وجمعتى مادة
المفروض المؤلف هو اللي يجمعها

نورا: انا عملت كده من حبي وحماس للموضوع

أسماء: احنا بنعمل مسلسل عن مشاكل المرأة.. ووجودك ضرورى لمصلحة
الشغل.. وبعدين افرضى انى طاوعتك.. ونفذنا اوامر الست عفاف..
وبعدين زعلت أو غضبت من حد تانى.. يبقى مش هنخلص

نورا: انا محتارة!

أسماء: بدل ما تحتارى.. كلمى شوقي وانزلى اقعدى معاهم هما عايزينك ضرورى
في جلسات التحضير ما عندناش وقت..

نورا: طيب فيه نقطة انا قلقانه منها بخصوص المسلسل

أسماء: نقطة ايه؟

نورا: خايفه واحنا بنعمل مسلسل عن مشاكل المرأة.. نلاقى نفسنا حطينا الرجاله
كلهم في قفص الإتهام

أسماء: الكلام ده تقوله للمؤلف والمخرج والممثلين اللى هيشتركوا فى العمل
ياعتبارهم رجالة!

(٦)

(اصوات اكواب يتم تكسيرها واشياء تتحطم وما إلى ذلك)

شوقي: انتى بقيتى انسانة لا تطاق.. وشغل مخبر الدرك أنا زهقت منه ولازم يبقى
له حد

عفاف: انت جاي تهددنى يا استاذ شوقي.. اكيد الست سلطتك علىّ وانت فلبك
حين

شوقي: عفاف انتى كده بتخرجينى عن شعورى؟

عفاف: ما تخرج زى ما أنت عايز.. أنا مش بتهدد بالاسلوب ده.. وبعدين يا استاذ
يا محترم ازاي الناس تصدقك وانت بتتكلم عن العنف ضد المرأة وجاي
تعمله هنا ضدى

شوقي: يعنى مفيش فايده فيكى؟

عفاف: ايوه مفيش فايده.. ايه مش من حقى ادافع عن جوزى وبيتى؟

شوقي: ليه جوزك ده لعبه ولا صباع روج تخطفه واحده من الثانية

عفاف: اسمع يا شوقي.. انا سبق وقلت لك.. يا أنا يا نورا فى المسلسل!؟

شوقي: بقى هى الحكاية كده؟

عفاف: ايوه كده وعليك تختار!!

شوقي: طيب ايه رأيك انا اخترت ومش هارجع عن اختياري

(٧)

(في مكتب أسماء المنتجة)

أسماء: اشرب العصير يا استاذ واهدى عشان تعرف تكلمنى كويس

شوقي: انا هادى قوى يا أسماء وده اخر كلام عندى

أسماء: انت كمخرج من حقك تختار ابطالك.. لكن عفاف مهما كان مراتك
والصحافة لو شمت خبير بالمشكلة دى.. هتبقى فضيحة

شوقي: ليه هى حياتى الخاصة مالها بالشغل؟

أسماء: فى المسلسل ده.. الوضع مختلف.. يعنى ازاي تحذر الناس من التمييز ضد
المرأة.. وانت بتمارسه؟

شوقي: دى ممثله.. ونورا مساعد مخرج.. وده حتى أشغل فى جو مريح..
وعفاف بتحاول تعملى كارت ارهاب لانها مرات المخرج.. وايه التمييز فى
كده؟

أسماء: (ضاحكة) بتمارس العنف ضد مراتك وتمنعها من الشغل فى عمل انت
مستول عنه فنيا

شوقي: (يقاطعها) كملى يا أسماء كملى وانتي مستوله عنه إنتاجياً

أسماء: لكن عفاف ممثله كويسه واسم له وزنه ووجودها مهم فى المسلسل!

شوقي: يبقى اعتبرينى من دلوقتى معذرتى عن المسلسل!

(نهاية الحلقة)

(الحلقة الرابعة)

(في بيت فكري مع زوجته دلال)

دلال: (باكية متوسلة) يا فكري الله يخليك سييني أسافر.. وهارجع صدرد.. بلدنا مش بعيدة

فكري: بعيدة ولا قريبة أنتى مالك بواحدة زى البنت اللى بقت فضيحتها بجلاجل فى الجرايد والقنوات

دلال: دى بنت خالى!!

فكري: أنعم وأكرم.. ده بدل ما تتبرى منها والجرايد بتقول أن البنت دى مش مظبوطة..

دلال: حرام عليك.. أنت عندك ولايا.. مش كفاية انها بين الحياة والموت بعد الوحوش ما أعتدوا عليها فى الميكروياص وهى راجعه من شغلها واتأخرت غضب عنها

فكري: اسمعى أنا مش عايزك تجيبى سيرتها قدام العيال ودارى على العار احسن لك

دلال: دى واحدة مخطوبة ومحترمة ومعها بكالوريوس هندسة

فكري: يا فرحتى.. بكره خطيبتها يسيبها بعد اللى حصل معاها

دلال: ده لو كان مخه على قده!

فكري: قصدك ايه؟

دلال: قصدى ما ينفعش نحاكم الضحية ونسيب الجانى والمجرم

فكري: انتى كلمتى حد فى بلدكم دى.. اللى محدش بيعبرك منها!

دلال: الدنيا تلاهى!!

فكري: خلاص اتلهى انتى كمان.. عايزه تجرى وعيالك فى ايدك عشان يشوفوا

رحلة المجد على الطبيعة.. بلا خيبة.. وبعدين انتى اللى هتروحي تصلحى

اللى جرى؟

دلال: لا.. هاقولها ربك يمهل ولا يهمل!!

فكري: نعم!!

دلال: ايه عندك اعتراض على حكم ربنا؟!؟

(٢)

(خطوات عمر يقترب من مكتب أسماء يطرق الباب)

أسماء: (من الداخل) اتفضل يا استاذ عمر (يدخل)

عمر: سلامو عليكم

أسماء: وعليكم السلام اتفضل استريح

عمر: معلش اتأخرت شوية.. لان الطريق كان مقفول

أسماء: حصل حادثه لا سمح الله

عمر: هى كده.. لكن حادثه من نوع مختلف وكان لازم اقف واشوفها هتوصل

لفين؟

أسماء: لازم حاجة تخص المسلسل بتاعنا

عمر: مذبوظ.. فيه واحدة ماشية فى حالها وشاب متهور ضايقتها.. لأنها كانت بتتكلم فى التليفون وبتضحك.. والباشا افتركر انها بتلاغيه.. وراح يترازل عليها وحبث توريه مركزه الناس انقسموا نصين.. نص معاها ونص ضدها لأنها كان لازم تسمع وتسكت.. وطبعاً بين النصين كان فيه كام واحد.. معاهم معاهم عليهم عليهم

أسماء: يظهر اننا مش هنلاحق على القصص الواقعية فى المسلسل؟

عمر: الا بالمناسبة هو لسه مشروع المسلسل على قيد الحياة.. ولا اتنسف؟

أسماء: انا مش اول مرة اشتغل مع شوقي وأظن أنت عارف صاحبك كويس

عمر: لكن هو لسه زعلان مع عفاف.. ده حتى قاعد عندى

أسماء: مفيش مشكلة!

عمر: ازاي؟

أسماء: أنا هاعرف احل المشكلة مع عفاف بطريقتى!!

عمر: وشوقي؟ هنعمل معاها ايه!

أسماء: هابعت له العقد والعربون

عمر: مع مدير الإنتاج؟! هيعتبرها إهانة

أسماء: يبقى خلاص.. حضر لنا عشوة كويسة عندك فى البيت وأنا هاجى بنفسى

وبالمرّة نشوف الشغل ماشى ازاي؟

(٣)

(فى بيت عفاف مع دلّال)

دلّال: (تبكى فى حرقة)

عفاف: خلاص بقى يا دلال.. بطلى عياط..

دلال: حتى انتى يا عفاف مش مستحيلة انى افش غلبى شوية فى العياط

عفاف: بقى لك ساعة بتعيطى.. انتى بتجيبى الدموع دى كلها منين.. ايه مركبه
فنتاس فى عينك

دلال: بدمتك البنت اللى اغتصبها الوحوش مش صعبانه عليكى؟

عفاف: من ساعة ما عرفت الحكاية دى وانا اعصابى محروقة ولو طللت واحد
منهم هاكله باسنانى!

دلال: يعنى كان عندى حق اسافر اشوف البنت

عفاف: هى صحيح عندها ٣٥ سنة وآنسه؟!

دلال: ايوه و زى القمر.. ويدوب لسه مخطوبه من شهرين

عفاف: شفت صورتها ومكائش لازم ينشروها.. يعنى موت وخراب ديار مش
كفاية حكايتها اللى على كل لسان

دلال: لكن اللى برد نارى شوية موقف خطيها اللى طلع راجل بصحيح وقرر
يكتب كتابه عليها بعد اسبوع

عفاف: والكلام ده مكتوب فى الجرايد؟!

دلال: الكلام ده عرفته من البلد.. انا كلمتهم

عفاف: والاساذ فكري سابلك تتكلمى

دلال: لا طبعاً اتكلمت من وراه

عفاف: على فكرة انه يمنعك عن زيارة اهلك أو انك تكلميهم.. ده برضه اسمه

عنف زى اللى عمله شوقي معايا.. بس الفرق بينى وبينك انى باعرف اخذ
حقى

دلال: وهتشتغلى فى المسلسل على كده؟

عفاف: بكره تشوفى!!

(٤)

(فى بيت عمر.. على مائدة الطعام)

عمر: يلا يا جماعة بسم الله مدوا ايديكم قبل الكباب ما بيرد

أسماء: يا استاذ عمر انت مستعجل على ايه.. ولا عايزنا ناكل ونمشى!

عمر: تمشى ازاي يا استاذه.. ما تقول حاجه يا سى شوقي؟

شوقي: أسماء احرجتنى لما جت لغاية هنا.. لكن أنا بصراحة جعان جداً ومش
قادر أقاوم الكفتة والكياب

أسماء: ما تستنوا يا جماعة خمس دقائق بس

شوقي: انتى عماله تبصى فى الساعة.. هو انتى مستنيه حد؟

أسماء: يعنى (متردده)

شوقي: بس.. بس.. فهمت.. عن اذنكم

عمر: قايم رايح فين يا جدع انت؟

شوقي: (بيتعد قليلاً) هامشى

أسماء: استاذ شوقي ممكن تسمعنى دقيقة واحدة..

شوقي: انتى مستنية عفاف مش كده؟

أسماء: ايوه فيها حاجة لما نصفى الجو على موقف هايف مش مستاهل الزعل ابدأ

شوقي: المشكلة أن عفاف مش حاسه انها غلطانه

أسماء: طيب ممكن اسألك سؤال وتجاوبنى بصراحة؟

شوقي: اتفضل

أسماء: انت عرفت غلطك ولا هى بس اللي غلطت

شوقي: هو انا اللي حاطط مناخيرى فى شغلها؟!

أسماء: واحدة بتحبك وبتغير عليك

شوقي: الكلام ده فى البيت مش فى الشغل

أسماء: انا عايزه اقولك أن موافقتها على انها تيجى وهى عارفه انك هنا معناه اعتذار

بس بطريقه شيك خليك جدع بقى وأعمل نفسك مش واخذ بالك لما

تلاقيها اتخضت من وجودك.. انت بتاع دراما يا استاذ

(٥)

فكري: (غاضباً) ايه الأكل ده يا ست دلال؟

دلال: وماله نعمة ربنا.. هو لازم كل يوم طبيخ وخضار ولحمة!

فكري: نعم يا أختى.. ما أنتى عارفه لازم اتغدى زى الناس

دلال: وهى اللحمه المحمره والبطاطس البورية والسلطة الخضرا مش أكل بتاع

ناس

فكري: فين الرز ابو شعرية؟

دلال: هاقوم أعمل لك رز

فكري: ماقدرش استنى... انا جعان

دلال: ابقى اتعشى بيه

فكري: باحب انام خفيف

دلال: وبعدين بقى!

فكري: طبعاً.. حضرتك مش فاضية لجوزك وعيالك

دلال: الله يسامحك

فكري: يا برودك

دلال: (فى فى غيظ وقد فاض بها) ايه يا فكري كفاية لغاية كده.. وبعدين انت ما

تعرفش انا ممكن أعمل ايه؟

فكري: (مستهتراً) هتعملى ايه يا نوسه؟

دلال: حاجه بسيطه.. اسمع يا سيدى

فكري: ايه الورق ده شكوى للأمم المتحدة؟

دلال: بتقول فيها ده كلام الأمم المتحدة عن العنف ضد النساء اللي هو احنا يعنى

فكري: منك لله يا عفاف.. انتى وشوقى

دلال: اسمع يا فكري.. اى اعتداء ضد المرأة مبنى على اساس انها انثى ويتسبب

لها فى ألم جسدى أو نفسى ويشمل ذلك التهديد أو الضغوط أو الحرمان

من الحريات العامة والخاصة.. حتى لو كان هذا العنف من داخل اسرتها

أو خارجها فهو ممنوع ويجب مكافحته ويعتبر يوم ٢٥ نوفمبر يوم عالمى

للقضاء على العنف ضد النساء

فكري: هو النهاردة كام؟

دلال: ٢٥ نوفمبر

فكري: حلوقوى.. اتصلى بالأمين العام للأمم المتحدة وخليه يجى هنا حالاً!

(٦)

(في الاستوديو)

عفاف تؤدى مشهداً تمثيلاً لإمرأة فرعونية تنصح ابنها)

عفاف: يا ولدى.. العاقل من لا يسلك طريق الحياة بمفرده بل يختار له شريكة

تعاونه على أعباء الأيام فى رحلة العمر

شوقي: (صارخاً فى غضب) استوب.. مش هو ده اللى انا عايزه يا مدام عفاف..

هنعيده تانى

عفاف: دى رابع مرة.. اعيده

شوقي: مش مشكلتى

عفاف: طيب خلى الأخت نورا تيجى تعلمنى ازاي أمثل!!

(نهاية الحلقة)

(الحلقة الخامسة)

(أسماء في الاستوديو تريد أن تنفرد بشوقي لإنقاذ الموقف)

أسماء: استاذ شوقي إذا سمحت عايزاك دقيقة واحدة

شوقي: بعد المشهد اللي باعمله

أسماء: معلهش يتأجل نصف ساعة لغاية الدنيا ما تهدي علشان تعرف تشتغل

شوقي: انا هادى جداً

أسماء: أنت هادى.. لكن فيه غيرك متوتر.. وده مش حلو علشان الشغل

عفاف: (تدخل في الحديث في نبرة تحدى) استاذة أسماء انا مش متوترة ولا حاجة.. بس الاستاذ شوقي لازم يفصل بين مراته والفنانة المعروفة اللي بتشتغل معاه

شوقي: الاستاذ شوقي اللي حضرتك بتكلمى عليه مخرج العمل ومن حقه يوجه الممثل وياخد منه اللي هو عايزه

عفاف: بدمتك انت مقتنع بالكلام اللي بتقوله؟.. ازاي يا استاذ بتعمل مسلسل عن الظلم اللي بتعرض له الست.. وانت نفسك ظالم!!

شوقي: لغاية كده واستوب (ثم يصيح في الاستوديو للجميع) يا جماعة.. الشغل النهاردة انتهى.. وفرکش

(ثم موجه الكلام إلى عفاف) روى ذاكرى دورك يا فنانة يا معروفه.. وابقى تعالى بكره جاهزه!! (فاصل)

(٢)

(عمر المؤلف يقرأ على شوقي)

عمر: ووثيقة الأمم المتحدة وهي بتشرح يعنى ايه العنف المنزلى أو داخل الأسرة بتقول انه سلوك يمارسه الشخص للسيطرة على الست واشكال العنف ده.. الشائم والتحقير ومنعها من الحصول على عمل أو الحفاظ عليه والأذى الجسدى سواء بالفعل أو التهديد.. ده حتى التخويف بند من بنود العنف

شوقي: باقولك ايه يا عمر.. وفر الكلام ده فى النص اللي بتكتبه

عمر: نص ايه بقى.. انت شكلك عايز تنسف المشروع كله.. وتضيع مجهودنا

شوقي: كلكم عارفين أن هي دى طريقتى فى الشغل.. لازم أستفز الممثل عشان أخذ منه أحسن حاجة

عمر: تستفز آه.. لكن تهينه لا

شوقي: وما حدش فيكم أخذ باله.. الست عفاف كانت بتتعامل معايا ازاي دى كأنها قاصدة تهز صورتى قدام الكاست.. اشتغل معاهام ازاي.. واسيطر على الاستوديو بأى وش.. وأنا مش قادر اسيطر على الست مراتى!

عمر: فى الاستوديو هي مش مراتك!

شوقي: حلوقوى.. وأنا فى الاستوديو المخرج.. والكلمة كلمتى (يرن جرس تليفون شوقي وقد جعل رنة الموبايل أغنية نجاة «ايظن»)

عمر: ما ترد على التليفون يا عم الظنان انت

شوقي: دى أسماء

عمر: بس يبقى كملت

شوقي: (يرد فى هدوء) ايوه يا استاذة أسماء؟.. اجتماع فى مكتبك.. طيب او كيه..

بس فيه استفسار صغير.. ده اجتماع بين المنتج والمخرج.. ولا فيه حد تانى هيحضره؟!

(٣)

(خطوات كعب عفاف في مكتب الاستاذ حسونه المحامى)

حسونه: (مرحبا) اهلاً بالنجمة.. خطوة عزيزة

عفاف: آسف، يا استاذ حسونه جيت لك من غير ميعاد

حسونه: انتى بتقولى ايه يا فنانه.. هو فيه مواعيد بين نجمه زيك والمحامى بتاعها

عفاف: ممكن تطلب لى قهوة سادة

حسونه: يا ساتر يا رب سادة.. ده مؤشر يخوف

عفاف: بدون مقدمات انا هادخل فى الموضوع

حسونه: طيب أطلب لك القهوة (يكلم احدهم فى تليفون داخلى) هات قهوة سادة

من البن بتاعى يا عم عز

حسونه: (موجهاً كلامه لعفاف) خير يا استاذه؟

عفاف: لا مش خير ابدأ

حسونه: تحت أمرك

عفاف: عايز ارفع قضية ممكن تبقى الاولى من نوعها فى مصر.. وتكون حديث

الناس كلها

حسونه: ضد مين؟

عفاف: ضد شوقي شريف

حسونه: جوزك

عفاف: لا بصفته مخرج المسلسل اللى أنا باشتغل فيه؟

حسونه: يعنى ايه؟.. مش فاهم؟

عفاف: يعن الاستاذ خلانى نكته فى الاستوديو وأحنا بنصور بطريقة اهانت كرامتى

حسونه: ولو انه كلام غير منطقى.. لكن دى شكوى مكانها النقابة لانها مشكلة مهنية

عفاف: وهو انا مش عارفه كده يا استاذ حسونه.. أنا عايزه قضية عايزه جنحة سب وقذف وتشهير

حسونه: ولما ارفع القضية دى.. ها تقدرنا تستمروا مع بعض ازاى فى البيت!

عفاف: مش مهم.. سمعتى يا استاذ حسونه.. سمعتى

حسونه: طيب ممكن أعرف ايه اللى حصل بالتفصيل؟

عفاف: قوى.. قوى.. اسمع يا سيدى

(٤)

(فى مكتب أسماء)

شوقي: (غاضباً ثائراً) انا قلت لك يا أسماء.. عفاف هتعمل الف مشكلة فى

المسلسل.. معايا ومع غيرى وادى النتيجة.. اشربى

أسماء: انت ليه مش عايز تعرف انك غلطت فى حقها وأهنتها قدام الزملا فى الاستوديو

شوقي: يا استاذة انتى بتدافعى عن زميلتك وأنا بادافع عن شغلى.. اللى لا يمكن

يستمر بالطريقة دى.. انا باشوفها بيركبنى عفريت

أسماء: دي مراتك !!

شوقي: ما أنا عارف انها مراتى.. بس الكلام ده فى البيت اللى أنا هربت منه بسبب

غيرتها العميا

أسماء: على العموم تقدر تأجل مشاهد عفاف لغاية ما الجو يهدى بينكم
شوقي: للأسف.. ما أقدرش أهد الديكور اللي هي اساس فيه.. (يسألها مندهشاً)
هو انتي مش خايفة على فلوسك ولا ايه؟

أسماء: طيب صور المشاهد اللي هي مش موجودة فيها.. انت استاذ يا استاذ (يرن
تليفون أسماء) لحظة ارد على التليفون يا شوقي.. عن اذنك هارجع لك
(تبتعد عنه لكي تكلم عفاف هامسة)

أسماء: انتي فين يا سبب تعذيبي.. (مندهشة) محامي ايه (تصرخ فيها) انتي اكيد
اتجنتي رسمي (ثم تعود إلى الصوت الهامس).. لا.. لا.. شوقي عندي
ومش هاعرف اكلمك.. اسبقيني على البيت باين عليكى مش هتجيبها
البر.. باى دلوقتي (تنهى المكالمة)

أسماء: انا أسفه يا شوقي

شوقي: (بذكاء) عفاف اللي كانت بتكلمك مش كده؟

أسماء: (مترددة خشية أن يكون قد سمع شيئاً) عادى يا شوقي عادى.. ما احنا
بتكلم ميت مرة فى اليوم

شوقي: (يتنهد فى ضيق) ممكن أقولك حاجة؟

أسماء: اتفضل

شوقي: أنا بافكر بجد اتفصل عنها واريح نفسى واريحها!

(٥)

(عمر مع نورا مساعدة المخرج يقلب اوراقاً فى يده)

عمر: برافو يا نورا برافو.. ورق مهم جداً.. وثيقة اتفاقية القضاء على جميع اشكال
التمييز ضد المرأة وتوصيات منتدى الحوار العربى لدعم حقوق المرأة فى
العالم العربى وأفريقيا

نورا: لكن تفتكر ممكن يتحول لمشاهد درامية (تتحدث بأسلوب فيه احباط)

عمر: أمال أنا باقولك برافو على ايه؟

(ثم يسألها) انت مالك محيطه كده ليه؟

نورا: يعنى عاجبك الجو الكئيب اللي احنا فيه؟

عمر: على فكرة أسماء وعدتنى تصالح شوقي وعفاف

نورا: على الله ولو انى شايفه كل واحد متحفز للتانى وده بيخلي الاستوديو كله

متوتر

عمر: فين الورق اللي معاكى؟

نورا: اتفضل

عمر: (يقلب الورق ويقرأ بصوت مسموع) مكانة المرأة والمفهوم الصحيح

لحقوقها فى الأديان السماوية والتفسيرات الخاطئة لبعض التعاليم الدينية

والعادات والتقاليد السلبية والأفكار النمطية التى تحقق التمييز ضد

المرأة.. والنقطة الأخيرة (يتوقف قليلا)

نورا: كنت عارفه أن النقطة الثالثة دى مش هتعدى معاك بسهولة لأنها خاصة

بالصورة السلبية اللي بنقدمها للمرأة فى الأفلام والمسلسلات يعنى شغلنا

عمر: بالعكس احنا اول ناس لازم ننتقد عيوبنا ولا على دماغنا ريشه؟

نورا: وزمايلنا فى الوسط الفنى لوزعلوا

عمر: اللي يزعل من الحق.. يشرب من أى بحر يعجبه

نورا: أن كان كده اتشجع واسألك عن شخصية انت عاملها فى المسلسل وانا

شايفه انها تقريبا مدام عفاف.. ولا أنا غلطانه؟

عمر: ما بلاش يا بنت الناس الحكاية دى تيجى منك انت بالذات.. هى مولعة

لوحدها؟

نورا: مفيش حد معنا.. وفرصة أسألك

عمر: انا اللي عايز أسألك.. عملتى ايه فى الزيارة اللي طلبت منك نعملها لجمعية
(نساء بلا أجنحة) بتاعة شئون الأرامل والمطلقات

نورا: كلمت المديرية.. وقالت أن أغلب الستات مش هيوافقوا يتكلموا.. بس
محلولة..

عمر: ازاي؟

نورا: هتقدمنى على انى أخصائية اجتماعية وأنا اسجل لك الحكايات

(صوت خبط بطريقة مزعجة على الباب والى جانب ذلك يضغط على
الجرس بشكل مريب)

عمر: هى ايه الحكاية.

نورا: يكون شوقي؟

عمر: معاه مفتاح.. هاروح اشوف مين (يمشى ناحية الباب ويفتحه فيجد عفاف
امامه على غير ميعاد)

عمر: عفاف!!

نهاية الحلقة

(الحلقة السادسة)

(١)

(صوت شيخ يأتي من من تليفزيون بيت دلال وفكري)

صوت الشيخ: (في برنامجه الديني) ﴿ وَاللَّهُ جَعَلَ لَكُمْ مِنْ أَنْفُسِكُمْ أَزْوَاجًا وَجَعَلَ لَكُمْ مِنْ أَزْوَاجِكُمْ بَيْنَ وَحَفْدَةً وَرَزَقَكُمْ مِنَ الطَّيِّبَاتِ ﴾ صدق الله العظيم.. ولهذا يرتقى الاسلام بالزواج إلى مرتبة العبادة وفي حديث المصطفى صلى الله عليه وسلم يقول: من أراد أن يلقى الله طاهراً مطهراً فليتزوج الحرائر وفي الحديث أيضاً أربعاً من أعطيهن فقد أعطى خير الدنيا والآخرة.. قلب شاكر ولسان ذاكرويدن على البلاء صابر وزوجة لا تبغيه حوباً في نفسها وماله.. والحب هو الاثم واما البدن الصابر على البلاء فهو القوي الذي يستطيع أن يؤدي الواجبات ولا يكل ولا يهزم والمقصود بذلك أن بحشك عن الأثني الكريمة يقتضى منك أن تكون رجلاً بحق

فكري: (يأتي من غرفة داخلية إلى الصلاة حيث يوجد التليفزيون) انتى يا ست ماتوطى التليفزيون ده مش عارف أنا (يخفض الصوت تماماً)

دلال: ايه يا فكري.. أنا واقفه فى المطبخ وعايز اسمع طفيته ليه؟

فكري: خلاص يعنى.. العلم واخذ حقه معاكى قوى

دلال: انا مش فاهمه ايه اللي مزعلك فى كده؟

فكري: لازم تراعى مشاعر الراجل اللي شقيان وعايز يرتاح فى بيته

دلال: ويعنى أنا اللي قاعده على الكورنيش.. تعالى يا خوبا أقف فى المطبخ وورينا
الهمة

فكري: الله الله.. دى حركة تمرد بقى.. معقول هى دى دلال الهاديه الطيبة

دلال: وهو ده فكري الى لما جه يطلبنى.. عمل لى الدنيا احلام والوان

فكري: الاكل جهز ولا لسه.. يا ستنا رابعة العدوية

دلال: عشر دقائق بس.. يا استاذ محمود المليجى!!

فكري: (بينه وبين نفسه) هى اتعلمت اللماضه دى كلها امتى منك الله يا عفاف يا
بنت حوا وأدم

(٢)

(فى بيت عمر.. مع نورالتي كانت متواجده)

عفاف: أنا أسفه يا أستاذ عمر.. انى جيت من غير ميعاد.. ايه يا استاذ نور..
ساكته ليه؟

نورا: مطلوب منى أقول ايه.. أنا استأذن أحسن!

عفاف: ما قلت أسفه.. وخلصنا (فى عصبية)

عمر: هتشربنى ايه يا عفاف؟

نورا: هى مش جايه تشرب يا أستاذ عمر.. هى جايه تظبطنا متلبسين انا والاستاذ

شوقي الى مش موجود.. ولا جايه يكون مستخبي.. ما تقومى يا ست

عفاف تدورى فى الشقة.. هو انتى مش معاكى حق الضبطية القضائية

عفاف: انتى مش كنتى عايزة تمشى اتفضلى.. عشان عايزه اتكلم مع الاستاذ عمر

نورا: صاحب البيت هو اللي يقول الكلام ده!! مش انتى!

عفاف: والله كبيرنا وبقي لنا صوت يا استاذة نورا.. طبعاً يا بخت من كان البيه

المخرج زى الخاتم فى صباعه

عمر: استاذة عفاف: مش كده ما يصحش

عفاف: ماشى يا استاذ عمر.. ممكن نتكلم لوحدنا

عمر: اتفضلى فى البلكونه

نورا: أنا هامشى يا استاذ عمر.. نكمل الشغل بعدين وعلى فكرة يا ست عفاف انا

كنت ناوية انسحب من المسلسل واعتذر عنه.. لكن بعميلك دى.. أنا

هاكمل ولغاية آخر مشهد سلام (تبتعد وتغلق الباب خلفها)

عفاف: شايف يا عمر.. مش دى اللى كنت باشجعها وأقول غلبانه ولازم نديها

فرصة.. شفت

عمر: يا مدام عفاف.. انت مش فاكهه قلتى لها ايه؟

عفاف: ماشى.. يا عمر ماشى

عمر: طيب خيلنا فى موضوعك

عفاف: عارف أنا جايه منين دلوقتى حالاً؟

عمر: وهاعرف منين؟

عفاف: من عند المحامى بتاعى

عمر: (منزعجاً) هى حصلت يا مدام.. رايحه تطلبى الخلع؟

عفاف: لا.. رايحه أرفع قضية سب وقذف على المخرج المحترم!!

(٣)

(في الاستوديو أثناء التصوير)

شوقي: يلا يا نورا.. اعملى بروفه معايا قبل ما نصور

نورا: (متسائله) هاعمل دور المحامية بتاعت الزوج؟

شوقي: وفيها ايه.. ما هو التعديل اللي خليت المؤلف عمله.. أن الزوجة راحت للمحامى بتاعها.. والزوج طبعى يروح لمحاميه ودى اشارة حلوه.. الراجل تدافع عنه ست والعكس صحيح وأظن دى حاجة موجودة وعادية

نورا: (متردده) طيب.. طيب

شوقي: (يهمس اليها) لا انت مش مركزه معايا خالص.. هو الاستاذ عمر زعلك فى حاجة وانتي عنده؟

نورا: لا ابدأ.. مفيش مفيش.. خيلنا فى البروفة.. المحامى بيقول للزوجه: يا هانم القانون بي فرض لك الحماية ومساواة والفقرة (ج) من المادة الاولى لإتفاقية القضاء على جميع اشكال التمييز ضد المرأة اللي بدأ تطبيقها فى ٣ سبتمبر ١٩٨١ بموجب قرار الجمعية العامة للأمم المتحدة بتقول: ويجب ضمان الحماية الفعالة للمرأة عن طريق المحاكم ذات الإختصاص.

والمؤسسات العامة الأخرى.. يعنى من حقها تقاضيه لو شافت انه ظالم وحقها معاه مهضوم أو تطاول عليها جسدياً أو نفسياً أو مادياً أو معنوياً

شوقي: الإضاءة تجهز المشهد هنا.. والاكسسوار يظبط الورق اللي فى مكتب المحامية (ثم إلى نورا) تعالى بقى حضرتك وقوليلى بالتفصيل عفاف عملت معاكى ايه؟

نورا: عفاف!!.. وانا مالى ومالها

شوقي: عمر كلمنى فى التليفون وقالى انها راحت عنده وكالعادة هلفطت فى الكلام
معاكى

نورا: ده كلام عادى وبعدين خلاص أنا أعودت عليها بدليل انى جيت على
الاستوديو وبدأت الشغل

شوقي: وعرفتى أنها عايزه ترفع عليا قضية؟

نورا: هى حصلت؟

شوقي: (يعطى تعليماته لأحد عمال الإضاءة) خد اللبنة دى يمين شوية يا
بارومه .. ونجهز بسرعه يا حضرات

نورا: مش لما الممثلة اللى هتعمل المشهد تيجى

شوقي: ما هى الممثلة واقفه قدامى أمى .. بس يلزمها تحفظ لان الحوار طويل
شويه ..

(٤)

(فى الشارع عفاف تقود سيارتها بسرعه واضحة ومعها عمر)

عمر: بالراحه يا مدام .. الشارع زحمة وانتى ماشيه بسرعه زياده عن اللزوم

عفاف: مش عايزه البيه المخرج يمسك عليا غلطة .. الميعاد خمسة يبقى خمسة

عمر: خلى بالك انتى اللى دقيتى طبول الحرب

عفاف: والله زمان يا سلاحى

عمر: بالمناسبة ممكن أسألك سؤال بحق العيش والملح والزمانة

عفاف: قوى قوى

عمر: هو انتى رغم شغلك ومشغلك عندك طاقة زيادة مش عارفه تعمل بيها ايه؟
عفاف: وليه ما تقولشى انى ست كرامتها فوق كل شىء وماتحبش تسبب حقها
أبدأ!!

عمر: وهتتعامل مع شوقى ازاى بعد حكاية القضية دى!
عفاف: فنانه لها شغل مع مخرج دمه ثقيل.. وهو يعنى كل ممثله أو ممثل بيكون
دايب فى غرامه زمايله كلهم
عمر: أنا قصدى على التعامل فى البيت
عفاف: ما شكلها كده.. مفيش بيت!

(٥)

(فى بيت فكري مع دلال.. وشوقى على الطعام)

دلال: أن شاء الله يكون الأكل عجبك يا استاذ شوقى
شوقى: تسلم ايديكى يا ست دلال.. على العزومة اللى لا كانت على البال ولا
الخاطر

فكري: كأنك بتتهمنى بالبخل يا سى شوقى

شوقى: العفو يا هندسه.. بس أنا حاسس أن وراها حاجة

فكري: المسقعة؟

شوقى: لا العشوة كلها

دلال: (باندفاع) ايوه يا استاذ شوقى احنا جيران وأصحاب واللى بيحصل بينك
وبين الست عفاف كتير قوى.. ومش ممكن نقف نتفرج

فكري: اهدى يا دلال.. اهدى

دلال: اهدا ايه.. دى وصلت للمحاكم

شوقي: انا اللي وصلتها ولا الست؟

فكري: انت جالك ورق رسمى؟

شوقي: لا

فكري: يبقى خلاص.. وفيه ناس عايزه تصطاد فى الميه العكره

شوقي: المحامى كلمنى يا فكري وهى راحت له

دلال: مش يمكن رايحه لمصلحه تانيه

شوقي: يعنى هتروح عند المحامى عشان تفصل فستان دى طلبت منه يرفع قضية

ضدى قال ايه أهنتها فى الاستوديو

فكري: بصراحه يا شوقي انت زودتها معاها.. انا كنت فى الاستوديو وشايف

وسامع كل حاجه

شوقي: لو كل مخرج قال للممثله عيذى المشهد أو شاورها على ملحوظة.. تبقى

مصيبة وترفع قضية.. ونروح نمثل فى المحاكم أحسن

دلال: مش جايز بتتدلع عليك ونفسها تكلمها وتتصالحوا.. عفاف بتحبك يا استاذ

شوقي: لو كان الحب وراه الصداق ده كله.. يبقى يفتح الله.. بلاش منه نهائى..

وبعدين أنتى طبيعى تدافعى عن صاحبتك

دلال: ما تقول حاجة يا فكري.. ساكت ليه؟

بصراحة: أنا كنت ناوى أعزم مدام عفاف وأعمل لك مفاجأة.. ونصفى الجو

شوقي: كنت هتخسرني يا فكري.. لاني ما أحبش المفاجأت اللي من النوع ده!!

دلال: (متردده متوتره) بس بعد اذنك يا أستاذ شوقي أنا يعنى.. أنا

شوقي: أنتى ايه؟!!

دلال: عزمت عفاف.. بس هي اتأخرت في السكة وزمانها على وصول!!

(نهاية الحلقة)

(الحلقة السابعة)

(جرس تليفون دلال المحمول.. تسرع اليه وتأخذه بعيداً ثم ترد هامسة)

دلال: ابوه يا عفاف انتى فين؟... يعنى مش هتقدرى تيجى (تقولها بعفوية) طيب الحمد لله.. لا مش قصدى.. باقول الحمد لله أن انتى كويسه.. (ثم فى براءة) ما هو بصراحة شوقى لما عرف انك جاية زرجن واتعصب وفكري زعق لى هو راخر.. وانا والنبي كان قصدى خير.. عفاف اوعى تزعلى يا عفاف.. لكن قوللى انتى فين؟!

(٢)

(فى المسجد.. الامام ينهى الصلاة ويسلم.. وعمر بين المصلين)

عمر: السلام عليكم ورحمة الله وبركاته.. السلام عليكم ورحمة الله (بينه وبين نفسه) استغفر الله العظيم واتوب اليه.. اللهم اعنى على ذكرك وشكرك وحسن عبادتك والصلاة والسلام على رسول الله صلى الله عليه وسلم

(فترة صمت يتجه خلالها إلى شيخ المسجد ويقرب منه)

عمر: السلام عليكم ورحمة الله يا مولانا

الشيخ: اهلاً يا أختى

عمر: انا اسمى عمر محمد وباشتغل مؤلف وحالياً باكتب مسلسل اسمه (احلامنا) وهدفنا إن احنا نورى الناس المشاكل اللى بتقابلهم فى حياتهم عشان تكون أجمل وأفضل لكن تركيزنا على مشاكل النساء بصفة خاصة

الشيخ: احنا محتاجين الأعمال اللى زى دى يا أخى.. مفيش مانع تقدم تسليه بريئه وموعظة حسنة.. باسلوب من بتاعكم.. الحدوته أو الحكاية مدخل مهم جداً للمعرفة والقصاص فى القرآن الكريم أكثر من ثلثى الكتاب.. ده طبعاً بخلاف سورة كاملة للنساء

عمر: انا باصلى مع حضرتك كتير وعارف أن رأيك مستنير.. عشان كده جيت أسألك واسترشد بعلمك

الشيخ: ربنا افتح بيننا وبين قومنا بالحق وانت خير الفاتحين اتفضل يا حضرة المؤلف

عمر: عايز افهم يا شيخنا ايه المفهوم الصحيح لقوامة الرجل على المرأة؟

الشيخ: أولاً لازم نعرف أن اللى بيحكم بين المرأة والرجل هو الله.. ولما ربنا سبحانه وتعالى يقول هن لباس لكم وانتم لباس لهن.. يعنى فيه تعادل ومساواة.. لكن القوامة بحكم الأعباء وتوزيع المسئوليات.. ولما المصطفى صلى الله عليه وسلم يقول أمك ثم أمك ثم أمك.. ده تكريم لست.. ومن حق الزوجة اذا الرجل مارس القوامة بظلم انها ترده وتراجعه وقوامة الرجل المادية فيها حفظ لحقوق المرأة المادية فهو مسئول عن نفقة البيت.. ومالها لها ولا يمكن اجبارها على الإنفاق فى البيت الا برضاها.. اظن كده القوامة مسئولية اكثر منها ميزه.. يعنى الرجل فى البيت ببساطة يحكم ولا يملك.. والمرأة تملك ولا تحكم

عمر: الله يا مولانا.. وحكاية ضربها؟

الشيخ: وهو الضرب بالسواك أو بمنديل يسمى ضرباً يا راجل يا طيب.. والنبي عليه الصلاة والسلام بيقول استوصوا بالنساء خيراً فإنهن عوان عندكم ليس تملكون منهن شيئاً غير ذلك. يعنى مش عبيد ولا خادמות ولهن مثل الذى

عليهن بالمعروف.. (ضاحكاً) لكن قولى يا استاذ عمر.. هو حضرتك متجاوز من امتى؟

عمر: الحقيقة يا شيخ انا لسه عازب

الشيخ: وايه اللي آخرك كده؟

عمر: بصراحة اللي بشوفه من اصحابى المتجوزين؟

الشيخ: أهو ده الغلط بعينه.. كل بيت وله حكاية وكل نفس ولها طبع.. وفيه ناس عايزه تلاقى من اللي معاها كل خير.. وهى ماعندهاشى والعياذ بالله الا الشر.. وبعدين صدق اللي قال لما احكم على غيرى بانه شيطان لازم اكون انا من الملائكة!

(٣)

(فى بيت عفاف.. دلال تبكى بحرقة)

عفاف: بطل عياط يا دلال عايزه أفهم ايه الحكاية منك أنا قدامى نص ساعة وانزل دلال: هاقولك يا اختى.. اصله موضوع يقطع القلب.. وانتى اكيد بتعرفى صحفيين فى الجرايد.. وناس من بتوع برامج التليفزيون عفاف: وده يخليكى تعيطى بالشكل ده

دلال: انتى فاهمه غلط.. انا مش عايزه افصح فكري لا.. أنا عايزه أعمل شكوى فى واحد قريبي.. يعتبر ابن عم امى.. الراجل المخبول عشان الفلوس جوز بنته اللي عندها ١٢ سنة واحد غنى عنده ٦٥ سنة.. والراجل اتعامل معها بطريقة بعيد عنك عملت لها نزيف والبنت المسكينة بين الحياة والموت

عفاف: وأمها فين؟

دلال: أمها ميتة.. وابوها كان عايز يزيحها من سكنه عشان ياخذ الفلوس يتجوز بها.. ده غير كده صاحب مزاج يعنى حشاش.. بيتهألى ده موضوع انساني بصرف النظر عن انها قريبتى أو بلدياتى

عفاف: أنا معاكى.. بس هاتى تليفون حد قريب وعنوان بلدكم.. وفوق كده هناخد القصة واخلى عمر المؤلف يحطها فى المسلسل اللى بنعمله

دلال: انا من ساعة ما عرفت الموضوع ده.. وأنا برج من نافوحتى هيطير.. هو ايه اللى حصل للناس لطفلك وعفوك يا رب

عفاف: وجوزك عرف الحكاية دى؟

دلال: انا با كلم قرابى فى البلد من وراه.. هو قاطعنى منهم نهائى.. وممنوع حد يجى يزورنى.. عشان كده.. با جيلك واستغيث بيكى فى الصغيره والكبيره

عفاف: (ضاحكاً) الا قوليلى يا دلال انتى اتعلمتى فى أى مدارس؟

دلال: مدارس الحكومة... ليه!!

عفاف: طيب عارفه هنادى بتاعة دعاء الكروان؟!

دلال: فاتن حمامة ايوه.. ايوه أنا شففته يجى عشرين مرة

عفاف: فضلت مسكينه ومكسوره.. بس كان لازم تتغير وتدافع عن نفسها

دلال: يعنى أعمل ايه؟

عفاف: لا انتى ما تعمليش.. كفاية اللى بيعمله فكري وأمثاله

(٤)

(فى مكتب أسماء المنتج مع عمر المؤلف)

أسماء: أنا آسفه يا أستاذ عمر.. صحيتك من النوم وانا عارفه انك شغال طول

الليل.. وأسفه مره ثانية لانى عايزه استأذنك فى موضوع مهم للمسلسل
بتاعنا انت قريت الجرايد النهارده وامبارح حوالين البنت الصغيرة اللى
جالها نزيف بسبب جوازها من واحد متوحش قد جدها

عمر: لا.. شفت تقرير عنه فى برنامج تليفزيونى من بتوع التوك شو أصلهم بيحبوا
النوعية دى جداً

أسماء: طيب بص على الصورة دى

عمر: بنت جميله هى دى صاحبة المشكلة؟

أسماء: لا.. دى اللى ممكن تمثل الدور

عمر: أنا شفتها فى مسلسل (ممنوع اللمس) فعلاً موهوبه وده يستفزنى ويخلينى
انحت لها الدور بطريقة فيها عمق لانها بتعرف تقول

أسماء: وعلى فكرة لو عايز معلومات اكثر عن القصة دى.. تسأل الباشمهندس
فكري مهندس الديكور.. لان البنت من بلد مراته

عمر: (ضاحكاً بشكل واضح ومبالغ فيه)

أسماء: ايه مالك بتضحك ليه؟

عمر: اول ما جيتى سيرة فكري ومراته.. دول هما الاتنين حدوته انا واخدها فى
المسلسل لكن بطريقة ثانية لكن انتى عرفتى منين انها قريبة فكري؟

أسماء: من عفاف.. وهى عرفت من دلال مرات فكري ما هى صحبتها

عمر: يظهر احنا فى نهاية المطاف هانكتشف اننا حاولنا نكتب عن مشاكل المرأة..
كتبنا عن نفسنا وعن حكاياتنا.. لان قصة كل ست وبنت ضرورى فيها
راجل!

(٥)

(مشهد يتم تمثيله خلال المسلسل تقف فيه نورا)

تؤدي دور أم الفتاة الصغيرة التي تم تزويجها لرجل مثل جدّها)

نورا: (بلغة فلاحى) يا حضرة القاضى.. انا أم البنت المسكينة ام الطفله.. الى بقت مدام قبل الاوان.. البنت يا حبة عين امها.. لا هى لعبت وجريت زى العيال اللى فى سنّها.. ولا هى فرحت بنفسها وهى عروسة لانها ما تعرفش يعنى ايه جواز.. انا كمان يا حضرة القاضى.. اتجوزت وانا ماعرفش.. بس اللى حصل زمان.. حرام يتكرر دلوقت.. ابوها باعها برخص التراب عشان كيفه.. حاكموه.. وحاكموا ابو عين زايفه ومال سايب مش عارفين هو جايه مين.. اللى دفع فيها القرشين عايز يرجع شبابه اللى راح من سنين على حساب بنت بريئة وخضرا.. وحاكمونى انا كمان عشان كنت بالعه لسانى.. والمرحومة امى كانت تقولى.. اللى يدوسوا على رجله وما يقولش جاي.. يستاهل يدوسوا عليه كله.. وانا داسوا على عمري وكرروها مع بنتى.. (هسات فى قاعة المحكمة)

القاضى: سكوت.. اتفضلى كملى يا ست

نورا: الكلام خالص يا حضرة القاضى.. انا اتقتلت مرتين.. واحده وانا فى سن بنتى.. والثانية بعد اللى جرى معاها مين يجيب لنا حقنا.. مين.. مين!

شوقى: برافويا نورا.. استوب.. هايل

(فى ركن آخر فى الاستوديو)

عفاف: (تهمس إلى عمر المؤلف) باقولك ايه يا عمر؟

عمر: تحت امرك

عفاف: هي نورا بقت بطلة المسلسل ولا ايه؟

عمر: وايه المانع نستعين بيها.. هي دارسة وفاهمة.. وزى ما انتى شايفه مستوى الاداء عامل ازاي

عفاف: لا صحيح.. انا بصراحة كنت حاسة انى باتفرج على شادية فى المرأة المجهولة (بلغة ساخرة)

عمر: الحقيقة مش عارف أقولك ايه!

عفاف: تقولى انك عمال تزود فى دورها بمناسبة وبدون مناسبة

عفاف: (متسائلة) عايزة أفهم هى البنت السهتانه دى فيها مغناطيس بتخليك انت والمخرج مش عارفين تراضوها ازاي!

عمر: وبعدين يا عفاف كده زيادة

عفاف: زعلان قوى عشانها

عمر: لا.. زعلان على اسلوبك (صارخاً فى غضب)

شوقي: (يصيح فى المقابل بأعلى صوته) امنع الصوت هناك.. واللى ملوش شغل فى الاستوديو يا ريت يستنا فى الاستراحة.. ومش هاكررها تانى!!

(نهاية الحلقة)

(الحلقة الثامنة)

(ركن فى الأستوديو أثناء تصوير المسلسل التليفزيونى)

عمر: مدام عفاف.. تحبى اراجع معاكى المشهد الجديد اللى كتبته مخصوص
عشانك

عفاف: مشهد جديد.. (مندهشة) والاساذ المخرج مكانش عنده اعتراض؟

عمر: ويعترض ليه اذا كنا بنحاول نعمل شغل أحسن

عفاف: (ضاحكاً) طبعا مين هيدافع عنه غيرك

عمر: عايزين نهدي الجو.. والصلح خير

عفاف: ايه زهقت من صاحبك ما هى فرصة يا أختى.. محلها عيشة الحرية.. مش
كده ولا ايه؟

عمر:: انتى فاهمه أن احنا مراهقين ولا ايه يا مدام!

عفاف: واللى بيتجوز للمرة الثالثة وهو عنده سبعين سنة يبقى مراهق؟

عمر: والله كل واحد أدرى بظروفه.. وخلينا فى الشغل بقى عشان تلحقى تحفظى
المشهد

عفاف: احكى لى المشهد واشرح لى الجو بتاعه

عمر: هى واحده جوزها كل مرة يتعامل معاها بالعنف.. وبعدين يرجع يعتذر..
وكانت بتسامح عشان الحياة تمشى.. ولانها خايفه على بيتها وعيالها..
لكن آخر مرة كسر دراعها وأخذ فلوسها بالعافية.. وكالعادة حب يعتذر..

ويتوسل .. والمرة دي رفضت وردت عليه وقالت

عفاف: أسفه.. لا يمكن اقبل اعتذارك تانى

عمر: (يتقمص دور الزوج) فلوسك هارجعها

عفاف: ودراعى اللى كسرتة

عمر: دراعى أهه.. اكسريه

عفاف: وتفتكر أنا ممكن أعمل كده؟

عمر: عايز ارضيكي.. عايز اقولك العفو والسماح

عفاف: بصراحة.. ثقتى فيك اتهزت

عمر: يعنى عايزه تنهى عشرة العمر.. وتهدمى البيت؟

عفاف: وعمايلك هى اللى كانت بتعمر البيت.. وتبنيه؟

عمر: أنا غلطان.. واديني باعتذر

عفاف: وصادق فى كلامك؟

عمر: ميه فى الميه واحلف لك

عفاف: من غير حلفان.. لو كنت فعلاً حاسس بالندم ومش ناوى تعمل كده

تانى.. تجمع سكان العمارة كلهم وزى ما بهدلتنى قدامهم.. تعذرلى

قدامهم

عمر: ايه.. عايزه تفضحيني وتذلينى؟

عفاف: هو ده شرطى الوحيد.. قلت ايه؟

عمر: يفتح الله يا ست.. وبعدين البيوت اسرار

عفاف: ولما صوتك بيحبب آخر الدنيا.. بتكون أسرار؟

عمر: قلت لك آسف.. ومش عاجبك اخبطى دماغك فى أى حيطه!!

عمر: (وقد عاد إلى شخصيته الحقيقية) برافو يا مدام مستوى اداء هايل ومن اول بروفه

عفاف: ابقى قول الكلام ده للاستاذ مخرج.. اللى كان عايز يطردهنا من الاستوديو (تقلده) اللى ملوش شغل يخرج يا حضرات!!

عمر: هو مش قصده عليكى

عفاف: تانى هتدافع عنه

شوقي: (يقترب) لا.. أنا يا مدام اللى جاى اداغ عن نفسى!!

(٢)

(فى بيت دلال تتكلم تليفونياً مع جاره لها فى نفس العمارة)

دلال: يا ست فاتن اسمعنى.. أنا طلبتك على التليفون الأرضى.. عشان أعرف أخذ وادى معاكى.. براحتنا.. (تمس اليها) انا فكرت اننا نعمل جمعية سرية من ستات العمارة ننور ببعض ونساعد بعض ازاى ندور على حقوقنا وناخذها.. ثورة ايه.. هو اللى يطالب بحقه يبقى عايز يعمل ثورة.. يعنى ايه عايزه تفهمينى أن انتى وجوزك عصفورين فى قفص.. مفيش خناقه.. مفيش مشكلة.. مفيش حد بيتقمص من التانى.. هو أنا باحسدك.. انا باسألك.. طيب يا أختى روحى شوفى الرز اللى هيتحرق (تضع السماعة) ستات عايزه الحرق.. لا وبيقولوا عليا أنا خوافه.. هى مفيش غيرها عفاف اللى هتقف معايا فى الفكرة دى.. وبالعند فيهم هاخليها هى رئيسة الجمعية.. بلاش أنا

(٣)

(جرس تليفونك عفاف.. في غرفة المكياج)

عفاف: (تصيح في المساعدة التي تعمل معها أو الليسه) يا أم أحمد.. سييك من التليفون وأعمليه سايلنت أنا مش فاضية لست دلال دلوقتي.. كفاية عليا السيشوار اللي عمال ياكل في دماغى.. هاتيلي قهوة مطبوط يا أم أحمد

أم أحمد: حاضر يا ست عفاف

أسماء: (تدخل إلى غرفة المكياج) خليهم اتنين قهوة يا أم أحمد.. واحدة مطبوط..
والتانية على الريحه

عفاف: أهلا يا أسماء.. فينك؟

أسماء: موضوع المسلسل عاجب محطات كثير وربنا يسهل

عفاف: لا.. ولسه.. لما موضوع القضية يتعرف.. هتلاقى المسلسل ده يتباع
باسعار خرافيه.. وابقى افكريني

أسماء: انتى لسه مصممه على حكاية القضية؟

عفاف: شوقي فاهم انى كنت باعمل عليه فيلم زى ما بيقلوا

أسماء: يا عفاف اعقلى بقى

عفاف: مش عايزه المسلسل يفرقع!؟

أسماء: ما هو ممكن يفرقع ويظير وشك.. انتى بتلعبى بالنار وبعدين أنا سمعت من
عمر.. أنه اتكلم معاكى كويس من شويه.. يعنى عايز يفتح سكه

عفاف: دى مناورة يا حبيبتى.. أسأليني أنا

أسماء: (مندهشاً) مناورة ليه ومن ايه؟

عفاف: لما لقانى صاحيه ومفئجله عينى على الى بينه وبين نورا.. ابتدا يهدى اللعب.. وقال ايه عايزين يضحكوا على عقلى ويفهمونى.. أن عمر بينه وبين نورا حاجه!

أسماء: يخرّب بيتك.. جبّتى ده كله منين؟

عفاف: امال ايه.. انا مش نايمه على ودانى

أسماء: افهم من كده انك لسه فى حالة حرب؟

عفاف: وجاهزه بالمدفعية وطيارات اف ١٦

أسماء: اف منك يا فظيعة!

(٤)

(مكان على النيل.. شوقي يقرأ من اشعار نزار قباني)

شوقي: اقدم اعتذارى.. لوجهك الحزين.. مثل شمس النهار عن الكتابات التى كتبتها.. عن الحماقات التى ارتكبتها.. عن كل ما احدثه.. فى نفسك النقية من دمار.. وكل ما اثرته حولك من غبار.. اقدم اعتذارى.. عن كل ما كتبت من قصائد شريرة فى لحظة انهيارى.. فالشعريا صديقتى منفاى واحتضارى.. طهارتى وعارى.. ولا اريد مطلقاً أن توصمى بعارى.. من أجل هذا.. جئت يا صديقتى.. اقدم اعتذارى

نورا: (وقد ادهشها اسلوبه فى الأداء) روعه يا استاذ روعه

شوقي: أنا ولا نزار قباني العبقري؟

نورا: انتوا الاتنين

شوقي: تعرفي القصيدة دي لما قررتها على النت من كام يوم لعبت في دماغى بشكل غريب وجنتنى

نورا: هتاخدها في المسلسل

شوقي: ولها مكانها الدرامى المظبوط

نورا: وعمر.. عرف بيها؟

شوقي: هايعرف.. هو احنا هنكتب حاجة من وراه.. وبعدين القصيدة هى اللى خلتنى أفكر نيحى نتعشى هنا على النيل.. بيتهيألى كده محدش يعرف يقول كلام بسيط ويديع زى نزار

نورا: استاذ شوقي

شوقي: ايه جعتى نطلب الأكل

نورا: لا.. عايزه انتهب الفرصه ومزاجك رايق.. وأقولك حاجة

شوقي: ما تقولى ساكته ليه

نورا: انت لازم تتصالح مع مدام عفاف وكفاية كده

شوقي: (في عصبية) على فكرة بقى يا استاذة نورا.. احنا جايبين هنا نستريح من الشغل فى الاستوديو طول النهار.. ونحضر للشغل بتاع بكره

نورا: تقصد ايه!

شوقي: أقصد انا مش جاى هنا عشان أحب!

نورا: (وقد شعرت بالاهانه) عن اذنك أنا لازم أمشى لانى اتأخرت

شوقي: براحتك

نورا: (تاخذ شنطتها وتبتعد)

(عمر وقد وصل .. يستغرب الموقف عندما يجد نورا تمشي)

عمر: على فين يا نورا؟

نورا: ماشيه

عمر: مالك .. جرى ايه؟

نورا: (تبكي متأثره) عن اذنك

عمر: هي وصلت للعياط (تبتعد) .. (ثم موجهها كلامه إلى شوقي) ايه يا شوقي اللي حصل؟

شوقي: روح وراها .. هاتها .. أنا قلت كلام زعلها

عمر: (مناديا عليها) نورا .. استنى يا نورا .. (وقد لحق بها .. ولكنها ما تزال تبكي في تأثر)

: ايه اللي حصل

نورا: على فكرة بقى .. انا دلوقتي بس .. عرفت أن الاستاذ المخرج .. مستحيل يلاقى واحده تستحمله .. ودلوقتي بس .. أنا متعاطفه جداً مع مدام عفاف

عمر: طيب افهم ايه اللي حصل

نورا: باكلمه عن مدام عفاف وانه لازم يصالحها

نورا: (باكيه) يقوللى أنا مش جايبك هنا أحب فيكى وهو يعنى شايفنى دايبه فى غرامه .. هو أنا هالاقبها منين ولا منين؟

عمر: طيب تعالى معايا

نورا: لا.. خلاص نفسى اتسدت

عمر: طيب ايه رأيك عشان نعلمه الأدب.. أخذك ونروح نتعشى انا وانتى فى مكان

تانى وبرضه على النيل؟

(نهاية الحلقة)

(الحلقة التاسعة)

(١)

(مكان آخر على النيل)

عمر: هنا بقى احسن مكان ممكن تاكلى فيه اسماك.. نورا.. انا باكلم نفسى ولا ايه؟

نورا: مش واجب نكلم شوقي احسن عملية بايخه اللي احنا عملناها

عمر: ما تشغيل بالك.. بحضرتة.. لانه لو كان قلق.. كان كلمنى.. لكن احنا جينا وقعدنا وعملوا الاكل وقربنا نخلص وهو ولا كأن حاجه حصلت

نورا: جايز زعل ومشى

عمر: اسألينى أنا عنه.. لا يمكن يمشى وهو جعان

نورا: وجايز لقي حد تانى ونسى نفسه معاه

عمر: انتى شاغله نفسك بسيادته ليه اكرت من اللازم (يسألها) ايه خايفه بيعدك عن الشغل ويستغنى عنك ولا ايه!!

نورا: كلامك فيه تلميح يأذى مشاعرى يا استاذ عمر:

عمر: آسف.. آسف.. انتى حساسه قوى للدرجة دى؟

نورا: انت مؤلف ولك خبرتك فى التعامل مع الستات

عمر: الكلام ده على الورق بس

نورا: عايز تقولى انك مش عايش اكثر من تجربه قبل كده؟

عمر: اصل انا خواف.. ما يركيش المنظر.. شجاعتى كلها أن كان عندى شجاعة من اصله بتطلع على الورق لكن فى الحقيقة انا خييه.. عارفه أنا عامل زى اللى قاعد تحت الشمسية على الشاطئ ولابس المايوه لكن عمره ما نزل البحر

نورا: قلت لى!!

عمر: قلت لك ايه؟

نورا: انت مستنى النداهه لما تيجى تخطفك من تحت الشمسية

عمر: وجايز يطلع لى قرش.. يممصمص عضمى

نورا: لا.. يا استاذ عمر.. انت وراك حكاية عشتها فى طفولتك وهى اللى خلت تفكيرك بالشكل ده يعنى ممكن والدتك تكون خوفتك من الستات

عمر: (منزعجاً) نورا.. الكلام خلص لحد هنا!!

(٢)

(المكان الذى يجلس فيه شوقي على النيل)

(مثله شابه معروفه باداء أدوار الإغراء دون غيرها.. تلاحظ وجود شوقي وحيداً.. تقترب منه)

الممثلة: (فى نعومة) استاذ شوقي مساء الخير

شوقي: أهلا وسهلاً

الممثلة: أنا علا فهمى الممثلة

شوقي: وهل يخفى القمر

الممثلة: أنا أسفه.. شفتك قاعد كان لازم أجي اسلم

شوقي: اتفضلى.. اتفضلى

الممثلة: يعنى مفيش ازعاج

شوقي: لا ابدأ أنا كنت مستنى ناس اصحابى وجالهم ظرف طارئ

الممثلة: انا عندى ميعاد هنا مع منتج جديد.. لكنى يظهر انى جيت قبل الميعاد

شوقي: فرصة سعيدة

الممثلة: هى تبقى سعيده اكثر لو ادتنى فرصة فى مسلسلك الجديد أنا عارفه أن كله

عن مشاكل الستات وأنا فى حد ذاتى مشكلة (ضاحكه فى دلال)

شوقي: هتقوليلى.. بس انتى عارفه انا ليا وجهة نظر فى نوعية الادوار اللى بتعملها

الممثلة: انا شفت لك لقاءات تليفزيونية بتقول فيها أن الادوار دى اساءة للست

المصرية

شوقي: يا ريتها تيجى على دور فى فيلم أو مسلسل.. لكن فيه أعمال بأكملها..

قايمه على المنحرفه والخاينه.. مع أن الست هى مسمار البيت

الممثلة: يعنى النماذج اللى بقدما مش موجوده فى الحياة؟

شوقي: موجودة.. لكن ضرورى كمان نقدم نماذج الستات المتعلمات

والمكافحات اللى يمكن يكون حظها فى التعليم معدوم.. لكن ربنا

كويس.. وتعرف تطلع طه حسين اللى علم الدنيا كلها.. على سبيل المثال

الممثلة: (ضاحكه بطريقتها) انت عايز توقف حالى

شوقي: بالعكس.. انتى لازم تمثلى كل النوعيات.. لان تخصصك فى الأدوار إيها

عمرها قصير

الممثلة: وأعمل ايه اذا كانوا المنتجين مش شايفنى غير فى ادوار الدلع

شوقى: والحكاية دى باين عليها مريحاكى

الممثلة: أكل عيش يا استاذ.. ده انا غلبانه فى الطبيعة من البيت للكباريه لان اغلب

ادوارى فيه.. اوعى تفهمنى غلط

شوقى: لا غلط ازاي.. وانتى صح الصح.. أنا اللي غلطان

(٣)

(فى الشارع.. داخل سيارة عمر وقد ركبت نورا معه

فى إشارة بجوار ميكروباص يأتى صوت أغنيه هابطه)

عمر: سامعه اللي أنا سامعه

نورا: واللى يغيظك أن السواق عايز يفرض ذوقه المزعج على الركاب (الإشارة

تفتح والصوت يتعد)

عمر: الله يكون فى عونهم.. وفى عوننا احنا كمان.. تعرفى انا اتعرض على أكتب فيلم

هرش مخ من اللي بيعملوا فيها الاغانى دى.. وبأجر عمري فى حياتى ما

أخذت ربعه.. لكن الحمد لله قدرت أقول لا

نورا: معنى كده أنك صاحب مبدأ

عمر: حسيت انى هاخذ فلوس حرام فى شغل حرام لان الفن الحقيقى مهمته

يرتقى بأذواق الناس مش ينزل بيهم الحضيض

نورا: يقولوا انها واقعية

عمر: كذب طبعاً احنا فى الفن مطلوب منا اعادة صياغة الحياة.. نصالح الناس

عليها.. ونصالحها عليهم.. احنا بياعين خيال.. الفن جمال وخير وعدل
وحق وانسانية.. واللى بيحولوا المرأة لسلعة رخيصة هل بيخدموا
الانسانية؟.. ولا تجار المخدرات والسلاح والدعارة اللي بيمولوا الأعمال
الفنية الهابطة عشان تفضل تجارتهم فى العلالى؟ (انه يتسائل مندهشاً)

نورا: انا دلوقت بس عرفت ايه سر الصداقة والإنسجام اللي بينك وبين شوقي..
نفس أفكاره تقريباً

عمر: الحمد لله

نورا: بصراحة انا اشتغلت مع مخرجين ومؤلفين مفيش عندهم أى مانع يعملوا
أى حاجة.. المهم ياخدوا الأجر المطلوب

عمر: يعنى ينفع.. أعمر جيوبى.. واخرب عقول وبيوت الناس

نورا: الله عليك الله

عمر: نورا.. باقولك ايه؟

نورا: تحت أمرك

عمر: ما تيجى نتجوز

(٤)

(فى بيت عفاف ومعها دلال وبعض نساء)

من سكان العمارة همهمات وحوارات جانبية)

عفاف: لحظة من فضلكم يا حضرات

دلال: اسكتوا الست الرئيسه هاتتكلم

صوت (١): يعنى وافقتى يا مدام عفاف تمسكى الجمعية

صوت (٢): مش هنلاقي أحسن منك.. مشهورة وعندك علاقات مع شخصيات مهمة

صوت (١): والأهم من ده كله بتعملي مسلسل دلوقتي عن مشاكل المرأة.. والظلم اللي بتعرض له.. احنا عايزين نعلم الرجالة الأدب.. ايوه.. كفايه افترا

عفاف: حيلك حيلك انتي وهى.. أنا طبعاً وقتي ضيق جداً لكن وافقت عشان الفكرة حلوة

صوت (١): انا عندي شقة فاضية ومفروشة نقدر نعملها مقر للجمعية

صوت (٢): وأنا هاخلص الورق في وزارة التضامن عشان تبقى جمعية لها صفة رسمية ومشهرة

دلال: أيوه كده خلى فكري يعرف أن ورايا ستات تاكل الزلط.. (تكلم نفسها) بس يا خسارة ماهو لو عرف مش هيوافق انى ابقى عضوه في الجمعية

عفاف: سيبك من فكري وخلينا في المهم

صوت (١): أيوه.. وايه هو المهم يا حضرة الريسة؟

عفاف: لايحة الجمعية وأهدافها

صوت (٢): هو ده ملعبى أنا بتاعة حقوق.. وأهم أهدافنا.. مساعدة المرأة في الحصول على حقوقها والمساواة الكاملة مع الرجل في كل شئ وتنمية المرأة ثقافياً وعملياً.. ورفع القضايا لكل ست مظلومة لغاية ما يرجع لها حقها

(بصنقن جميعاً واحداهن تطلق زغروده)

دلال: هو ده الكلام.. اللي يستاهل اطلع اجيب لكم حلة المحشى اللي عندي
ومطرح ما يسرى

عفاف: وفكري.. ياكل ايه؟

دلال: ياكل بعضه (ضحكاتهن)

(٥)

(في بيت عمر.. وشوقي يجمع ملابسه)

عمر: (مندهشاً) انت بتعمل ايه يا معلم؟

شوقي: أنا خلاص أجرت شقة مفروشة هاقعد فيها الايام اللي جايه.. انت راجل
داخل على جواز ومحتاج توضب امورك

عمر: انت مش ملاحظ انك لغاية دلوقت ماقلتش رأيك ايه؟

شوقي: هي انسانه كويسه.. وانت كمان وربنا يوفقكم

عمر: لكن ملامحك بتقول غير كده

شوقي: لانك بتفكر على طريقة عفاف.. فاهم أن بيني وبين نورا حاجة.. البنت دي
أنا فعلاً والله العظيم باعتبارها زى اختي

عمر: أمال مش فرحان ليه؟

شوقي: لاني هنا بافكر بعقل المخرج مش بعواطف صاحبك.. والمخرج
يحبها.. لما المؤلف والمساعدة بتاعته اللي هي في نفس الوقت.. بتعمل

اكثر من دور في المسلسل هينشغلوا بالجواز.. هو يتصرف ازاي!

عمر: يا سيدى.. نستنى بعد المسلسل ما يخلص

شوقي: أن كان كده يبقى الف مبروك يا عمور

(يتعانقان في موده)

عمر: ممكن بقى ترجع الشنطة مكانها وتستهدى بالله

شوقي: (بشكل مفاجئ) لكن قولى يا عمر.. لما عرضت عليها الجواز وافقت على طول؟

عمر: لا.. سكتت خالص.. واللى قبلنا قالوا.. السكوت علامة الرضا

شوقي: (بشكل يثير شكوكه).. طيب!!

عمر: طيب ايه عايز افهم (فى عصبية)

شوقي: ايه يا بنى مالك.. اتعصبت فجأة ليه؟

عمر: لان كلامك مش عاجبنى.. ولازم تصارحنى بكل حاجة.. والا انت من سكه وانا من سكه!!

(نهاية الحلقة)

(الحلقة العاشرة)

(في مكتب أسماء .. مع نورا)

أسماء: ادبنى لوحدنا خالص.. ومش هارد على أى تليفون.. وهاسمكك للصبح..
اتكلمى بقى يا نورا

نورا: عمر طلب إيدى!

أسماء: بجد الف الف مبروك (متحمسه بصدق).. ودى حاجة تزعل؟!!

نورا: انا مش زعلانه.. أنا محتاره!

أسماء: عمر بصراحة شاب محترم وسمعته كويس ومستقبله قدامه.. ومش شايفه
فيه اى عيب

نورا: مظبوط؟

أسماء: تبقى ايه المشكلة؟

نورا: اولاً هو اتقدم لى فجأة بدون أى تمهيد!!

أسماء: هو احنا بنعمل دراما ده جواز.. واكيد فكر الف مرة وبعدين كلمك

نورا: عمر.. متعقد من الجواز.. لان فيه فى حياته.. موضوع مش حلو وهو صغير
وده ساب أثر كبير فى نفسه.. وخايفه ده بيان لما يتقبل علينا باب واحد!!

أسماء: بصى يا نورا.. أنا معاكى أن المشاكل اللي بنعيشها فى طفولتنا.. بترسم لنا
حياتنا واحنا كبار.. ومفيش حد فينا مكانش عنده مشكلة من أى نوع وهو
صغير خصوصاً البنات.. لاننا كنا بتتربى وسط ظروف.. صعبه وكسوف

وخجل اننا نصارح أهلنا بكل اللي بيحصل معانا أو بنشوفه

نورا: يعنى عندى حق اكون قلقانه ومختاره

أسماء: فرصة بقى استعرض ثقافتى معاكى لان امبارح بالليل دخلت على موقع وقرت فيه أن الحضارة الصينية القديمة كانت تسمى الست أو البنت (المياه المؤلمة) لانها بتغسل السعادة والمال.. يعنى بتمسحهم مسح.. وكان من حق الزوج بيع مراته وياخد فلوسها.. ولو مات ممنوع تتجوز غيره وتعاليم كونفوشيوس بتقول انها لازم تكون مطيعة للرجل فى كل شئ

نورا: الحمد لله اننا مطلعناش صينيات

أسماء: ما كل ده اتغير.. الزمن يا نورا أقوى من كل الذكريات وكلنا بتتغير.. يعنى عمر هيبقى كويس

نورا: أهى دى كمان أنا خايفه منها.. لانى اتخطبت كذا مرة واتكتب كتابى مرة وانفصلت قبل الجواز.. لدرجة انى ياست وقلت بلاش جواز نهائى وادينى قاعدة مع والدتى لغاية ربنا ما يحلها من عنده!

أسماء: (ثم بشكل مفاجئ) نورا.. صارحيني؟.. انتى بتحبنى شوقي؟!

(٢)

(فى الاستوديو مشهد تمثيلى لعفاف)

عفاف: ده ما يعرفش الحب.. طول عمره أنانى.. وكذاب.. خدعنى بكلامه.. وبوعوده اللى طلعت كلها أوهام واحتيال.. وقفت جنبه لغاية.. ما الفقر اللى كان معشش جواه بقى عز وفلوس ومركز ومكانه.. والنتيجة ايه.. راح يعمل فيها دون جوان.. ويأريته بيتجوز على سنة الله ورسوله لكن لا.. بيخون.. وييعتبر اللى بيعمله دلح وغرام وحب.. بعد ايام الشقا والضنك..

وأنا.. مين يعوضنى عن شبابى اللى راح؟.. وكرامتى اللى فى الارض.. ولما
فلوسه ضاعت على كيفه ومزاجه ومغامراته.. رجع تانى.. عشان ياخذ
القرشين اللى قدرت اشيلهم من وراه.. لجل خاطر عياله ومصاريفهم..
واللى زاد وغطى.. عايزنى اشاركه فى سهراته مع شلة الفساد اللى حوالية..
بحجة انه بيعمل بيزنس ولازم يجامل الناس اللى بيشتغل معاهم..
واشتكيت له من صحبه السوء.. وازاى بيضايقونى.. قاللى بكل نداله..
طولى بالك.. عشان مصلحتنا.. يعنى عايز يتاجر بشرفى وسمعتى.. وانا لا
يمكن أعيش معاه لحظة.. لازم يطلقنى.. لازم يطلقنى!!

(تصفيق واعجاب باداء عفاف)

شوقي: (بهدوء زائد) شكرأ.. المشهد اللى بعده.. ياللا يا نورا حضرى المشهد
رقم ٣ حلقة ٧.. (يبتعد)

عمر: (يقترب منه) ايه البرود والسماجة اللى انت فيها دى؟

شوقي: عايزنى أعمل لها ايه.. اديها الاوسكار

عمر: لا.. تديها حقها

شوقي: احنا مش قاعدين فى مسرح.. واللى عملته كويس لان الحوار كويس

عمر: ده من ذوقك يا عم المخرج

شوقي: باقولك ايه أنا ملاحظ أن نورا بتحاول ما تتكلمش معاك

عمر: لانى مش عارف اطلع منها بنتيجة مفيدة

شوقي: طيب خلاص.. اسكت دلوقتى.. نورا جايه علينا

نورا: (تقترب) استاذ شوقي انا مخنوقه عايزه أمشى

شوقي: والشغل.. احنا لسه في اول اليوم

نورا: (بعصيه) باقول لحضرتك تعبانه وعايزه أمشى

شوقي: اتفضلى.. بس فيه مشكلة لو عرفنا نوع التعب نفسى ولا جسمانى ولا
سياسى ولا عاطفى؟

نورا: عن اذنكم!! (تبتعد)

عمر: ايه تفسيرك يا عبقرى ما هى كانت من شويه شغاله وزى الجن!

شوقي: (ساخراً) تفتكر أنا وانت واتخن شنب.. ممكن يفهم الست اللى قدامه
٪١٠٠

عمر: احنا كفاية علينا نفهم نفسنا

(٣)

(في بيت دلال وفكري تضع له الطعام ثم في أدب زائد)

دلال: الباشا.. يأمرنى بأى خدمة تانية

فكري: ايه مالك واقفه في مطعم؟

دلال: لا واقفه لخدمة سيادتك.. ده يزعلك

فكري: ومن امتى الاسلوب ده.. وبعدين انتى مش هتقعدى تاكلى

دلال: الحقيقة انا سبقتك مع الاولاد

فكري: (باسلوب ماكر يحاول استدراجها في الكلام) طيب اقعدى بلاش تاكلى..

على الأقل تفتحى نفسى

دلال: ربنا يفتح نفسك على طول

فكري: لا ادعيل وقولى.. ربنا يفتح عينيك على طول

دلال: هو سيادتك مغمض ولا ايه؟

فكري: مغمض جداً.. بقى حضرتك عامله فيها زعيمه ويتكونى جمعية انت
والست عفاف وكام واحدة من بتوع العمارة واجتماعات شغالة.. وأنا
أعرف بالصدفة فى الاسانسير وانا طالع مع الدكتور عزوز.. والراجل بيقولى
خد بالك احنا ممكن نتاخذ اسرى.. أو يترفع علينا قضايا وتبهدل فى
محكمة الاسرة لوحد فينا فتح بقة مع مراته

دلال: دى مش جمعية بقى.. دى حملة لمكافحة صنف الرجال؟!!

فكري: امال يعنى هتعملوا الجمعية دى.. عشان تلعبوا فى الدورى الممتاز
وتنافسوا الاسماعيلي والأسيوطي

دلال: لا يا استاذ فكري.. عشان نعرف ايه اللي لينا وايه اللي علينا

فكري: أهو انا دلوقتى بس فهمت ليه حضرتك بتفكري تدرسى الحقوق.. ده
مخطط بقى.. بس بيتهيألى كده مش بتاعك.. الموضوع ده وراه عفاف

دلال: هى الدراسة حرام!

فكري: لو على حساب بيتك وجوزك تبقى حرام طبعاً

دلال: واذا كانت فى الجامعة المفتوحة وهاذاكر فى البيت بدل ما انا قاعدة فى حالة
فراغ... مش أحسن

فكري: أنا مش موافق

دلال: هى عند!!

فكري: لا.. بس شرع ربنا بيقول.. ما تقدرش تعمل حاجة ولا تخطى عتبة البيت

بدون أذنى.. ايه هتترضى على شرع ربنا؟

دلال: وشرع ربنا بيقول تسود عيشتى وتتحكم فىا وتمنعنى اتعلم أو أزور أهلى أو حد منهم يزورنى؟

فكري: لا حظى انك وبالطريقة دى هتسدى نفسى عن الأكل

دلال: (وقد فاض بها) وانت بصراحة سدبت نفسى عن الدنيا بحالها

(٤)

(عفاف فى لقاء تليفزيونى مع مذبةعة أو مذبةع)

المذبةع: ويسعدنا فى برنامج «انت حر» أن نستضيف النجمة الفنانة عفاف اللى اصبحت حديث الناس فى الفترة الأخيرة وخصوصاً بعد الاعلان عن رئاستها لجمعية «المرأة الحديدية»

عفاف: اولاً باشكرك على استضافتى فى برنامجك الناجح.. ثانياً احنا غيرنا اسم الجمعية.. ودلوقت اسمها الجديد واحدة + واحد

المذبةع: اسم غريب وجديد

عفاف: بالعكس ده اسم منطقى.. احنا مش عاملين الجمعية عشان نحارب الرجالة.. احنا بنقول ببساطة أن الحياة لا يمكن تنجح الا بواحدة + واحد

المذبةع: وليه متكونش واحد + واحدة

عفاف: يعنى جمعية هدفها تدور على حق كل واحدة مظلومة.. وغالباً اللى ظالمها واحد.. اقوم اسمى الجمعية على اسم سيادته

المذبةع: واضح اننا هنعمل حلقة سخنه جداً

عفاف: سيبك من سخنه وبارده.. انا جيت النهارده مخصوص عشان اوضح نقطة

مهمة جداً.. وعائزه حضراتكم تفتكروا معايا الفيلم اللى قدمته العظيمة شادية وهو مراتى مدير عام فاكرين المشكلة اللى كانت بينها وبين جوزها الباشمهندس صلاح ذو الفقار.. احنا لازم نفرق بين خلافات عائلية وبين خلافات فى الشغل بين اتنين زملا فى عمل واحد

المذيع: انا كنت هاسأل السؤال ده ومُخرج

عفاف: انا وفرت عليك الاحراج.. والناس كلها عارفه أن جوزى الاستاذ شوقى المخرج وفيه مشكلة بينى وبينه زى اى زوجين.. لكن فى الاستوديو هو عارف قيمتى كويس.. والجمعية هدفها تصحح المفاهيم المغلوطة عند الناس.. يعنى مثلاً هو عشان جوزى.. يظلمنى فى شغلى ويهين تاريخى لصالح واحدة مبتدئه.. اظن مش معقول

المذيع: يعنى الجمعية مش لمحاربة الرجالة

عفاف: لما يكون الراجل كويس وبيحترم الست اللى قدامه اى أن كانت درجة ارتباطه بيها.. هتحاربه ليه؟

المذيع: طيب بعد اذنك يا مدام عفاف بيقولولى فى الايربىز من الكترول أن فيه تليفونات كتيره طالبة تعمل مداخلة مع حضرتك.. ايه رأيك!

عفاف: أهلاً وسهلاً

المذيع: ومعانا اول مكالمة.. قولى ألو يا مدام عفاف

عفاف: (بثقة زائدة) ألو.. مين معانا

صوت شوقى: (عبر تليفون البيت فى المداخلة) انا المخرج اللى بيضطهدك.. فى الاستوديو يا حضرة الفنانة!

(نهاية الحلقة)

(الحلقة الحادية عشر)

(اصوات أطفال يصيحون ويضحكون ويلعبون في بيت دلال)

دلال: (تصيح فيهم) ادخل العب جوه منك له.. مش عايزه اسمع صوت.. دلوقتي نعلي التلفزيون عشان اعرف استمخ من الكلام الموزون بتاع الست عفاف.. قولى يا أختى واشجيني.. كمان يا ست

صوت عفاف: (يأتى عبر التلفزيون) ايوه يا أستاذ شوقي اتفضل اتكلم انا تحت أمرك

صوت شوقي: (تليفزيونياً في المداخلة) من حق مدام عفاف تتكلم عن شغلها زى ماهى عايزه.. وتقول وجهة نظرها في المخرج الظالم اللى هو أنا.. لكن بيتهيألى لو كل واحدة ست طلعت على التلفزيون واتكلمت عن بيتها واسراره.. ما أظنش أن فيه جوازه واحدة هتستمر ٢٤ ساعة.. لان البيوت لها حرمة.. وشكراً (ينهى المكالمة)

ص. المذيع: شكراً لمداخلة المخرج المعروف الاستاذ شوقي شريف

ص. عفاف: المفروض انه يناقشنى مش يقفل السكة

ص. المذيع: هو اكتفى بوجهة نظره وخلاص

ص. عفاف: على العموم أنا معاه طبعاً أن البيوت اسرار.. لكن احنا شخصيات عامة الناس تحب تعرف أخبارنا.. وياخدونا قدوة.. وبعدين الاستاذ يعرف اكثر منى.. أن البيوت اللى بتتهدم لمجرد كلمتين يتقالوا على الهوا أو

على الميه متبقاش بيوت.. دى ورقة فى مهب الريح.. واحنا والحمد لله بيتنا
قلعة حصينة

دلال: (تصيح فى سعادة) يا واد يا عفاف يا ثقة

(٢)

(فى مكتب أسماء تتحدث تليفونياً)

أسماء: يا شيخ.. هما كده على الطبيعة.. ايوه طبعا المسلسل فيه جزء كبير من حكاية
عفاف وشوقي بس طبعا بطريقة غير مباشرة.. حضرتك عايزه حصرى للقناة
بتاعتكم ده يشرفنا.. هابتعت لسيادتك ايميل بالسعر.. الف شكر.. مع السلامة
يا شيخ (تهنى المكالمة) (يرن التليفون الارضى ترفع السماعه)

أسماء: (ترد على المكالمه) أهلاً عزوز بيه.. طبعا يشرفنا جداً.. ابدا والله مش
بروباجندا.. طيب باقول لسيادتك ايه اذا كانت خناقة عفاف وشوقي
عاجبه حضرتك للدرجة دى نعملها حلقات (ضاحكة).. لا تحت أمرك
او كيه.. فى انتظارك سلام (تضع السماعه).. (ثم بينها وبين نفسها) منك لله
يا عفاف.. قلبتى الدنيا.. والحقيقة انا لازم ادعيلك مش ادعى عليكى
(يدخل شوقي عليها فجأة) شوقي.. أهلاً تعالى

شوقي: انا خلاص.. زهقت من صاحبك واسلوها.. انا بقيت حدوته على كل
لسان

أسماء: طيب اهدى بس.. واشرب حاجة

شوقي: يعنى احنا بنعمل تمثيلية عشان نسلى الناس.. الست عفاف خلتنا احنا مادة
التسليه

أسماء: شوقي ممكن تسمعنى الله يخليك

شوقي: طبعاً أنتى من جواكى فرحانه باللى بيحصل

أسماء: المناوشات بتاعتكم خلت سعر المسلسل فوق فوق.. وطبعاً أجرك هيزيد

شوقي: معنى كده أن حضرتك مبسوطه من عمائلها

أسماء: لا طبعاً.. لكن لو فكرت بهدوء هتلاقى الحكاية بسيطة ومش مستاهله
زعلك ده كله

شوقي: طيب بصى يا مدام.. مسألة تغيير عفاف بقت صعبه لاننا قطعنا شوط كبير
فى التصوير وده هيخسرك نص ميزانية المسلسل.. يبقى مفيش قدامنا غير
انى انسحب وحد تانى يكمل.. لكن الاستمرار فى الجو ده عملية من رابع
المستحيلات

أسماء: (نحاول تهدئة الجو معه) يا استاذ شوقي انت فنان وعارف لغاية وقت قريب كان
المتج بيسرب قصة جواز أو طلاق البطل والبطله من باب الدعاية للفيلم
واتعملت مع نجوم كبار وعملت رواج للافلام لكن المره دى المتج غلبانه..
والموضوع جالها لغاية عندها وبعدين انتم اصحابى قبل الشغل وبعده
شوقي: واضح انك مبسوطه باللى حاصل.. يبقى أنا هاتصرف بطريقتى.. (يبتعد
ماشياً)

أسماء: (تنادى عليه) شوقي استنى بس.. يا متهور!!

(٤)

(ضحكات وهمهمات نسائية فى اول اجتماع لجمعية واحدة+واحد)

عفاف: بسم الله الرحمن الرحيم.. نفتتح اول اجتماع للجمعية بعد اشهارها..
وعايزه أقول لحضراتكم اول ما عملنا صفحة على الفيس بوك دخل لنا ١٥

الف عضو عشان كده.. احنا لازم نخلى حد متخصص للمصفحة يرد على الاسئلة

دلال: بعد اذن الست الريسه.. فيه ستات بتسأل يعنى ايه الاغتصاب الزوجى؟
عفاف: أن الرجل يتعامل مع الست بتاعته على انها وسيلة للمتعة وفي اى وقت يطلبها لازم تكون جاهزه

دلال: بس أنا سمعت الشيخ في برنامج حديث الروح بيقول أن الواحدة اذا امتنعت عن جوزها.. تبات ملعونه من الملايكه

عفاف: انا مش فاهمه يعنى راجل يعامل مراته كما لو كان داخل سوبر ماركت عايز يشتري ربع جبنه رومى.. يقولوا له اتفضل.. دى أمور فيها مشاعر.. وعواطف.. واحساس

عضوه: هو احنا هناخد جلسة الاجتماع كلها في المشكلة دى يا استاذة عفاف
عفاف: لا طبعاً.. جدول الأعمال فيه ايه؟

العضوه: بعد اكتمال اختيار مجلس الادارة.. اختيار الحملة الاولى لانشطة الجمعية

عفاف: انا باقتراح نعمل حملة ضد الاغتصاب الزوجى.. لانه يفسد حياة الست والراجل

العضوه: بمناسبة الرجالة.. فيه اقتراح تقدمت بيه سيدة زميلة بتطالب فيه بفتح باب العضوية في الجمعية للرجال

عفاف: والله فكره.. هو فيه حد طلب العضوية؟

دلال: ما أظنش انه فيه راجل هيقترب ناحية الجمعية الا اذا كان عايز يدمرها

عفاف: فيه اقتراح تانى يا حضرات

العضوه: تكريم فريق الملاكمة الحريمى الى كسب بطولة العرب من اسبوعين

عفاف: ونعمل لهم حفلة كبيرة تحضرها كل القنوات الفضائية ويلعبوا ماتش
استعراضى

دلال: ماتش مع الرجاله يا استاذه؟

عفاف: طبعاً انتى نفسك تلاعبى فكري!!

(٥)

(عمر يدخل إلى شوقي حيث ينام.. والموبايل يرن على رنة المنبه)

عمر: شوقي الساعة بقت اتناشر؟! .. واحنا عندنا استوديو

شوقي: تعبان يا عمر.. سيبنى كمان ساعة

عمر: أسماء اتكلمت ٣ مرات والاستوديو جاهز.. والمشهد الاول فيه مجاميع
وناس واخده فلوس

شوقي: أنا قلت لها مش هاكمل

عمر: احنا هنهزر.. قوم.. قوم

شوقي: فيه ايه؟

عمر: انت كده مش بتعند مع عفاف ولا أسماء.. انت كده بتوقف حالك بايدك..
لان المنتجين هيخافوا يشتغلوا معاك.. ولا انت عايز حد يشمت فيك قوم

يا راجل قوم

شوقي: هو الاوردر الساعة كام؟

عمر: واحدة ونص.. وانت المخرج يعنى مفيش شغل من غيرك

شوقي: خلاص هاقوم.. انت فطرت ولا لسه (وهو يتائب)

عمر: قلب الام يا حبيبي.. ينفع آكل وابنى جعان.. يقطعنى (مقلداً الامهات)

شوقي: امال ليه دمك ثقيل لما بتكتب كوميدى

عمر: كوميدى ايه وأنا حاسس انى عايش على جبهة القتال

شوقي: انا اللي عامل القلق والتوتر.. ولا الست المناضله؟

عمر: المداخلة بتاعتك فى البرنامج نزلوها على اليوتيوب وعامله أعلى نسبة

مشاهدة

شوقي: والتعليقات بتقول ايه؟

عمر: لا دى يا حبيبي تقرأها بنفسك.. بعد ما تشرب النسكافيه يا ضنايا

(٦)

(أغنية محرم فؤاد فى التلفزيون والنبي لتكيد العزال)

دلال: (سعيدة تردد مع محرم.. يدخل فكري بعد أن يفتح الباب.. يستمع إلى

الأغنية ثم يغلق التلفزيون فى غيظ)

فكري: دى بقت حالة حرب رسمى.. ومين بقى العزال اللي حضرتك ناويه

تكديهم؟

دلال: يا أخى قول سلامو عليكم.. العواف.. سالخير.. وبعدين هو انا اللي عامله

الاغنية

فكري: ايوه بس عاجباكى وكنتى بتغنى معاها

دلال: يا ساتر يا رب.. صعبان عليك أقعد شويه مبسوطه

فكري: طيب عشان تنبسطى اكثر واكثر.. أنا قلت للست الريسه بتاعتك تشيلك
من الجمعية نهائى

دلال: تشيلنى يعنى ايه.. ده لازم الجمعية العمومية هى اللى تقرر.. هى لعبة يا
استاذ

فكري: ايوه لعبه.. وبياخه جداً.. وكفاية لغاية كده

دلال: طبعاً انت زعلان لان اللقمه الطرية اللى كانت تحت ضرسك.. بقت
ناشفه.. ولازم تعمل مجهود عشان تعرف تبلعها!

فكري: اسمعى يا دلال.. انا فعلاً كنت ساعات باتعصب عليكى لكن والله العظيم
أنا عارف أن انتى ام عيالى وحيبىتى.. بس أنا بازعل منك.. وبعدين بارجع
اروق وأصالحك

دلال: ايوه يا خويا اتدحلب واتمسكن.. واعملى فيها الاستاذ منعم مدرس
الموسيقى فى شارع الحب

فكري: وانت بلاش تعملى فيها ريا وسكينة.. انتى مش زى عفاف!

دلال: عشان هى مشهورة؟

فكري: لا عشان هى متهوره وبتعمل أى حاجة تيجى على بالها

دلال: الاستاذ شوقي هو اللى مسلطك تقول الكلمتين دول؟

فكري: لا.. الاستاذ شوقي مش محتاج يسلطنى لانه خلاص.. قرر يطلقها!!

(نهاية الحلقة)

(الحلقة الثانية عشر)

(١)

(نورا في مشهد تمثيلي امام ضابط شرطة يقوم عمر بدوره)

نورا: يا حضرة الطابط انا فعلاً قتلتك بس دفاع عن الشرف انا زى بنات كتير قريرت الاعلان اللى هو عامله مطلوب سكرتيرة حسنة المظهر تجيد الانجليزية والكمبيوتر.. ورغم انى شكيت فى الصيغة لان فيها تمييز انسانى.. وقلت ايه المانع يبقى السكرتير راجل.. وافرض انها حلوه وغبيه وجاهلة.. يعنى المسألة فيها شك

عمر: وايه اللى خلاكى رحتى؟

نورا: يا حضرة الطابط أنا رحى عشان محتاجة الشغلانة أنا عندى ليسانس آداب انجليزى بدرجة جيد وأخذت كورسات تانية اضافيه.. ده غير الكمبيوتر وعايزه اشتغل.. وقلت الصيغة دى بقت معتاده.. عشان بيتعاملوا مع رجال أعمال وشخصيات مهمة

عمر: وبعد كده حصل ايه؟

نورا: لما رحى فى اليوم اللى حددهولى عشان الامتحان.. لقيت بنات كتير وكانت منهم ستات اللى أرملة واللى مطلقة.. ومنهم برضه اللى رايحه وهى عارفه أن مؤهلاتها شوية دلع وبس.. وكتبتنا استمارة وبدأت كل واحدة تدخل واللى تعجبه يديلها ميعاد تانى ويوهمها انها خلاص هتشتغل

عمر: وانتى عمل معاكى كده؟

نورا: سألنى انتى ممكن تسهرى؟ .. قلت ايوه مفيش مانع .. أنا قلتها بحسن نيه لان الشغل عايز كده .. وهو فهمها من ناحية تانيه

عمر: هل كانت ملابسك ملفتة للنظر

نورا: أنا بطبعى ما أحبش البهرجة .. لكن ده ما يمنعش انى كنت مهتمة بنفسى بشكل ملحوظ .. لكن محتشم والله العظيم .. وقاللى مبروك هتشتغلى وادانى عقد مضيت عليه وشهر مقدم .. واكتشفت انه مركب كاميرا فى الحمام بالصدفة .. وواجهته بكده ثار وغضب وحاول يعتدى على عشان يكسرنى ويدلنى .. ضربته بأزازة حاجة ساقعه

نورا: تكمل متأثره واتضح انه مريض بالقلب

عمر: وعرفتى منين؟

نورا: من الادوية اللى كانت موجودة وصور أشعة وتحاليل

عمر: عندك أقوال أخرى!

نورا: كلمة واحدة بس .. فى قضيتى دى يا حضرة الظابط انا القاتله .. بس حقيقية الامر أنا المقتولة

شوقي: (يصيح معجباً) برافو يا قتالة القتله برافو .. بروفه هايله

عمر: والظابط اللى كان معاها .. كيس جوافه؟

شوقي: ليك عندى مفاجأة!

(٢)

(فى بيت عفاف مع دلال)

عفاف: انتى مالك مرووشه كده ليه .. جوزك مش هيجى دلوقت .. بيعمل ديكور

جديد في الاستوديو ولازم يخلصه الليله.. يعنى تقريباً هيبات بره.. ثم انك قاعدة هنا معايا في البيت

دلال: بس عارفه من ساعة ما بقيت ارد عليه وأناقشه واكلمه.. ابتدا يتغير شويه
عفاف: عشان بقى عندك شخصية!

دلال: وجايز بيعمل كده من الصدمه لانه مش مصدق انا كنت ايه وبقيت ايه؟
عفاف: لكن نصيحة يا دلال خدى بالك
دلال: من ايه؟

عفاف: تنسى نفسك.. وتدخلي معاه في ماتش عناد.. وتبقى شخصية هجومية دائماً
عامله له مشكلة.. ودايما مخلياها يلف حوالين نفسه
دلال: وده عيب؟

عفاف: ايوه عيب.. لان فيه فرق انك تحطى ايدك على كتفه وانك تخلعى كتفه..
ويمشى بكتف واحد
دلال: لا.. بعد الشر على فكورتى!

عفاف: طيب يا اختى.. يا مغرمه.. ايه أخبار الجمعية؟!

دلال: عايزين يعملوا ندوة عشان الختان واضرار.. وبصراحة انا مش مقتنعه
بالكلام ده

عفاف: ليه بقى؟

دلال: لانها حرية شخصية وكل واحدة حره

عفاف: بس واجبنا نفهم الناس.. ايه الاضرار.. والناس احرار يعملوا اللي يعملوه
بعد كده

دلال: طيب ما نشوف لنا موضوع تانى.. هى يعنى مشاكل الستات خلصت؟
عفاف: ده موضوع مهم يا استاذة دلال.. وبعدين احنا جمعية واحدة + واحد..
يعنى فى صميم اهتمامنا وشغلنا
دلال: بصراحة كده أنا اتكسف اتكلم فى امور خاصة زى دى!
(٣)

(عمليات دق ونجارة وما إلى ذلك اثناء عمل الديكور)

أسماء: سلامو عليكم

(اصوات عديده: ترد السلام وهم عمال الاستوديو): عليكم السلام

صوت: اهلاً يا أستاذة أسماء

أسماء: امال فىن الباشمهندس فكري؟

الصوت: يظهر سمع خبر مش كويس بعد مكالمة تليفونية جت له

أسماء: وهو فىن؟

الصوت: قال انه رايح لك عشان عايز يمشى

أسماء: يمشى ازاي.. الديكور ده لازم يخلص بكره بالكثير

الصوت: أهو المهندس فكري.. جه (يقترب منها)

أسماء: خير يا باشمهندس مالك وشك متغير خالص

فكري: انا ها قول لحضرتك.. بس ممكن يعنى

أسماء: (للعمال) طيب يا جماعة اتفضلوا انتم.. (يتفرقون ثم إلى فكري) تحت أمرك

يا باشمهندس ادينا لوحدنا

فكري: أنا مضطر اسافر بلدنا في البحيره.. فيه مشكلة مؤسفة

أسماء: خير يا فكري

فكري: (متأثراً) بنت اختي في البلد ماتت

أسماء: لا اله الا الله.. البقاء لله.. هي عمرها قد ايه!

فكري: طفله ١١ سنة

أسماء: يا ساتر يا رب وماتت ازاي!

فكري: الست الدايه اللي في البلد بتعمل لها عملية الختان.. يظهر الموس اللي بتستخدمه كان ملوث وحصل نزيف.. وعقبال ما راحوا بيها المستشفى ومع الاهمال اللي في الوحدة الصحية.. البنت ماتت

أسماء: قلبي معاك يا استاذ فكري.. ولو عايز أى مساعدة اقدر أقدمها لك انا تحت أمرك

فكري: وبخصوص الشغل انا وزعته على بقية الزملا.. وان شاء الله هيخلص في ميعاده كأنى موجود بالظبط

أسماء: مفيش مشكلة اتفضل انت

فكري: قبل ما امشى يا ريت الاستاذ عمر المؤلف.. يعمل حاجة في المسلسل عن موضوع الختان

أسماء: اكيد ده موضوع مهم جداً.. وهو لسه بيخلص باقى الحلقات

فكري: وانا لما ارجع من البلد بعد واجب العزا.. هاقعد معاه وأقول له الحكاية كلها

أسماء: اتكل على الله انت.. وربنا يجعلها آخر الأحزان

فكري: ولو انها جملة حلوة انها تكون فعلاً آخر الاحزان بس أنا عمري ما صدقتها
ولا حسيت بيها.. طول ما الجهل موجود.. والاهمال كمان!

(٤)

(عفاف تؤدي مشهداً تمثيلاً)

عفاف: انا قلت لابوها بلاش.. قاللى لا.. زيها زى غيرها من البنات.. دى حتى
اتأخرت فى الختان.. عايزين نسترها.. ولما كان ولا بد قلت له بلاش
الدايه.. قاللى ايديها تتلف فى حرير وكل ستات وبنات الناحية اتختنوا وياها
قلت له الدنيا اتقدمت.. قاللى خليها تتقدم

عفاف: وأدى النتيجة خسرت بنتى.. خسرت الوردة الحلوة اللى كانت منوره
حياتنا.. وخسرت ابوها كمان لانى حلفت يمين تلاته ما اعيش معاه بعدها
تحت سقف واحد

شوقي: (يصيح فى الاستوديو) استوب.. شكراً يا مدام

عمر: (وقد جلس على مقربة منه) خلى عندك شوية من الأحمر.. وقول لها احستى
يا أستاذة عفاف.. يا ست عفاف.. انت خايف تقول اسمها

شوقي: لا مش عايز أقوله.. وبعدين حضرتك المؤلف قاعد هنا فى أوضة
الكتترول تعمل ايه!

عمر: (بنفس روح الدعابة) قاعد اشوف المخرج العبقري وهو ببيوظ لى الشغل
اللى طلع عينى فيه

شوقي: (يصيح) استاذة نورا.. هنشغل مشهد ٩ فى الحلقة (٢).. الخناقة اللى بين
الراجل ومراته بسبب الغيره الغبيه

نورا: (من داخل الاستوديو) اوكيه يا استاذ.. ادينى ربع ساعة أحضر المشهد شوقي: (يكلم عمر بجواره).. باقولك ايه يا عمر عملت التعديل الى قلت لك عليه فى المشهد؟

عمر: بصراحة انا مش مقتنع بوجهة نظرك؟

شوقي: انا عايزه مشهد سخن

عمر: وانا كمان.. بس حضرتك عايز تستغل المشهد عشان تلاغى عفاف

شوقي: وهى عفاف بس اللي عندها غيره عميا وغيبه

عمر: لا.. بس جوزها بدل ما يحاول يكسب ثقتها بيحاول يشعلل غيرتها اكر واکتر.. واحنا بنعمل دراما.. مش حكايتك انت وعفاف

شوقي: عمر.. انا باتكلم جد

عمر: وانا والله باكلمك جد.. لانى خايف عفاف تقابلنى دلوقتى وتطلب منى أعدل المشهد زى ما هى عايزه وابقى كوره بينك وبينها

شوقي: انت ممكن تكتب الى انت عايزه واللى هى عايزاه بس فى الآخر.. المخرج هيصور الى هو عايزه.. ومتناساش انى ممكن اكتب المشهد زى ما انا عايزه.. يعنى مش هاغلب

عمر: انت بتكلم جد ولا بتهزر؟

شوقي: لا باكلمك جد جداً.. جداً.. جداً

عمر: تبقى ناوى على ازمة ملهاش أول ولا آخر بينى وبينك!!

(نهاية الحلقة)

(الحلقة الثالثة عشر)

(١)

(محاضرة في جمعية واحدة + واحد)

المحاضر: المرأة قبل الاسلام كانت جريمة... بعض القبائل كانت تدفنها حيه وهى معدومة الحقوق حتى من حق الحياة.. وكان الرومان يعتبرونها بلا عقل ويجب الحجر عليها وهى مسئولة عن الفواحش والانحلال الاخلاقى.. وكانوا يعتبرونها مجرد خادمة للرجل.. وجاء الاسلام فرفع شأنها وقال انهن شقائق الرجال.. وقال الله تعالى فى كتابه الكريم ﴿يَأْتِيَنَّهَا النَّاسُ أَتْفُؤًا رِيَكُمُ الَّذِي خَلَقَكُمْ مِن نَفْسٍ وَجِدَةٍ وَاَخْلَقَ مِنهَا زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً﴾ ولها حق اختيار زوجها.. وحق العلم وحق العمل وحق الميراث.. وهل هناك اكثر من وصية الرسول صلى الله عليه وسلم بالنساء فى خطبة الوداع وكما قال: هن مصابيح البيوت

عفاف: (تقاطعه) أنا أسفه يا استاذ.. لكن ليه النبى محمد صلى الله عليه وسلم فى الحديث ده.. قال لا تخبروهن بذلك!

المحاضر: هل يعقل أن يتكلم الرسول صلى الله عليه وسلم بشئ ثم يأمر بالآ يذاع هذا الشئ وهو الذى لا ينطق عن الهوى وأقرب تفسير لهذا الحديث.. انها مداعبة من من الرسول صلى الله عليه وسلم لانه يعرف أن الاطراء والمديح قد يجعل المرأة تغتر بنفسها.. وبالبلدى كده تتدلج اكثر من اللازم على جوزها (يضحك ويصفق)

المحاضر: ودلوقت نقدر نفتح باب الاسئلة..

(٢) بيت فكرة ودلال

(اصوات اطفال تلعب تختلط

بصوت مشهد من مسلسل يا رجال العالم اتخدوا)

فكري: (يفتح باب بيته ويدخل يفاجئ بهذا الضجيج).. ايه الدوشة دى يالى ادخل
جوه منك له

الاطفال: (يصيحون) بابا جه.. بابا جه

فكري: طيب.. طيب.. يلا يا حبايى على اوضتكم وماما فين؟

دلال: (بثقة زائدة) أهلا يا أستاذ فكري

فكري: استاذ كمان (مندهشا) وايه المهرجان اللى فيه البيت.. والبهدة دى.. انا
كأنى دخلت بيت غلط هو حضرتك الست دلال مراتى!

دلال: (بنفس الثقة) ايوه يا أخ فكري.. مالك مندهش ليه؟

فكري: عايزانى اشوف السويقه دى وأخذك بالحضن واقولك الف شكر

دلال: المنظر سىء مش كده؟! (تسأله)

فكري: جداً.. جداً.. جداً

دلال: وباعترف بذلك.. لان حضرتك امبارح قلت لى انا مابعملش حاجة وقاعدة
فى البيت زى عدمى.. فقررت انى ادى نفسى اجازه من كل حاجة.. وخليته
يوم تناحه عالمى.. ودلوقت زى ما انت شايف قاعده اقرا وأخر انسجام

فكري: والمطلوب منى ايه؟

دلال: تقر وتعترف.. أن يوم واحد خلعت فيه ايدي من شغل البيت والعيال..
رجعت لقتنا عشوائيات وفوضى

فكري: طيب يا ستي باعترف

دلال: ادخل سيادتك نام ساعة.. وتعالى تلاقى الحياة اتغيرت ١٨٠ درجة

فكري: انام فين؟.. هو احنا عندنا اوضة نوم

دلال: انت يا حبيبي مش محتاج اكر من سرير ولحاف والحمد لله.. دول لسه
موجودين على قيد الحياة

(٣)

(في الاستوديو.. نورا تراجع مشهداً مع عمر المؤلف)

نورا: (في عصبية) يا استاذ باحاول افهمك أن ارتباطى بيك مستحيل.. انت مش
عايز ست بتحبها.. انت عايز جارية.. تخدمك.. وتعالج مشاكلك وعقدك
النفسيه.. وما تسمعش منها غير حاضر ونعم

عمر: (وهو يؤدى الدور) أنا مش مصدق اللى باسمعه؟

نورا: ياريت تصدق.. انك باسلوبك ده.. مش هتخسرني انا لوحدى.. لكن
هاتخسر كل واحدة ترتبط بيك أو تعرف حقيقة أمرك.. الا اذا كانت مريضة
في عقلها ومشاعرها.. اتفضل دبلتك.. وعن اذنك يا مستبد.. ونصيحة
بلاش تدور على بنت من القرن الواحد والعشرين.. شوف لك واحدة من
العصر الحجري.. سلام

عمر: (يصفق لها معجباً) تصدقي انا نسيت انى كاتب الكلام ده وعشت في الدور
(ثم لحظة صمت) لكن بعيد عن التمثيل.. (يسألها) هو أنا فعلاً انسان

وحش؟

نورا: يا أستاذ مش وقت الكلام ده.. احنا في الاستوديو وعندنا شغل

عمر: انتى بتهربى منى ليه؟

نورا: لانى مش قادره أفهمك يا عمر

عمر: وليه ما تقوليش انك مش قادره تفهمى نفسك!!

نورا: عمر.. عن اذنك

عمر: عارفه انتى عايزة تمشى ليه.. لان كلامى جه على الجرح

شوقى: (وهو يقترب منهما) ايه الحكاية يا اساتذه.. يظهر انى جيت فى وقت غير

مناسب (بطريقه جادة).. (ثم مازحاً) انا ممكن اخلى حد يعمل مزىكا

ناعمه واجيب اتنين لمون

نورا: عاجبك كده يا استاذ عمر

عمر: بيهزر يا نورا.. بيهزر

شوقى: (ساخراً يقلده).. بيهزر يا نورا.. بيهزر.. يالا يا استاذه عندنا مشهد طويل

وعايز تحضير جيد

نورا: مشهد نمرة كام؟!!

شوقى: انا هاعلمك الشغل يا نورا.. يعنى الأوردرد الى حضرتك بتعمله فيه ارقام

المشاهد.. وانتى الى بتشغلينى

نورا: حضرتك بتعملى امتحان يا أستاذ شوقى؟

عمر: يا جماعة ايه الحكاية.. صلوا على النبى

شوقي: عليه الصلاة والسلام (ثم بعد أن يهدأ قليلاً).. نورا أنا أسف.. اعصابى
تعبانه لانى مش نايم من امبارح

نورا: (تبكى متأثره) كتر الف خيرك يا أستاذ شوقي.. أنا هاروح أغسل وشى

(٤)

(صوت أم كلثوم يغنى حيرت قلبى من راديو سيارة أسماء..)

ومعها عفاف بجوارها.. فى الشارع)

عفاف: (متسائلة) ما تقوليلى يا بنتى انتى وخدانى على فين؟

أسماء: هو أنا خاطفاكى.. أنا عايزة اتكلم معاكى.. واكتشفت مكان حلو..
هتتعشى فيه!

عفاف: ايه المناسبة؟

أسماء: (مستغربه) عفاف مالك يا حبيبتى..

عفاف: اصل شكلك عامله لى مفاجأة مش حلوه وأنا مش عايزه اقعد مع شوقي

أسماء: شوقي فى الأستوديو وهيطلع يعمل شغل خارجى فى حديقة الأزهر.. وربنا
معاه

عفاف: عارفه يا أسماء.. انا كنت واخده حكاية الجمعية باستخفاف ومن باب
التسالى مش أكثر

أسماء: اظن انا قلت لك الكلام ده.. وعشان تغيظى شوقي وتقدرى تحولى
مشكلتك الخاصة لمشكلة عامة.. أو بمعنى تانى تستخبنى وراها

عفاف: لكن صدقيني الوضع دلوقت مختلف خاص.. والعمل العام له متعه جميلة
رغم انشغالى بالمسلسل واستفدت كثير من التجربة رغم أن عمرها اسابيع

قليلة

أسماء: واحلى حاجة فيها أن نشاط الجمعية.. هو تقريباً نفس افكار المسلسل

عفاف: تفتكرى لو عملنا ندوة عن المسلسل فى الجمعية الناس ممكن تقول ايه؟

أسماء: هيقولوا بتعمل دعاية لنفسها

عفاف: على رأيك وهما كاتبين على النت الكلام ده من غير حاجة

أسماء: يبقى ضرورى ناخذ بالنأ.. بدل الدعاية ما تبقى ضدنا

عفاف: بس خلى بالك.. شوقى له صحفيين كتير اصحابه وممكن يشحنهم ضدى!

أسماء: ما تبقيش ظنانه وشكاكه للدرجة دى.. بقى هو هيقول لهم هاجموا مراتى!!

عفاف: شوقى اذكى من كده بكثير.. ويقدر يعلمها من غير ما يجيب اسمى خالص

(يرن تليفون أسماء)

أسماء: ده جوزك.. ربنا يستر.. اكيد حصل حاجة فى الاستوديو (ترد عليه) ايوه يا

استاذ شوقى خير!!

(٥)

(عمر.. مع نورا.. فى الاستوديو)

عمر: دلوقت بقتى احسن يا نورا

نورا: الحمد لله

عمر: احنا دلوقت فى البريك ونقدر نتكلم براحتنا

نورا: أنا أسفه يا عمر.. ما عنديش حاجة أقولها

عمر: لا عندك.. ومش هاسيبك الا لما أعرفها واوعى تنسى انى مؤلف.. وأقدر

أقرأ الشخصية اللي قدامى كويس

نورا: طيب لما أنت قريرتنى عايز تسألنى على أيه؟

عمر: بلاش اسألك.. خلىنى أنصحك.. بحق العيش والملح والزماله وأى حاجة
أكون انا حسيت بيها على الأقل من ناحيتى

نورا: تنصحنى بايه؟!

عمر: تبعدى عن شوقى؟

نورا: انت بتقول ايه؟

عمر: باقول مشاعرك بتكشفك مهما حاولتى تدرابها.. عايزه تفسير اكثر من كده؟

نورا: كلامك فيه تلميح سخيف يا عمر؟

عمر: لا يا نورا مش تلميح.. ده تصریح.. انت مش قادره تتخلصى من اعجابك
الفنى والانسانى بالاستاذ شوقى.. واللى عايش جواكى وبلاش تغالطى
نفسك لاكثر من كده

نورا: المره دى مش هامشى واسيبك.. لكن هاقولك بكل وضوح.. انت ممكن
تيجى تقابل ماما وخالى واخويا امتى!!

عمر: آسف يا نورا.. مش هاقدر اقابل اى حد!!

(نهاية الحلقة)

(الحلقة الرابعة عشر)

(١)

(في بيت عفاف اصوات وفك وتركيب واصلاحات)

عفاف: الشقة باظت خالص يا دلال.. والميه غرقت العفش كله

دلال: احمدي ربنا.. أن اسلاك الكهربا كانت بعيدة

عفاف: ويعنى انتى مش كان واجب تبليغينى؟

دلال: يا حبيبتى انا مكتتش هنا الواد ابني ضرسه كان لازم يتخلع.. وأخذته على

الدكتور وفكري حصلنى على هناك ورجعت لقيت الميه طالع من شقتك

ونازله على السلم والبواب ربنا هداه وقفل المحبس العمومى.. لغاية ما

تيجى.. لكن ازاي شوقي هو اللي يبلغك وما يجيش يشوف اللي حصل؟

عفاف: كان عنده شغل ما ينفعش بسببه

دلال: هو مش معاه مساعدين.. وافرضى لا قدر الله تعب.. الدنيا هتقف

عفاف: ما هو انا اللي نسيت الحنفية مفتوحة وضرورى يمسك عليا غلطة.. لانى

مهملة

دلال: وطى صوتك الناس شغالين حواليكى.. وبعدين انا كنت شايفه الاسطى

السباك بيصور بتليفونه

عفاف: انتى متأكده!

دلال: لأنه لما لاحظت انى اخدت بالى.. حط الموبايل فى جييبه

عفاف: يبقى أكيد عايز ينزل الصور دى على النت.. تعالى معايا.. (تتجه إلى حيث يوجد السباك).. يا أسطى لو سمحت

السباك: تحت أمرك يا مدام

عفاف: أنت صورت الشقه بالموبايل

السباك: مين اللي قال كده؟

دلال: انا شفتك:

السباك: (مرتبكاً) وهاصورها ليه.. انا حتى ما أعرفش النت بيدخلوله مين

دلال: اديك وقعت بلسانك ولو سمحت هات الموبايل نشوف الحاجات اللي عليه

السباك: أسف.. الموبايل عليه خصوصيات

عفاف: واللى انت صورته مش خصوصيات برضه.. ولا حياة الفنانين وبيوتهم على المشاع!

دلال: خايف تجيب الموبايل ليه!

عفاف: طيب أنا هااحترم خصوصياتك.. بس لو لقيت صور أو فيديو خاص بشقتى على الفيس أو اليوتيوب أنا هااقدام بلاغ واحبسك

دلال: لا يا عفاف.. انتى تقدمى البلاغ دلوقتى حالاً.. وتأخدى عليه تعهد.. عشان تأمنى نفسك

الأسطى: يا ست عفاف.. مفيش داعى للكلام ده.. الشقة فيها صنايعية غيرى

دلال: لكن انا شفتك انت

عفاف: يبقى الكل لازم يسمع اللي هاقوله.. يا اسطوات لحظة من فضلكم!

(٢)

(على باب العمارة شوقي يلتقى مع فكري)

شوقي: فكري كويس انى لقيتك.. ايه الاخبار فوق؟

فكري: مش كان واجب تيجى بدرى شويه؟

شوقي: ما انت شغال معايا وعارف اننا مأجرين الشقة اللي بنصور فيها بالشئ

الفلانى ومكانش ينفع اسيب مشهد مهم وأمشى

فكري: على العموم اتظمن.. انا لما عرفت اتصلت بالصناعية وهما شغالين فوق..

حتى انا نزلت أجيب لهم سندوتشات زى ما أنت شايف

شوقي: وعفاف فوق؟

فكري: ودلال معاها

شوقي: يبقى بلاش أطلع وأقصر الشر.. والكلام هيبقى فضيحة قدام الصناعية

السباك والنجار والبواب ومراته.. وانا متغاض من الست واهمالها

فكري: طيب تعالى اطلع عندى

شوقي: مش معقول اطلع عندك وما ادخلش الشقة على الأقل ابص على المصيبة

الى حصلت

فكري: معلش يا شوقي انت واخذ المسألة بقلب بارد كده ليه هو مش بيتك

برضه!

شوقي: معنويا بيتى.. لكن ماديا بيت عفاف وهى اللي اهملته

فكري: متبقاش ظالم.. جل من لا يسهو.. يعنى هى عايزه الخساره اللي حصلت..

وأهى فرصة تتصالحوا!!..!!

شوقي: للأسف يا هندسة.. اللي حصل ده هيزود الخلاف بينى وبين عفاف..
(ضاحكا) وبعدين دى عملت جمعية نسائية عشان تحاربنى بشكل غير
مباشر

فكري: ما هو الست دلال معاها.. شفت الهنا اللي احنا فيه

(٣)

(اصوات العمل فى شقة عفاف)

عفاف: ربنا يخليك يا أسطى.. حاول تخلص اللي فى ايدك أنا عندى شغل

الاسطى: حاضر يا ست هانم ربنا يسهل

شوقي: (داخلاً إلى الشقة) سلامو عليكم يا رجاله

اصوات الاسطوات: (ترد التحية) وعليكم السلام ورحمة الله وبركاته

عفاف: (ساخره هامسه) خطوة عزيزة يا استاذ

شوقي: لا عزيزة ولا فهيمة مش وقت الكلام ده.. الناس ماليه الشقه.. ولا انتى

مزاج عندك.. حياتنا تبقى مذاعه بث مباشر

عفاف: مش عايز تعرف ايه الخساير؟

شوقي: قلت لك مش وقته

عفاف: انتى بتكلمنى ازاي قدام العمال بالطريقة دى

شوقي: أنا غلطان اللي جيت (يمشى)

عفاف: ويعنى جيت عملت ايه؟.. تحرق دمي وتمشى.. اعوذ بالله

عامل: (هامساً لزميله) شفت يا عم الاسطى.. مش احنا بس اللي بنتخاتق مع ستاتنا.. ربنا يجملها بالستر

العامل الآخر: خيلنا فى شغلنا.. الجو متكهرب والأعصاب شايطه والست مستعجله

(٤)

(عمر مع أسماء فى مكتبها)

عمر: هو كان شخص عادى.. بيصلى ويصوم زى غالبية الناس وفجأة.. لعبوا ناس فى دماغه.. وساب كل الجوامع وصلاته بقت فى الجامع اللي فيه الشلة دى.. ولما ربا دقته.. مراته قالت وماله.. سنه وربنا يهدى الجميع

أسماء: أسفه للمقاطعه لكن مراته كان وضعها ايه؟

عمر: محجبه.. الحجاب العادى اللي أغلب البنات والستات ماشيين بيه

أسماء: وبعدين حصل ايه؟

عمر: ابتدا يتشدد فى كل شىء.. جلاييه قصيره.. ممنوع التليفزيون.. ممنوع فتح الشباك.. وأمرها بالنقاب وانها تطلع معاه فى صلاة الفجر وهى بتكون هلكانه طول اليوم من شغل البيت والعيال.. ومع ذلك كانت بتصلى فى بيتها

أسماء: لغاية كده.. الموضوع مكرر وشغناه اكثر من مره

عمر: صحيح.. لكن الست مراته رفضت تلبس النقاب وقالت انها محتشمه.. واتضح بعد كده أن عمنا مش مجرد متدين مبالغ فى شئون دينه.. لا عايزها كمان تقاطع جارتها المسيحية ولا تسلم عليها أو تعيد عليها فى أى مناسبة ورفضت.. مد ايده عليها.. لانه فاهم أن من حقه يضربها اذا خرجت عن طوعه.. وانا زم الموقف بينه وبينها.. وطلبت الطلاق لكنه رفض.. واتجوز

عليها

أسماء: ده مسلسل لوحده يا عمر

عمر: لكن موضوع أنا شايفه موجود ومكرر في كل بيت

أسماء: أجمل حاجه.. انك فاتح المسلسل لأي قصه ممكن تصادفها.. لكن ممكن

أسألك عن قصة المؤلف اللي عايش طول عمره لوحده.. وفجأة قرر يودع

حياة العزوية.. لكن رجع في كلامه وقفل الباب

عمر: مش عايز صداع.. وبعدين نورا مش قادره تحدد موقفها بوضوح

أسماء: واذا قلت لك انها عايزاك ومعجبه بيك

عمر: بأماره ايه؟

أسماء: ايه يا عمر.. انت ما اتعاملتش مع بنات وستات قبل كده؟.. مش قالت لك

تعالى في البيت ولا عايزها هي اللي تروح تطلب ايدك من شوقي؟

(٥)

(أصوات همهمات ومحادثات جانبية في جلسة من جلسات الجمعية)

عفاف: لحظة يا حضرات من فضلكم (تدق المائدة بيدها)

: الموضوع اللي هتكلم فيه مهم للغاية

صوت: اتفضلي يا استاذ

عفاف: يظهر أن فيه ناس مش عاجبها نشاط الجمعية.. وأنا شخصياً ابتدت تجيل

رسايل تهديد من أرقام موبايل من اللي في الشارع.. ومش من رقم واحد

صوت: وانا كمان جاللي شتيمه فظيعة.. بحجة اننا اعداء الرجالة وخرابين بيوت

عفاف: معنى كده انه فيه تهديد.. ومش عارفين ممكن يوصل لفين.. وأنا أول خطوة هاعملها بعد اذنكم هاقدم مذكرة رسمية للشرطة.. باسمكم كلكم.. موافقين؟

الأصوات: موافقين!

عفاف: يبقى الندوة اللي جايه هيكون عنوانها «محاكمة الرجل»

(همهمات واندهاش)

عفاف: لحظة من فضلكم.. وخذوا المفاجأة دي اللي اقترح الندوة.. راجل مش أى راجل ده النجم المعروف (عادل فهمي) لانه متحضر وراقى وجتلمان (أصوات متداخله بالاعجاب)

عفاف: والمطلوب من كل واحد مننا تحضر سؤال للاستاذ عادل.. وانا هابعت للفتوات الفضائية تيجي تنقل الندوة.. لانها هتكون حديث البلد كلها صوت (١): (تمس إلى من بجوارها) باقولك ايه يا لوله.. اشمعنى عادل فهمي؟

صوت (٢): بتقولك هو اللي اقترح!!

صوت (١): يعنى منه لنفسه والا هي اللي قالت وهو وافق على طول

صوت (٢): وفيها ايه؟

صوت (١): فيها انه كان خطيبها قبل كده!!

(نهاية الحلقة)

(الحلقة الخامسة عشر)

(١)

(خطوات على الأرض ليلاً في شقة عفاف وقد دخل شوقي بخطوات متحفزة ..
يفتح باب غرفة نومها بشكل مفاجئ ومثير)

عفاف: (وقد هبت من نومها منزعجة خائفة) ايه ده مين اللي داخل على أوضة
نومي بالطريقة دي.. (تبدأ في الصراخ) حرامي

شوقي: (بهدهوء) انا شوقي يا مدام عفاف

عفاف: ودخلت هنا ازاي؟

شوقي: ياه.. نسيتي اني راجل البيت ده.. صحيح الشقة بتاعتك.. لكن العفش
بتاعى.. وبعدين هو انا ممنوع من دخول بيت الزوجية ودلوقتي انورك
النور عشان نعرف نشوف بعض كويس

عفاف: اطفى النور ده.. كفاية الاباجورة

شوقي: انتي عملتي كل اللي عملتيه على الملاء وقدام الناس كلها.. وكان عندك
مبررات خاوية وسخيفه وقلت مسيرها تعقل وتحسب حساب كل خطوة
متهورة.. لكن يظهر مفيش فايده

عفاف: حيلك حيلك.. جاى زى زوار الفجر.. تتسحب عشان تقوللى الكلام
الفارغ ده.. وايه الجديد فيه؟

شوقي: الجديد فيه يا مدام.. تسألني عنه الاستاذ عادل فهمي عارفه مين عادل فهمي

ولا افكرك؟

عفاف: وفيها ايه كان خطيبي من عشرين سنة وما حصلش نصيب.. مش جريمة
لما اجيبه الجمعية يعمل محاضرة

شوقي: لا.. جريمة ازاي.. يا نجمه؟ (ساخراً منها)

عفاف: الراجل جه قدام الناس في الجمعية.. أنا ماكتتش قاعدة معاه في كازينو على
النيل

شوقي: الله اعلم.. قبل المحاضرة كان فيه ايه وبعدها ممكن يكون فيه ايه؟

عفاف: فيه انك لازم تكلمنى بلغة احسن من كده.. يا مخرج يا محترم.. لان
الراجل كان جاي ومعاه مراته

شوقي: وعلى كده.. الست مراته تعرف أنك خطيته الى كان هيموت نفسه
عشانها؟

عفاف: ده موضوع انتهى وكل واحد راح لحاله

شوقي: احنا كمان كل واحد فينا.. لازم يروح لحاله.. لان الحياة معاكى بقت
مستحيله

عفاف: والله بشوقك يا سى شوقي وعلى رأى المثل من باعك بيعه

شوقي: وياترى عارفه هتبيعى بكام؟.. ولا لسه هتحددى السعر؟

(٢)

(موسيقى فرعونية.. في مشهد تمثيلي)

صوت (١): ايها الكاهن العظيم في معبد فرعون بما تنصح هؤلاء الشباب قبل
الاقبال على الزواج

صوت الكاهن: اذا اردت الحكمة فأحب شريكة حياتك.. اعتنى بها ترعى بيتك..
قربها من قلبك فقد جعلها الاله توأماً لحياتك.. زودها بكسوتها.. ووسائل
زينتها وزهورها المفضلة وعطرها المفضل.. وكل ذلك سينعكس على
بيتك ويعطر حياتك ويضيئها

اعمل على سعادتها.. ففى سعادتها سعادتك وسعادة قلبك.. حافظ عليها
مادمت حياً فهى هبة الاله الذى استجاب لدعائك.. فانعم بها عليك
وتقدس النعمة ارضاء للاله

نورا: برفو يا استاذ.. حلو الأداء.. ياريت ندخل فى الجزء الثانى من الحوار بنفس
مستوى الأداء لاننا هنشوط المشهد ده مرة واحدة
صوت (١): تحت أمرك يا أستاذ

نورا: يلا اتفضلوا

صوت (١): وماذا عندك ايضاً ايها الكاهن العظيم

الكاهن: يا ابنى إمرأتك لن تحافظ عليها بالطغيان

الكاهن: اسرها بالحنان.. فالمعاملة الحسنة تفعل اكثر من القوة.. حس بالامها
قبل أن تتألم.. وبجوعها قبل أن تجوع.. انها تعيش فى انفاسك وفى نظرك
وفى جسدك.. انها ام اولادك اذا اسعدتها اسعدتهم وفى رعايتها رعايتهم انها
امانة فى يدك وقلبك فأنت المسئول عنها امام الاله العظيم الذى أقسمت فى
محرابه أن تكون لها أماً وأباً وشريكاً للحياة

(٣)

نورا: يا باشمهندس فكري.. احنا هنصور فى المعبد الفرعونى وعايزين.. المشهد
الجای فى قصر الفرعون

فكري: قدامنا نص ساعة ويكون القصر جاهز.. بس انا عايز اسألك على حاجة؟..

معقول الفراعنه كانوا بيقدسوا الست للدرجة دي؟

نورا: واكثر من كده.. انت مستغرب ليه يا باشمهندس

فكري: مستغرب لان كل الكلام عن الست مفيش كلام فرعونى عن الراجل؟

نورا: فيه طبعا.. بس المسلسل بتاعنا عن المرأة.. وبعدين الكلام ده تسأل فيه

المؤلف

فكري: هاسأله أن شاء الله ويارب ينجح المسلسل والجزء الثانى يكون عن

الراجل.. عن اذنك اشوف الديكور

(٤)

(فى الشارع داخل سيارة شوقي مع عمر.. فجأة يغير اتجاه السيارة بشكل مرعب)

عمر: ايه ده.. انت بتعمل اكروبات يا شوقي

شوقي: بألف عشان ارجع

عمر: احنا ماشيين فى طريقنا مظبوط.. بتلف ليه؟

شوقي: عشان عايز ارواح للمأذون؟

عمر: مأذون ايه دلوقت!

شوقي: مش عارف المأذون اللي بيطلق ويجوز.. أنا لازم أطلق عفاف دلوقت

ورسمى.. وانت هتكون شاهد

عمر: لا يا حبيبي يفتح الله.. الا انا (صوت فرملة السيارة) ايه الفرملة دي..

اتخبطت فى التابلوه!

شوقي: انا وقفت عشان أعرف اكلملك

عمر: تكلمنى فى ايه.. اللى انت عايزه تعمله جنان رسمى

شوقي: ما هو أنا ممكن أطلقها غيايى.. بس أنا عايز الامور تمشى رسمى

عمر: شوقي اعقل وكبر دماغك

شوقي: دماغى من كتر ما كبرتها بقت عامله زى جبل المقطم وعفاف بقى كل

هدفها فى الحياة تغىظنى بأى شكل يعنى هى ضاقت عليها لما تسبب الدنيا

كلها وتستضيف خطيها سابقاً يعمل محاضرة فى الجمعية

عمر: يا سيدى الكلام ده فات عليه سنين

شوقي: حتى لو فات عليه العمر كله.. تصور لو أنا اللى قابلت خطيتى السابقة أو

حييتى القديمة.. ومش صدفة لا.. جبتها تمثل دور معايا.. كانت عفاف

هتسكت؟

عمر: ماهو الوسط الفنى فيه حالات كثيرة زيكم.. وبishtغلوا مع بعض بكل

احترام

شوقي: عارف لو الامور مع عفاف كانت ماشيه بشكل عادى.. انا كنت عديتها..

لكن تروح تعمل جمعية وتلكك عشان تجيب سى عادل بتاعها.. دى قلة

أدب

عمر: طيب ممكن تهدى بالله ونروح نتعشى فى حته.. وبكره يحلها الف حلال..

على الاقل لما تطلقها فى النور تبقى عارف وشايف انت بتعمل ايه؟

شوقي: انت بتهزر يا عمر!؟

عمر: انت اللى بتهزر.. ده طلاق.. عارف ايه طلاق يا متهور

شوقي: كرامتى مجروحه ومش عايز اشوفها تانى

عمر: لا هتشفوها الصبح في الاستوديو ولازم تشوفها

شوقي: طيب ايه رأيك بقى المشاهد اللي هي فيها.. هاخلي نورا تخرجها.. هاعمل الميزانسين بتاعها والديكوباج.. واقعد اتفرج

عمر: دى حرب بقى!

شوقي: ايوه حرب.. وهنشوف مين اللي هيكسبها

(٥)

(اصوات متداخله في الاستوديو اثناء التحضير لمشهد جديد)

نورا: (تعطى تعليماتها باعتبارها مخرجة المشاهد)

هنعيد مشهد الكاهن مرة ثانية بعد اذنك.. هاخذ الحوار من اول كلمة «أن كانت شريكة حياتك مدبره»

الصوت: اوكيه يا استاذ

نورا: سكوت ثرى تو ون

الصوت: أن كانت شريكة حياتك كاملة مدبرة فعاملها بالرفق واللين والاحسان ولا تعاملها بالخشونة والقسوة فالمعاملة الطيبة تقرها من قلبك.. والمعاملة الخشنة تبعتها عنك.. لا تتسرع وانت تجادلها إلى الغضب فذلك يزرع شجرة البغضاء في دارك.. ولا يهدم بيته الا من تجاهل حقوق زوجته ولم يحافظ على عهدا وينسى ما أمره به الاله (F.O) (ثم في غرفة الكترول)

أسماء: استاذ شوقي ممكن لحظة

شوقي: لما المشهد يخلص

أسماء: ماهى نورا شغاله

شوقي: هى الحكايه كده.. طيب اتفضلى (ثم غاضباً وقد ابتعد بها خارجاً).. خير يا
أسماء

أسماء: هى نورا هتخرج المشاهد اللى فيها عفاف

شوقي: كله تحت اشرافى.. وبعدين نورا فاهمه شغلها.. وبعدين أنا هاخذ كاميرا
تانيه.. واطلع اصور خارجى

أسماء: بس عفاف لما عرفت مش موافقه على كده

شوقي: عفاف ممثلة وأنا المسئول عن المسلسل كله.. وأظن حضرتك عارفه كده
كويس

أسماء: ما أنا عشان عارفه كده بارجوك انت تخرج مشاهد عفاف.. وهى تاخذ
الشغل اللى بره

شوقي: انتى كده بتحطى مناخيرك فى شغلى يا مدام أسماء وده اسلوب أنا أرفضه..
أرفضه.. أرفضه

أسماء: وأنا كمان أرفضه.. أرفضه.. أرفضه

شوقي: يبقى خلاص نفضها سيره.. وفركش!

(نهاية الحلقة)

(الحلقة السادسة عشر)

(١)

(عمر يكتب على الكمبيوتر..)

ويقرأ ما يكتبه بطريقة فيها شيء من التمثيل بحيث نسمعه معه)

عمر: «مشهد ٤٥ ليل خارجي» المكان مكتب المأذون الشرعي الزوج مندور يجلس في مواجهة زوجته نرمين أمام المأذون.. الذي ينظر اليهما متوسلاً: يا جماعه ده ابغض الحلال.. الزوج يرد عليه غاضباً: يا أستاذ خلصنا احنا جاين نتطلق مش جاين نسمع محاضرة.. المأذون يرد بلغة هادئه: أنا من مصلحتي يتم الطلاق وهاخذ اتعابي لكن واجبي.. تقاطعه الزوج في عصبية: واجبك دلوقتي تطلقنا واطن عندك شهود جاهزين.. المأذون مستسماً: الأمر لله من قبل ومن بعد.. قول ورايا يا استاذ.. قطع

(يرن جرس تليفونه المحمول.. يرد عليه)

عمر: ايوه يا أمي.. صحتك عامله ايه.. طيب الحمد لله.. جواز ايه يا أمي وانا لسه مخلص مشهد عن الطلاق.. سيك سيك.. (ضاحكاً) انتي عايزه تفرحي.. لكن أنا زعلان.. ايوه زعلان من حياة العزوية.. لكن لما باشوف اللي بيحصل للمتزوجين أصحابي بأزعل اكثر

(٢)

(في الشارع.. وهو يتحدث تليفونياً.. نستمع إلى صوت جرس تليفون عمر الذي يعطى صفارة انشغال الخط ونسمع رسالة مسجلة بالاتصال مرة أخرى)

شوقي: مش ممكن تليفون عمر.. معقول شاغل الخط كل ده.. بيكلم مين؟..
هاطلبه تانى.. (يطلبه ثم نسمع جرس التليفون) ياه أخيراً هايرد حضرته..
(نسمع صوت عمر من خلال التليفون)

صوت عمر: ايوه يا شوقي

شوقي: ايوه ايه.. بقى لك نص ساعة بترغى مع مين؟

صوت عمر: دى أمى كانت بتكلمنى

شوقي: عمر انت لازم تيجى دلوقت حالاً.. فى الكافيه

شوقي: كافيه الحياه حلوه.. بسره يا عمر.. الموضوع مهم جداً.. (يدخل إلى الكافيه.. ونستمع إلى مؤثرات المكان)

شوقي: سلام يا نورا

نورا: أهلاً يا استاذ

شوقي: اتأخرت عليكى

نورا: انا اللي من كتر التوترجيت بدرى

شوقي: شربتى حاجة؟

نورا: النسكافيه قدامى أهه.. بخاره طالع.. زى البخار اللي جوايا

شوقي: ايه يا بنتى مالك؟

نورا: مالى ايه يا استاذ كانت المسألة شوية غيره من مدام عفاف.. دلوقت بقيت شريكه فى أزمة شغل مع مدام أسماء كمان

شوقي: انتى بره الموضوع خالص

نورا: بيتهيا لك.. عشان كده أنا رحت لمدام أسماء وقلت لها اذا كانت معترضه على شغلى.. أنا مستعده أمشى

شوقي: (غاضباً) يا سلام عليكى يا نورا لما تتصرفى من دماغك انتى كده بتصغرينى.. قدامها

نورا: ازاي الكلام ده؟

شوقي: زى ما بقولك

نورا: الناس كلها عارفه أن فيه مشكلة بينك وبين أسماء.. بسببى!

شوقي: المشكلة دى أنا المسئول عنها.. والشغل كله فى المسلسل انا المسئول عنه.. ومن حقى اتصرف زى ما يعجبينى

نورا: ما هو يا استاذ شوقي مش كل حاجة بتعجبك لازم تعجب غيرك!

(٣)

(فى مكتب أسماء)

أسماء: عاجبك كده اللي بيعمله صاحبك

عمر: خايف اتكلم تقولى انى فى صفه لانه صاحبى.. وتنسى انك متتجه غير بتوع اليومين دول لانك وارثه المهنة أباً عن جد.. وعارفه أن العمل مسئولية المخرج.. من الألف إلى الياء.. وبعدين احنا بنعمل مسلسل عن هموم المرأة.. والراجل حب يطبق الكلام عملى.. وخلي المساعدة تخرج لها مشهدين أو بمعنى مطبوط تنفذهم تحت اشرافه

أسماء: والأورد رالى ضربه النهارده؟

عمر: انا سايبه فى البيت نايم زى القليل.. أخذ لطفة برد وعمال ياخذ فى مضاد

حيوى ولمون

أسماء: مشكلته مع عفاف.. هى اللى قلبت الدنيا كلها

عمر: الله ينور عليكى

أسماء: واحنا مش هانقدر نحلها؟!!

(خطوات عفاف تدخل وتشارك فى الحوار مباشرة)

عفاف: مشكلتنا ملهاش غير حل واحد.. الطلاق!

أسماء: يا ستار يارب بلاش عبط واقعدى واستهدى بالله

عفاف: على فكرة.. الاستاذ عمر عارف أن شوقي برضه مصمم على الطلاق.. مش

كده يا استاذ؟

عمر: كده ايه بس.. يا عفاف ده كلام فى ساعة غضب وبعدين حكاية عادل فهمى

زعلته برضه

عفاف: وبعدين يا عمر.. هو أنا عادل قابلته فى كازينو ولا فى شقة واحد صاحبنا..

ده مكان عام قدام الكل.. ومسألة أن كان فيه مشروع خطوبه وانتهى..

امسك له سيف اول ما اشوفه

(يرن تليفون عفاف.. يبدو الارتابك عليها)

أسماء: ايه يا عفاف وشك اتغير.. بصيتى على نمره التليفون وانزعجتى

عفاف (ترد على التليفون بتحفظ) ايوه يا استاذ عادل.. أهلاً وسهلاً.. لا مفيش

ازعاج ولا حاجة.. تحت أمرك.. لا انت بتقول ايه.. ارجوك ما تعملش

كده.. طيب طيب المدام بتاعتك عايزه تشكرنى على ايه؟.. أهلاً يا مدام

(٤)

(في بيت عمر)

شوقي: (ثائراً) وانت برضه يدخل عليك الفيلم الهندي ده يا حضرة المؤلف

عمر: بأقولك أنا سامعها وهي بتكلم مراته.. حتى الراجل كان عايز يكلمك
ويعتذر لك اذا كان بدون قصد اتسبب في اى مشكلة مع عفاف

شوقي: (ساخراً) وبسلامته عرف منين؟

عمر: هو فيه حاجه في الوسط الفني بتستخبي.. وبعدين سيادتك والست عفاف
نازلين تقطيع في بعض.. لغاية دايرة الخلاف ما بقت وسع المحيط

شوقي: عايز تفهمنى أن موضوع سى عادل جه بالصدفه

عمر: يا شوقي كبر دماغك.. والجواز زى ما يقولوا قسمه ونصيب.. واوعى
تنسى أن عفاف اختارت الارتباط بيبك بكامل ارادتها وده حقها طبعاً

شوقي: ممكن تسيبك من كل ده وتكلمنى في الشغل

عمر: تحت أمرك

شوقي: ايه النقط اللي في وثيقة حقوق المرأة.. وما اشتغلناش عليها

عمر: خايف أقولك تزعل (ضاحكاً)

شوقي: ليه بقى؟

عمر: لان منعها من العمل أو حقها في الحفاظ عليه من عناصر العنف ضد المرأة

شوقي: وهو أنا منعها من الشغل؟

عمر: لا.. بس بتضايقها فيه وده يجى تحت بند التحرش كمان التخويف أو

التهديد بالعنف.. بالقول أو الفعل

شوقي: وهى لما تضايقنى فى شغلى يبقى عدل

عمر: الوثائق دايماً بتبص للست على انها العنصر الأضعف

شوقي: أهو ده اللى مش ممكن اوافق عليه

عمر: يبقى كده انت بتعترف أن زيك زيها فى كل حاجة

شوقي: لازم اعترف والا ابقى راجل من القرون الوسطى لكن كل حاجة ليها

حدود.. ولو اشتغلنا فى المسلسل مع الست على طول الخط.. مش هنعمل

دراما لكن هتبقى وصلة نفاق رخيصة والعمل يفشل ميه فى الميه

(٥)

(دلال فى بيتها مع اولادها الصغار تسمع أصواتهم وضحكاتهم)

دلال: اسكت يا واد منك لها واسمعونى كويس الكلام اللى هاقله مهم جداً..

الحكيم الفرعونى زمان قال ايه.. المرأة الجميلة ليست دائماً طيبة.. ولكن

المرأة الطيبة دائماً جميلة (تواصل كلامها بحماس)

:وقال ايه اذا تشككت فى امرأة فلا تتخذ منها شريكة حياتك واذا اتخذتها

شريكة لحياتك فلا تشك فيها.. لا تتكبر ولا تتجبر اذا اقبلت الدنيا عليك

وتنسى بيتك.. لان النعمة تزول.. اذا نسيت أن لك فيها شركاء.. (ثم

تكتشف فجأة أن الأطفال قد انصرفت وانها تكلم نفسها.. وان فكري قد

جاء وجلس امامها) ايه ده العيال العفاريت سابونى ومشيووا.. اكلم نفسى

فكري: (مقلداً صوت طفل).. أنا هنا كلمينى يا ماما.. وعمك الحكيم الفرعونى

قال ايه تانى؟

دلال: قال أن كانت شريكة حياتك كاملة مدبرة زى دلال.. فعاملها بالرفق واللين
والاحسان

فكري: والحكيم الفرعونى.. قال الكلام ده فين؟

دلال: على ورق البردى

فكري: انتى فاهمه غلط يا مدام.. ده كتبه على ورق العنب عشان قال اسمك

دلال: (بلغة قوية) استاذ فكري ده اهانة لا اقبلها لان عصر البهدلة انتهى

فكري: وسيادتك ناويه تعمل ايه؟

دلال: هاعمل شكوى ضدك فى المجلس القومى لحقوق الانسان!!

(نهاية الحلقة)

(الحلقة السابعة عشر)

(١)

(مشهد في محكمة)

شوقي: ثرى.. تو.. ون.. أكشن

صوت رجالي: ايوه قتلها وغسلت عارى.. لان مشيها بطل والناس قالوا الى القاضي: قالوك.. يعنى ايه قالوك.. دى جريمة قتل مع سبق الإصرار.. عارف عقوبتها ايه؟

الرجل: عارف.. اعدام.. ورقبتي سداه.. وبعدين أنا راقبتها ومشيت وراها.. لقيتها قابلت راجل غريب وطلعت معاه شقة.. بس عرف يهرب من ايدى القاضي: وايه رأيك أن الراجل ده جوزها.. وقدم لنا عقد الجواز الرسمي.. تحب تشوفه؟

الرجل: اشوف ايه يا حضرة القاضي.. هو اللي بيزمر بيخبي دقته.. تلاقىها جوازه عرفى بورقه مضروبه

القاضي: احنا اتأكدنا من العقد.. واتضح انه موثق وسليم

الرجل: برضه مش مهم.. وكفاية انى غسلت عارى

القاضي: انت العار نفسه.. لانك اتسببت فى هدم حياتها الزوجية ثلاث مرات.. ولانك مدمن وكنت عايش عاليه عليها.. ومش عايزها تعيش

الرجل: ولا انا عايز اعيش.. يا بيه أنا عار.. على نفسى وعلى أهلى.. اشتقنى يا
حضرة القاضى.. مرة عشان النطاعه اللى أنا عايشها.. ومره عشان اختى
اللى قتلها بدون ذنب.. ومرة عشان اللى زبى لا يمكن يحسبوه على صنف
الرجالة اشتقنى يا بيه.. وخلصنى من عذاب الضمير.. اشتقنى
شوقى: استوب.. برافو يا استاذ.. شكراً ودلوقتى بريك

(٢)

(اصوات نسائية فى جمعية واحدة + واحد.. الأصوات متداخله)

عفاف: لحظة يا حضرات من فضلكم.. الموضوع اللى هاكلمكم فيه خطير.. اظن
لاحظتم.. الحملة الاعلامية ضد نشاط الجمعية وخاصة حملة ضد
التحرش

صوت (١): دى مؤامرة ضد الجمعية بعد نجاحها ولازم نشوف مين اللى وراها
عفاف: مظبوط يا مدام سامية وده اللى هاتكلم فيه

صوت (٢): مش ده برضه يعتبر تحرش ضد حملة التحرش؟

عفاف: مظبوط.. والاتهام اللى موجه لنا.. أن شغلنا فى موضوع التحرش.. هدفه..
نخلى البنات والستات تمشى على راحتها فى الشارع.. وناسيين أن كل
واحدة لها بيت ممكن يراجعها قبل ما تخرج

(١): ده الكلام اللى لازم نوضحه.. وباقتراح نعمل مؤتمر صحفى كبير.. ونقول

عفاف: (تقاطعها) بس قبل ما نقول.. لازم نعرف مين اللى ورا الحملة دى؟

(٢): بدل ما نضيع وقتنا فى معارك جانبية.. احسن رد اننا نكمل شغلنا وضرورى
نركز على جرائم الشرف لانها زادت فى الوقت الأخير

عفاف: برافو يا هناء.. احنا لازم نعمل مجموعة ندوات نقول للناس.. يعنى ايه..
شرف الانسان اللى هو شرف الست وشرف الراجل.. وشرف البلد كلها..
لكن اختصار الشرف فى شئ يخص البنت وحدها.. كلام بصراحة عديم
الشرف

(١): الموضوع ده حساس يا أستاذة.. ولازم نتعامل معاها.. بحرص

عفاف: من غير ما نسخن الحديد للدرجة الانصهار مش هانقدر نتحكم فيه
ونشكله من جديد

(٢): هايل يا استاذة ايوه كده.. احنا لازم يكون عندنا شجاعة المواجهة

عفاف: ولو وصلنا للمرحلة دى.. هنقضى على الكذب وهو ده الداء الفتاك فى
عصرنا

(١): (تمس إلى زميلتها) تفتكرى لما تتصالح مع جوزها.. هتفضل شجاعة
للدرجة دى؟

(٢): اشك.. اشك!!

(٣)

(أصوات فى استوديو التصوير التليفزيونى)

شوقي: اكسسوار.. غير لى المفرش بتاع التراييزه دى.. المفروض انه بيت رجل
أعمال كبير.. مش بيت غلبان

فكري: شوقي لو سمحت عايزك دقيقتين لغاية المشهد ما يجهز

شوقي: ده لازم موضوع مهم

فكري: ايوه

شوقي: قول يا هندسة

فكري: ابن عمى محامى كبير وكنت باتكلم معاه عن احوالى أنا ودلال.. والكلام

جاب بعضه عن الجمعية بتاعة واحدة + واحد

شوقي: (ضاحكاً) ايه عايز يبقى المستشار القانونى بتاعها

فكري: لا.. ده بيفكر يرفع قضية عشان يقفلها بالضبة والمفتاح لانه مش مقتنع

بنشاطها ويعتبره استفزاز لعادات وتقاليد المجتمع

شوقي: وانت جاي تقولى كده.. عشان متخاف مع عفاف؟

فكري: لا جاي أحطك فى الصورة.. ولا نسيت أن الست حرمانا المصون.. عضو

مؤسس فى الجمعية

شوقي: وايه المطلوب منى يا فكري؟

فكري: تدينى الضوء الأخضر

شوقي: يا سيدى خد الطريق الزراعى كله.. بس خلى المحامى قريبك.. يفتح

عينه.. بدل ما يقفل لهم الجمعية.. هما اللى يقفلولوا مكتبه

فكري: ما تخافش عليه الاستاذ مستور الصناديل.. حجة فى القانون

شوقي: ربنا يسترها عليه.. وعلينا!

(٤)

(فى بيت عفاف)

دلال: أخيراً عرفت الخبط جاي مينين؟

عفاف: خبط ايه يا دلال.. أنا عندى استوديو بعد نص ساعة.. ومش عايزه الاستاذ

المخرج يكلمنى كلمة زيادة

دلال: (تمس اليها) أنا سمعت فكري.. بيكلم المحامى قربينا.. ويقول انه اخذ رأى شوقي فى القضية الى هيرفعها على الجمعية عشان يقلها.. وانه موافق

عفاف: يبقى ظنى طلع فى محله.. (ثم بفضول) وقال له ايه بالتفصيل؟

دلال: والاستوديو الى انتى مستعجلى عليه؟

عفاف: خليها تبقى خناقة دبل كريم.. قولى قولى

(٥)

(فى الاستوديو) (اصوات المكان)

شوقي: صوت يا حضرات.. هنصور.. بروفه يا نورا

نورا: (تقمص شخصية إمراة شعبية) يا بيه انا لا أعرف شمالى من يمينى.. والجمعية الوحيدة الى اعرف سكتها هى الجمعية الاستهلاكية الى فيها الفرخة والبيضة والسمن النباتى.. لكن اولاد الحلال.. هما الى دلونى.. وقالوا الى فيه محامين ناس قلوبهم فيها رحمة.. ويقفوا جنب الغلابة.. وانا ست منكسرة ووحدانية.. من يوم ما طلقنى المخفى جوزى وأنا لا يصه بالعيال الأربعة.. بامد ايدى هنا وهناك عشان أجيب لهم اللقمة والمحكمة حبالها طويلة.. ولما اخذت حكم بالنفقة ما عرفتش انفذه.. والجمعية الى فيها الاساتذه صرفت لى قرشين وقامت بالقضية وساعدتنى على المعاش.. وجابولى شوية بسكويت وحلويات آكل منهم بالحلال.. يبقى أنا بعد ده كله.. اروح اخرب فى الجمعية.. واتوالس مع شوية بلطجية عشان نسرقها

صوت وكيل النيابة: خلاص يا ست زهرة.. بتعرفى تمضى

الست: ايوه يا بيه.. أنا خارجه من سنه رابعه

وكيل النيابة: طيب امضى هنا.. واتفضلى روحى

الست: يعنى براءة يا بيه

وكيل النيابة: براءة.. ومع الف سلامة

الست: طيب سايقه عليك النبى يا حضرة وكيل النيابة.. اسأل حضرتك سؤال

وتريحنى

الوكيل: اتفضلى

الست: (تهمس اليه) الا صحيح.. الجمعية اللى بتساعدنى بتاخذ فلوس من بلاد

بره

الوكيل: مين اللى قالك الكلام ده؟

الست: واحدة زى نوبة حالتى.. كانت عايزه فلوس زيادة.. لكن فى الجمعية

عصلجوا معاها.. وسمعتها بتقول الكلام ده

الوكيل: ولو عرفتى أن الفلوس من بلاد بره تاخديها ولا تسيبها

الست: أخذها.. الا اذا كانوا بيدفعوا عشان الأذيه يبقى حد الله بينى وبينها.. ما هى

فلوس عن فلوس تفرق.. لكن احب افهم من حضرتك

الوكيل: يعنى فيه فلوس.. بتيجى عشان تساعدنا فعلاً.. وفلوس بتيجى عشان

تخرب بيوتنا.. بس اطمنى.. احنا بنعرف كل مليم داخل البلد.. رايح فين

وجاى مين؟

(يسألها) ارتحتى دلوقتى؟

الست: بصراحة.. بصراحة.. تعبت اكثر واكثر

(٦)

(في الاستوديو في مكان اخر حيث يعمل فريق «النجارة»)

عفاف: (تنادى على فكري) باشمهندس فكري.. ممكن دقيقة لو سمحت

فكري: اهلاً يا مدام.. ايه رأيك في ديكور مكتبك في المسلسل

عفاف: (مجاملة في برود) تسلم ايدك.. لكن انا مش جايه اتكلم في الديكور

فكري: يبقى فيه موضوع تانى؟

عفاف: وانت عارفه كويس

فكري: (كأنه يجيب على فزوره) حاجة تخصك انت وشوقي؟

عفاف: لا.. حاجة تخصك انت وشوقي والمحامي والجمعية اللي أنا مسكاها

فكري: (مرتبكاً) هي رويتر بلغتك

عفاف: مش رويتر لوحدها.. دي كل وكالات الأنباء وممكن اقولك تفاصيل

المؤامرة على الجمعية.. بالحرف الواحد

(نهاية الحلقة)

(الحلقة الثامنة عشر)

(١)

(في مكتب أسماء)

أسماء: اتفضل استريح يا أستاذ عمر

عمر: وهى الراحه تيجى منين واحنا عايشين على جبهة القتال واللى بنكتبه فى المسلسل واحد على عشرة من اللى احنا فيه

أسماء: ماهو أنا جبتك عشان كده!

عمر: قوليلى أعمل ايه وأنا لا يمكن اتأخر

أسماء: انا ملاحظه فى المشاهد الاخيره انك بدأت تحيز ضد الستات وباين قوى

عمر: وفى المشاهد اللى صورناها قبل كده كنت مع الستات ولا ضدها؟

أسماء: على الأقل كنت محايد

عمر: فيه قاعدة درامية بتقول.. اذا ظهر المؤلف وصوته كان أعلى من الشخصيات اللى بيكتب على لسانها.. يبقى مؤلف فاشل وما اعتقدش انى فاشل قوى للدرجة دى

أسماء: العفو يا استاذ محدش قال كده

عمر: انتى بتقولى .. وبصراحة ده تدخل فى شغلى.. وأنا ما اتعودتش منك على الاسلوب ده ولا انا من المؤلفين بتوع شمال شمال.. يمين يمين

أسماء: طيب ممكن تتفاهم من غير زعل

عمر: أنا لو مزعلتش يبقى ما عنديش دم عن اذنك

أسماء: ارجوك استنى يا أستاذ عمر.. وحاول تفهمنى صح.. جايز ما عرفتش أعبر بطريقة لطيفة

عمر: طيب سمعيني التعبير اللطيف

أسماء: مش معقول نعمل مسلسل نحاول فيه ننصف المرأة.. نقوم نهاجها

عمر: وما حدش هيصدقنى لو عملنا المسلسل كله وصلة نفاق وهجوم غبى على الرجالة كلها.. وكأننا فى جلسة جمعية نسائية

أسماء: (تحاول أن تداعبه) بتقول جمعية نسائية.. وطى صوتك

عمر: وطى صوتى (مستغربًا)

أسماء: مش خايف عفاف تسمعك وتحطك على البلاك ليست زى شوقي وفكري

عمر: لا انا محطوط قبلهم لاسباب حضرتك عرفاها كويس

أسماء: خلاص يا سيدى.. أنا أسفه.. ودلوقت هاكلمك عن مشاعر واحدة ست ممكن تتفرج على المسلسل.. وتأخذ انطباع مش مظبوط

عمر: أن كان كده.. مفيش مانع

(٢)

(خطوات شوقي فى ممر داخل الاستوديو يتحدث وهو يمشى مع نورا)

شوقي: المشهد اللى جاى.. عايز أخذه من اول مره

نورا: بس انت جايب واحده عمرها ما مثلت قبل كده

شوقي: لكن اتعرضت لحادثة اغتصاب فعلاً.. وهى اكثر واحده ممكن تقول للناس أن ابشع من اغتصاب الجسد.. اغتصاب الروح.. وبعدين أنا مش جايها تمثل.. انا جايها تهز الدنيا كلها.. وتقول أن الى اغتصبها مش مجرم واحد البوليس قبض عليه.. لكن مجتمع بأكمله.. أهملها واعتبرها حولة زايد.. المشهد ده هو المسلسل وبلغتنا الدرامية ماستر سين

نورا: انت رعبتنى

شوقي: وانا عايزك تروحي للبنت وتقعدى معاها.. وحاولى تستفزى مشاعرها بكل طريقة.. ووريها صور المجرم الى اغتصبها.. عايزها تدخل الاستوديو وهى مشحونه.. وعندك فيديو على اليوتيوب لمشهد اغتصاب فرجها عليه.. باختصار صحى كل الوجد الى جواها

نورا: دى قسوة.. أنا مش موافقه عليها

شوقي: احنا بنعمل كده عشان ندافع عنها هى واللى زياها

نورا: عارفه لكن ده مش معناه.. المدبوح.. ندبحه مره ثانية.. عشان الناس تعرف ازاي اتدبح؟

شوقي: نورا لو مش مقتنعة باسلوبى فى المشهد ده بلاش تحضرى تصويره.. بما أن اعصابك مرهفه!!

نورا: انا فعلاً اعصابى لا يمكن تتحمل الشغل بالطريقة دى

شوقي: افهم من كده أن ده انسحاب

نورا: وجودى فى تصوير المشهد ده.. يضر ومش هايفيد.. وأحسن لى وللشغل أبعد

شوقي: براحتك

نورا: عن اذنك!

(٣)

(في مكتب أسماء.. عفاف تدخل متحفزة غاضبه)

عفاف: عاجبك اللي بيحصل ده يا أسماء؟

أسماء: وبعدين يا عفاف.. احنا هنمسك لبعض على الواحدة

عفاف: يا أسماء.. انا باتكلم عن جريمة الاستاذ ناوى يعملها باسم الفن والواقعية

أسماء: عرفت بالحكاية.. وعرفت كمان أن نورا رفضت تشتغل في المشهد ده
وشدت معاه

عفاف: شكلك موافقه على اللي عايز يعمله

أسماء: ده اسلوب فنى ممكن يعمل تأثير قوى جداً.. ثم أن البنت موافقه وكاتبه
اقرار على نفسها بكده

عفاف: يا أسماء.. البنت وافقت لما اتعرض عليها مبلغ العشرين ألف جنيه.. دى
ثروة بالنسبة لها لا يمكن ترفضها

أسماء: اطمنى.. شوقي مخرج شاطر.. ومش هياخد كلامها زى ماهو لكن هيلعب
بيه ويحطه في اطار درامى

عفاف: لكن عشان يوصل لكده.. ضاغط عليها نفسياً بطريقة غير انسانية بالمره

أسماء: ما هى ممكن تطلع في برنامج وتقول الكلام ده وحصلت في برامج كثير..
والضحايا بيكونوا عارفين انهم هيتكلموا قدام الملايين.. وبيوافقوا..
وبرامج التوك شو بقت عايشه على الجوده

عفاف: وهو ده اللي لازم نحاربه من خلال الجمعية بتاعتنا

أسماء: يعنى هتهاجى مسلسل انتى بطلته؟

عفاف: انا مش هاهاجم.. أو ادافع.. أنا عايزه اناقش القضية والناس تقول رأيها.. هل اعتراف الضحية على الملائم.. يفيدها ولا يضرها؟ وايه رأى علماء الدين والنفس والاجتماع؟.. واتظمنى مش هاجيب اسم المسلسل نهائياً

أسماء: هاقولك حاجة وماتزعلش منى لانك صاحبتى واكثر من اختى!!

عفاف: قولى براحتك

أسماء: انتى هتتجننى ومش مصدقه نفسك أن شوقى يدلقك بالطريقة دى.. ويتجاهلك وانتى قدام عنيه!

(٤)

المغتصبه: (واحد تمثل دور المغتصبه) فيه ناس كثير اول ما يسمعوا أن واحدة كانت راجعه بالليل فى وقت متأخر على طول وقبل ما يعرفوا ايه الحكاية.. يقولوا ايه اللى خلاها فى الشارع لوقت متأخر.. واكيد كانت لابسه حاجات ملفته للانظار.. ومكياجها باين قوى.. انا باشتغل فى مكتب محامى عشان اصرف على امى واخواتى وفيهم واحد مريض عنده شلل أطفال.. ولبسي هو اللى قدامكم اذا كان خارج احكموا حضراتكم.. وأنا أصلاً ما حبش المكياج الا الكحل وراجعه مهدوده من شغلى لكن المجرمين دول كانوا واخدين برشام ومش فى وعيهم

المغتصبه: والشئ الوحيد اللى طمعهم فىا انى كنت لوحدى.. اما اللى جرى شئ رهيب ما اقدرش احكيه ولا عايزه افكره (تبكى)

شوقى: (من الكنترول) استوب.. انتى لازم تحكى يا مريم

المغتصبه: مش قادره يا استاذ مش قادره (وهى تبكى)

شوقي: ده شغل يا ماما

المغتصبه: انا رجعت فى كلامى وارجوك احترم مشاعرى

شوقي: هو لعب عيال.. استريحى شوية وبعدين نكمل

عمر: (وهو يهمس اليه) شوقي باقولك ايه.. حرام اللى بنعمله فى البنت

شوقي: انت اللى بتقول الكلام ده؟!

عمر: البنت ممكن تنهار مننا

شوقي: (فى ضيق وغيظ) اوف.. هى عفاف لعبت فى دماغك ولا ايه؟

عمر: يا سيدى سيبك من عفاف دلوقتى.. أنا عارف أن المشهد ممكن يقلب

الدنيا.. لكن الرحمة فوق كل شئ

شوقي: أنا هاتصرف فيه بطريقة فنيه.. وواحد شوات لواحدة دوبلير هاقطع بيها

عمر: يعنى هتفضحها اكثر

شوقي: استغفر الله العظيم

عمر: اهدى كده.. وتعالى نفكر سوا ازاي ناخذ افضل نتيجة.. بأقل خسائر انسانية

شوقي: عندى حل

عمر: ايوه كده يا ابو الشوق انت مش هتغلب

شوقي: مش هانور على وشها وهالعب فى التون بتاع الصوت.. وهاخليها تقول

اسم غير اسمها

عمر: وخذ اللقطات بتاعة الدوبلير واشتغل براحتك ولما نقول للناس.. أن

الضحية هى بتكلم بنفسها.. نبقى مش كدابين.. وفى نفس الوقت نحافظ

على مشاعرها

شوقي: خلاص يا عم الرومانسى خلاص

عمر: ودلوقت يا ريت تروح تظمنها وتقول لها الكلمتين دول بنفسك على الأقل
تتكلم براحتها

شوقي: أو كيه نروح لها.. مع أن ده شغل الأخت المساعدته اللي سابتنى وخلعت

نورا: انا ما خلعتش يا استاذ.. وكنت موجوده فى الاستوديو من اول الشغل

شوقي: وسمعتى أنا ها عمل ايه؟

نورا: لا احب اسمع

(صوت رجالي): (صارخاً).. الحق يا استاذ البنت اللي كانت بتصور المشهد

شوقي: مالها

الرجل: هربت وقلبنا عليها الاستوديو مش موجوده!

(نهاية الحلقة)

(الحلقة التاسعة عشر)

(١)

(في الاستوديو وسط أجواء متوترة)

شوقي: ها.. عملتى ايه يا نورا؟!!

نورا: تليفونها خارج نطاق الخدمة

عمر: تكون راحت الحمام؟

نورا: انا دخلت وبصيت وناديت

شوقي: سألتى الأمن بتاع الاستوديو؟

نورا: سألتهم ماحدث شافها

شوقي: اطلبى أسماء.. جازيز تكون فى مكتبها هى كانت عايزه دفعه من الفلوس الى
اتفقنا عليها

عمر: أسماء مش فى مكتبها

شوقي: وبعدين هنتصرف ازاي؟!!

عمر: تصور حاجة تانى لغاية ما نشوف حكايتها ايه؟

نورا: معلش يا أستاذ شوقي.. أنا رأيت أن البنت بدى مش هترجع تانى وواضح أن
كلامك استفزها

شوقي: والفلوس اللي وافقت تاخذها؟!!

عمر: (مفسراً الموقف) وبعد كده خافت ورجعت في كلامها

شوقي: مفيش قدامنا غير اننا نبعت لها مدير الإنتاج على عنوان بيتها.. (ثم يصيح في لغة أمر)

:إنتاج.. عايز مدير الإنتاج بسرعة!

(٢)

(في مطعم من المطاعم)

البنيت المغتصبه: (في خجل وانكسار) أنا أسفه يا استاذة عفاف لكن ماكش قدامى غيرك.. انا مش قادرة اتلايم على اعصابى

عفاف: طيب كملى أكلك وبعدين نفكر هنعمل ايه؟

المغتصبه: وللأسف صرفت القرشين اللى اخدتهم من الأستاذة أسماء وفي نفس الوقت خايفه من الفضايح

عفاف: بس هما عايزين يساعدوكى

المغتصبه: عارفه والله عارفه

عفاف: دلوقت زمانهم بيدوروا عليكى فى الاستوديو ده شغل يا مريم والاستوديو بيتكلف كتير.. وأنا لما اخدتك معايا فى العربية محدش شافك وانتى

خارجة من الاستوديو.. افتكروكى الليسه بتاعتى أو مساعدة شغاله معايا

المغتصبه: عشان كده قفلت الموبايل؟!

عفاف: انتى عقدتى المشكلة اكثر

المغتصبه: يعنى أعمل ايه.. ساعدينى يا استاذة

عفاف: انا هاتصرف.. بس على شرط

المغتصبه: تحت أمرك

عفاف: تسمعي كلامي بالحرف الواحد؟

(٣)

(في الشارع.. كلاكس سيارة عمر

ثم ينادى من داخلها على نورا التي تمشى على الرصيف)

عمر: نورا.. يا نورا.. (كلاكس) دي ماشيه سرحانه على الاخر.. أو جايز فاكراني
حد بيعاكسها

نورا: (مندهشه) عمر.. مش معقول

عمر: تعالي اركبي (تفتح باب السيارة وتدخل)

: امال فين عربيتك؟

نورا: عند الميكانيكى وخرجت من الاستوديو قلت اتمشى شويه بعد الجو
العصبى اللي كنا فيه

عمر: المهم أن المشهد اتعمل بشكل كويس جداً

نورا: بالمناسبة عايزه اسألك.. هو ليه الاستاذ شوقي.. محاولش يشكر مدام
عفاف بعد ما جابت مريم وانقذت الاوردر كله

عمر: انتي فعلاً عايزاهم يتصالحوا

نورا: عمر انت بتقول ايه؟! هو انا خرابة بيوت؟!؟

عمر: يا ست محدش قال كده.. بس المفروض لما انا وانتى نكون مع بعض
نتكلم في حاجة تخصنا

نورا: بقى هى كده؟

عمر: عندك مانع

نورا: عمر.. انت فعلاً مصمم على الجواز.. رغم كل الظروف اللي حكيت لك عليها

عمر: وانا كمان حكيت لك عن كل الظروف.. يبقى خالصين

نورا: ولما انت مستعجل وملهوف كده.. سايب الامور للصدفه ليه؟

عمر: ومين قال لك انها صدفه.. أنا عارف انك جايه بتاكسى.. ومشيت وراكسى.. وانتى دلوقتى جوه التاكس.. يا استاذة نورا.. تقبلى الجواز من السواق

نورا: بس على شرط؟

عمر: ايه هو؟

نورا: تشغل العداد.. عشان كل حاجه تبقى محسوبه صح!

(٤)

(في بيت فكري نستمع إلى أغنية حلو وكداب من خلال عرض سينمائي

بالتلفزيون)

فكري: طيب قاعدة ومنسجمه مع الفيلم وأغنية عبد الحليم قلنا ماشي.. لكن في

نفس الوقت ماسكه كتاب في ايدك هى ايه الحكاية

دلال: انت مش واخذ بالك.. ده مش كتاب

فكري: انا مش شايف عنوانه كويس

دلال: ده الدستور بتاع جمهورية مصر العربية

فكري: ناويه تدخل على عالم السياسة

دلال: وما ادخلش ليه.. انا مش نزلت الانتخابات ووقفت في الطوابير.. وخطيت
صباغى في الحبر الفسفورى اكثر من مره.. بعد الثورة

فكري: حقك يا ست الكل حقك.. ولسه ياما نشوف

دلال: هتشوف يا باشمهندس فكري.. هتشوف

فكري: ده تهديد بقى؟

دلال: (برقه زائده) ما عاش ولا كان يا حبيبي اللي يهددك وأنا على وش الدنيا

فكري: اهو كده الشغل ولا بلاش

دلال: ومع ذلك يا استاذ فكري كلنا سواسيه والمادة ٥١ من الدستور بتقولك
التعذيب بجميع صورته واشكاله جريمة لا تسقط بالتقادم

فكري: (بينه وبين نفسه) منك لله يا عفاف بقى هي دي دلال مراتى بتاعة زمان

دلال: بتقول حاجة يا حبيبي؟

فكري: أه.. عايز أقف في البلكونه واقول بأعلى صوتى باحب الدستور

دلال: ما انت لازم تحبه عشان يحبك.. لان المادة ٥٣ بتقولك المواطنون لى
القانون سواء وهم متساوون فى الحقوق والحريات والواجبات العامة..

عندك اعتراض؟

فكري: على الدستور؟

دلال: على أى حاجة؟

فكري: لا طبعا

دلال: مش حلو.. لازم بيقى لك رأى!

فكري: يا ستى البركه فيكى الرأى رأيك والشوره شورتك

دلال: طيب خلى بالك من العيال أنا نازله احضر اجتمع مهم فى الجمعية

فكري: (صارخاً فيها بكل غلظه وخشونه) نعم يا اختى.. جمعية ايه يا ام جمعية!!

(٥)

(فى مكتب عفاف بجمعية واحدة + واحد)

عفاف: طبعاً انتى بتسألنى نفسك انا جبتك هنا ليه؟

المغتصبه: ما عندكيش فكرة حضرتك أنا مرعوبه قد ايه خصوصاً أن فيه اتنين من

المجرمين اللى اعتدوا على لسه هاربانين.. وواحد منهم بعث لى رسالة

تهديد على الموبايل لو فتحت بقى

عفاف: والاتنين زمايلهم اللى قبضوا عليهم.. ما اخدوش منهم اعترافات؟

المغتصبه: ما عرفش ياست عفاف.. وده اللى مخلىنى مرعوبه لانهم ممكن يكونوا

بيراقبوا كل خطوة واكيد عايزين يخلصوا منى

عفاف: طيب اهدى يا حبيبتى.. انا هاساعدك لغاية ماترجعى تقفى على رجلكى

واحسن من الاول

المغتصبه: انا حياتى كلها اتهدمت.. يا رتنى كنت مت وارتحت بدل العذاب اللى

أنا فيها

عفاف: لما الضحيه تموت مرتين.. والجناة هما اللى يعيشوا ده ظلم وربنا سبحانه

وتعالى اسمه العدل

المغتصبه: ونعم بالله

عفاف: اول حاجه امسكى الفلوس دى.. دول بقية حقا فى شغل المسلسل

المغتصبه: كتر الف خيرك

عفاف: والجمعية هتعمل لك مبلغ تانى.. وانا باقتراح عليكى نجمع الفلوس دى

واللى تقدر نحطه عليها.. ونساعد بيها خطييك عشان تتجوزوا فى اسرع

وقت.. ولا خطييك رجع فى كلامه؟

المغتصبه: لا مارجعش.. بس جايز يغير رأيه لما يلاقى المسألة دخلت فى الجد

عفاف: خليكى واثقه فى ربنا وفى نفسك

المغتصبه: هاجيها منين الثقة يا ست عفاف انا مكسوره

عفاف: عايز اقولك حاجه.. الاغتصاب مش مجرد واحد بيعتدى على واحده

وينهش جسمها.. لا فيه حالات اغتصاب تانية.. الراجل بيغتصب فيها

روح الست وده العن انواع الاغتصاب

المغتصبه: هو نزل منه انواع

عفاف: ايوه اغتصاب الجسم.. واغتصاب المشاعر.. واغتصاب النفس..

واغتصاب المال

المغتصبه: (تبكى) كفايه يا استاذة كفايه

صوت رجالي: (صوت نافذه تفتح) (ثم يصرخ فيها فجأة مع «اكو»).. كفايه.. يا

عين كفايه

المغتصبه: (تصرخ) الحقينى يا ست عفاف.. ده واحد من المجرمين اللى

اغتصبونى!!

(نهاية الحلقة)

(الحلقة العشرون)

(١)

(خطوات في المستشفى داخل ممر بين الحجرات)

أسماء: ها يا عفاف الدكتور قالك ايه؟

عفاف: اداها مسكنات وقالى البنت عندها حالة انهيار عصبى بس الحمد لله احنا نقلناها المستشفى فى الوقت المناسب

أسماء: مسكينه.. عشان كده الهوا لما فتح الشباك اتهايلها أن واحد من المجرمين دخل عليكم ونسيت أن الجمعية فى الدور العاشر

عفاف: انا من صراخها وحالة الفزع اللى جت لها.. كنت هاصدق أن فيه حد فعلاً.. نظ من الشباك

أسماء: ودلوقتى هنعمل ايه؟

عفاف: هنوصى عليها مدير المستشفى ونسيبها نايمة والصبح أن شاء الله نرجع لها

أسماء: الصبح عندك تصوير ولا نسيتى يا نجمه؟

عفاف: هاعدى عليها قبل التصوير.. وبلاش تقولى للبيه المخرج أحسن يجيب كاميرا ويجى يصورها فى المستشفى

أسماء: بلاش مبالغة الراجل عالج الموضوع بمتهى الشياكه وأنا شفت المشاهد هايله.. رغم انى كنت موافقه على وجهة نظره

عفاف: اشبعى يا اختى بنظره ونظرتك

أسماء: بس تعرفى دلوقتى لما شفت المسكينه دى.. حمدت ربنا لان شوقى لو كان صورها بشكل مباشر.. كنت هاشيل المشاهد دى مهما كلفتنى

عفاف: يعنى لو جبتها فى الجمعية تفضفض قدام مجموعة ستات فى اوضه مقفوله.. وتحكى تجربتها عشان نعرف نساعدنا نفسيا واجتماعياً ومادياً.. ممكن نأذى مشاعرها؟

أسماء: استنى لما تخرج من الأزمه اللى هى فيها.. وضرورى هى توافق وتكون مقتنعه

عفاف: الحمد لله انك اقتنعتى أن الحالات دى لا يمكن نعملها فيران تجارب

(٢)

(حفل خطوبة عمر ونورا..)

أغنية يا دبلة الخطوبه مع زغاريد وأجواء الفرح فى قاعة)

عمر: (يهمس اليها) انتى مصدقه أن دى حفلة خطوبتنا؟

نورا: ومش مصدقه ليه هى معجزه

عمر: بالنسبة لى أنا معجزه.. لانك عامله زى البحر.. الواحد يخدعه منظره وهو باصص عليه من الشط.. لكن لما يتزل يلاقى جو تانى

نورا: وانت دلوقتى على الشط ولا نزلت فى قلب البحر؟

عمر: لا نزلت.. بس لحد دلوقت الموج هادى

نورا: انت مش ملاحظ أن الاستاذة عفاف ماجتش لغاية دلوقت رغم أن انا وانت عز مناه اول واحده

عمر: ما تشغيل بالك تيجى وقت ما تيجى.. وبعدين شوقي راخر مش باين
نورا: يجى وقت مايجى.. وبعدين احنا هندور على عفاف وشوقي ووالدتك
مجتش يا عمر

عمر: امى بتمشى بصعوبة.. وهى فرحانه جداً وعائزه تشوفك
نورا: انا دلوقت عرفت انت ليه مش مصدق نفسك؟

(٣)

(عفاف تؤدى مشهداً من الف ليله وليله فى استوديو إذاعى)

عفاف: ولما كانت الليلة السادسة بعد المائة الثالثه.. جلس شهريار يتطلع إلى
جواريه ويواصل السمر والأنس فى لياليه.. وكالمعتاد اطلت شهر زاد..
وبدأت تحاكيه وقررت أن تقلب الآيه.. وان تعملها فى شكل حكايه فماذا
لو أن المرأة كانت هى الأميره.. والرجال امامها وحولها جواريهها
ووظيفتهم أن تسليها وترضيها وان يكونوا بين يديها وتحت قدميها
عفاف: واستشعر شهريار.. أن الحكايه ورائها حكايه.. وانها وسيله خلفها غايه..
وتحركت مشاعر الغضب وفى عينيه اشتعل اللهب.. وصرخ فيها كفايه
ولا بد للقصة من نهاية

المخرج الإذاعى: برافو يا استاذ.. واضح أن ميكرفون الإذاعة كان واحشك
جداً.. زى ما انتى وحشانا كلنا

عفاف: الإذاعة دى بيتى يا استاذ حسونه.. ومهما اشتغلت تليفزيون ومسرح
وسينما لايمكن استغنا عن الإذاعة لانها مدرسة
المخرج: والمدرسة تحب ترحب تانى وتالت بالاستاذ

(٤)

(دلال تتحدث تليفونياً إلى عفاف)

دلال: ايوه يا عفاف.. دى عاشر مرة اطلبك.. تليفونك كان خارج الخدمة.. طيب
يعنى دلوقت خلصتى شغل وتقدرى تسمعيني.. الموضوع مهم جداً يا
عفاف والا اقولك ما تقابليني عندك فى الشقة.. بعد نص ساعة.. ايه.. انتى
فى الشقة.. حالا اكون عندك

(٥)

(فى بيت عفاف)

عفاف: والكلام ده سمعته بنفسك؟

دلال: ايوه.. انا راجعه من الجمعية ساعة ما كلمتك فى التليفون

عفاف: طيب عيذى الكلام من الأول بس بهدوء

دلال: هو أنا هامثل

عفاف: انا عايزاكى تقولى اللى سمعته

دلال: بيقولوا انك انشغلتى عن الجمعية وواخدها تحدى ضد شوقي.. وده ممكن

يورط الجمعية فى موضوعات هى فى غنى عنها.. وكمان يبعتها عن

اهدافها الانسانيه

عفاف: وايه كمان؟

دلال: ناويين يجمعوا توقعات ويعملوا جمعية عمومية ويسحبوا منك الثقة!!

عفاف: هى حصلت

دلال: واللى زاد على كده كان بيتكلموا جنب منى.. وهما عارفين انى هاوصلك كل كلمة.. وانتى عارفه لؤم الستات

عفاف: مش هما دول المجموعة اللي أنا فتحت لهم ابواب الجمعية

دلال: هما وياما حذرتك منهم.. لكن ناويه على ايه؟

عفاف: ولا كآنى سمعت حاجة!

دلال: معقول يا عفاف

عفاف: معقول جداً (بثقة زائدة) لانى لازم أعمل أكبر مؤتمر دولى للدفاع عن المرأة.. وساعتها.. يسحبوا الثقة زى ما هما عايزين.. لان الجمعية ورئيسها هيكونوا حديث المدينة!

(٦)

(مكان على النيل)

شوقي: (بطريقة لطيفه) ويسعدنى باسم نهر النيل العظيم عنوان الحب والبهدلة.. أن ابدأ الاحتفال الخاص الاخوى.. بالعروسة المخرجه نورا والمؤلف الموهوب عمر.. وعلى بركة الله

عمر: دى مفاجأة هايله يا ابو الشوق.. ازاي تبقى قاعد معايا وما اعرفش منك..
الا هنا

شوقي: حلاوتها فى مفاجأتها

نورا: انت كل يوم يا أستاذ شوقي ببيت لنا انك اخ عزيز.. وانسان محترم

شوقي: ما عندكوش فكرة.. انا سعيد بالخطوبة دى ازاي وأهى فرصة اشكر اخويا عمر.. على فترة استضافتى لانى خلاص أخذت شقة وها طلع من هنا

عليها

عمر: معقول يا شوقي

شوقي: عين العقل.. انت لازم توضب الشقة بأسرع ما يمكن.. ما عندناش
خطوبة بتطول يا استاذ

عمر: خليك محضر خير

نورا: ايه يا سى عمر.. هو الجواز مش خير؟

عمر: لا الله الا الله انا قلت كده..

نورا: خلاص سماح

شوقي: لو مش مبسوطين أن الحفلة دى على الضيق.. أنا ممكن اقول جزر ٣
مرات واخليها احتفال جماهيرى حتى شوفوا كده (ينادى) جزر.. يا جزر..
يا جزر (أصوات ضجيج وزغاريد وتصفيق وصفير من فريق عمل
المسلسل كله)

نورا: مش معقول الكاست بتاع المسلسل كله!!

شوقي: وكل واحد وعيلته ودقى يا مزيكا (موسيقى مفرحه)

عمر: (يهمس اليه) مفاجأة مدهشة يا شوقي لكن مش واجب برضه كنت تعزم
عفاف دى بطة المسلسل مهما كان

شوقي: الليلة دى.. كل اوامرك مجابه.. بص قدامك كده

عمر: فعلاً دى عفاف جايه مع أسماء

شوقي: كفاية كلام واخلونا نرقص ونغنى ونهيبص (يهتف سعيداً) مزيكا (وتنطلق
الموسيقى الراقصة)

دلال: (تممس إلى فكري في ركن من الحفل) شايف يا فكري العيال فرحانين قد ايه

احنا من كام شهر مخرجناش

فكري: مش وقت كلام.. افرحى وانتي ساكته

دلال: هاسكت.. بس انت مش ملاحظ حاجة

فكري: ملاحظ أن شوقي عامل بوفيه فخم جداً

دلال: يا أخى مش قصدى على الاكل

فكري: يبقى قصدك على وجود عفاف

دلال: ايوه هى جت مع أسماء.. لكن دول ما سلموش على بعض.. ومفيش ولا

كلمة بينهم

فكري: عشان مش قاعدين جنب بعض زى أنا وانتي

دلال: يعنى مش هيرجعوا سوا على البيت؟

فكري: لا شوقي هيرجع على شقته الجديدة

دلال: بتقول شقته!!

فكري: وفيها ايه.. عيب يبقى عنده شقه

دلال: وحضرتك عملت الديكور بتاعها!!

فكري: واخترت له العفش

دلال: وكل ده فى السر.. واول مرة اعرف منك الكلام ده

فكري: وتعرفيه ليه كل واحد حر فى حياته ولا عايزه تبلغى صحبتك؟

دلال: ما ينفعش لانه بلغها لما عزمها على الحفلة

فكري: باليلة مش فايتہ

دلال: فيه ايه

فكري: نوجه ملكة الإغراء جت.. اكيد عفاف هتضرب كرسى فى الكلوب.. لان
كله الا «نوجه»!!

(نهاية الحلقة)

(الحلقة الواحدة والعشرون)

(١)

(نجاة تغنى فى راديو السيارة التى تقودها أسماء ومعها عفاف)

(صوت نجاة: ايظن انى لعبة فى يديه..)

عفاف: (فى عصبية) عايزه الراديو ده يا أسماء؟!

أسماء: ارجوكى سيبها الاغنية دى باحبها جداً

عفاف: يبقى خلاص اركنى على جنب وأنا انزل أخذ تاكسى

أسماء: أنا عارفه طبعاً ايه اللى حصل لك لما شفتى نوجه

عفاف: المفروض الحفلة دى خاصة بالكاست بتاع المسلسل هى تيجى ليه؟

أسماء: عمر ونورا الوسط الفنى كله عارفهم وطبيعى أن حد فيهم يكون عزمها

عفاف: انتى بتلفى وتدورى ليه يا أسماء.. شوقى هو اللى عامل الحفلة وهو اللى

عازمها عشان يغيظنى لانه كان فيه مشروع جواز بينهم وبين بعض بيردلى

دعوة عادل فهمى.. لكن فيه فرق طبعاً بين عادل.. والبتاعه دى

أسماء: بس انتى متغاظه.. بدليل انك سيبتى الحفله فجأة

عفاف: لانها حركة رخيصه من الاستاذ المخرج وعلى العموم هو باسلوبه ده

بيقطع كل خيط بينى وبينه

أسماء: ولحد امتى؟

عفاف: لحد ما يعرف أن رأسى براسه واذا كان ساعدنى فى شىء انا ساعدته فى اشياء..ولما ارتبطت بيه كان خالى شغل ومجرد مساعد.. وبقي مخرج له اسمه معايا

أسماء: بس هو كمان اداكى فرصة عمرك فى مسلسل «البحث عن بيت».. والجمهور عرفك من خلاله وبقيتى نجمه طبعاً كلامى ممكن يزعلك.. لكن دى الحقيقة

عفاف: (تبكى وقد انهار تماسكها) الحقيقة أن حياتى مع شوقى بقت مستحيله يا أسماء

أسماء: بلاش تكديى على نفسك يا عفاف

أسماء: (تواصل كلامها) انتى بتحبى شوقى وأظن أن شوقى كمان بيحبك (يعلوه صوت أغنية ايظن وكان يصاحبنا فى خلفية المسمع)

(٢)

(على مائدة الطعام فى بيت فكري)

دلال: صاحبك ده طلع ابليس بجذ نكد على الست وخلاها مشيت فى نص الحفلة منه لله

فكري: وهى لما استضافت خطيبها القديم واستعادت الذكريات مكانش منها لله دلال: عادل متجوز وشخصية محترمه ومراته كمان ست كامله.. لكن الغندوره العايقه بتاعته سيرتها على كل لسان وبعدين ايه جابها؟

فكري: على فكرة احنا بناكل

دلال: للدرجة سيرتها تسد النفس.. عندك حق.. بس باقولك ايه يا فكري.. نفسى

اسألك سؤال وتجاوبني بصراحة كأننا اصحاب

فكري: مقدمه طويله يا ترى ايه السؤال؟

دلال: هي ليه النوعيه الملعله المايصه بتلفت نظر الرجاله اكثر من الست الرزينه
المحترمة

فكري: مين قالك كده؟

دلال: عينيكم اللى بحلقت ووسعت اول سلامتها ما شرفت بفستانها مكيف
الهواء وضحكتها اللى زى الزلزال

فكري: يمكن عشان الاسباب اللى قولتيها.. لكن لما يجى الراجل يختار أم اولاده
وشريكة حياته تفكيره بيختلف وبعدين تقدرى تقوليلى الستات كانت
بتبص عليها ليه؟

دلال: عشان تقليعه.. والممنوع مرغوب

فكري: وبعدين دى فنانه وتحب تلفت الأنظار

دلال: وعفاف ايه.. سواقه توك توك ما هي فنانه برضه

فكري: المسقع طعمها حلو بشكل تسلم ايدك

دلال: وانت برضه تسلم ايدك

فكري: على ايه؟

دلال: شقة المنخرج.. الخن الجديد يا هندسه.. اللى انت موضبه على سنجة عشره

فكري: وده يزعلك فى ايه؟

دلال: لان معناه أن رجوعه ل عفاف بقى أصعب من الأول

فكري: وهو يعنى كان هيغلب يبجيب مهندس ديكور غيرى يعمل الشقه
دلال: لكن قولى وحياء ولادك.. هو بجد ناوى يتجوز؟

(٣)

(صوت مذيعة فى التليفزيون.. وعفاف تتابع وتقوم بالتعليق أو رد الفعل)

المذيعة: فى استعراض لصحافة الغد.. نصل إلى صفحة الحوادث بجريدة
الجمهورية ونقرأ منها هذا الخبر فقد أشعل موظف النيران فى زوجته
وطفليه و٤ آخرين من أسرة زوجته بسبب خلافات عائلية

عفاف: يخرب بيت شيطانك

المذيعة: وقد اصيب المجنى عليهم باصابات وحروق متفرقة بالجسم وصلت إلى
٧٠٪ وتم نقلهم إلى المستشفى وتبين قيام الزوج بسكب البنزين فجرا اثناء
نومهم للانتقام من زوجته وأهلها وفر هارباً.. والغريب أن الزوجة عمرها
٧٥ عاماً.. وقد دمرت النيران جميع محتويات الشقة

عفاف: ده اكيد مجنون.. أنا لازم اتصل بالبرنامج وأعمل مداخلة.. (تطلب الرقم)
ابوه مساء الخير.. انا الفنانة عفاف إبراهيم وعائزه اعمل مداخلة من
فضلك.. اوكيه انا معاك على الخط وشكرا على ذوقك

المذيعة: ومعانا مداخلة هاتفيه من الفنانة عفاف إبراهيم.. أهلاً يا أستاذة

عفاف: انا باتكلم بصفتى رئيس جمعية واحدة + واحد

المذيعة: اتفضللى بأى صفة تعجبك

عفاف: اولاً عائزه أعرف الزوج عمره كام سنه؟

المذيعة: ٧٠ سنة

عفاف: يعنى عنده خبرة وحكمة الحياة.. وواضح من عدد الاولاد أن فيه حياه
زوجيه طويله.. وازاى اكتشف فجأة أن حياته مع مراته وعياله مستحيله..
وحتى لو كانت كده يحرقهم.. ده اجرام

المذيعه: ممكن حد يرد على حضرتك ويقولك يجوز الست مستغربه والخلافات
دى تراكم سنين

عفاف: برضه غلط

المذيعه: انتى بتحمليه المسئوليه؟

عفاف: لان الخلاف حتى لو كان فيه تجاوز باللفظ من سب أو شتم.. غير الحرق
والقتل

المذيعه: وايه اللي ممكن الجمعيه تقدمه للاسرة المنكوبه؟

عفاف: ده اللي كنت هاتكلم فيه.. احنا ممكن نشارك فى علاج الاولاد لانهم
ضحايا ملهمش أى ذنب.. وبعدين انا مستغربه

المذيعه: من ايه يا استاذه!

عفاف: ناس مش عايزه تعيش مع بعضها.. ولا طايقه بعضها ما كل واحد يروح
لحاله ويشوف مصلحته بعيد عن الثانى.. لكن يبقى البيت جبهة قتال ده
انتحار بطئ للطرفين

(٤)

(نورا مع عمر فى كافيه)

نورا: ايه رأيك فى كلام عفاف

عمر: كلام كويس

نورا: مش فاهمه انت معاه ولا ضده؟

عمر: آه طبعا لما تبقى الحياة مستحيله.. مفيش مفر من الانفصال لكن مش معنى كده اول ما يحصل خلاف تقول له طلقنى طلقنى

نورا: ولما هو يطلقها من نفسه يبقى كويس؟

عمر: (مستغرباً) هو امتحان يا نورا

نورا: لا يهمنى أعرف وجهات نظرك

عمر: انتى عارفاها كويس

نورا: طيب.. قوللى هنعمل ايه فى مسألة امى واخواتى

عمر: انا ما عنديش مانع طبعا تراعيهم

نورا: وانت طبعا مش هتتاخر انك تساعدنى على كده

عمر: بالتأكيد

نورا: يبقى يعيشوا معانا

عمر: واجيب أمى تعيش معانا بالمره واختى المطلقه وعيالها

نورا: انت بتتريق؟!

عمر: لا.. باتكلم جد لانها حاجة تغيظ.. ده مش هيبقى بيت.. ده بنسيون

نورا: متشكره قوى على ذوقك يا استاذ عمر.. وبعد اذنك انا عايزه أمشى

عمر: (بهدهوء زائد) يا ريت توطى صوتك وتقعدى احنا فى مكان عام.. وبعدين ما

ينفعلش يا نورا.. كل ما اكلمك كلمة تشدى السكينه وتقليبها ضلمه

نورا: طيب ادبنى قعدت ونتكلم فى النور

عمر: انا سامعك

نورا: عمر أنا ما اقدرش استغنى عن أمى واخواتى؟

عمر: انتى اخواتك ربنا يخليهم عايشين مع والدتك.. انا أمى عايشه بطولها لوحدها واختى بتروح لها كل كام يوم.. واللى باطلبه منك مش قلة أصل.. ولا هروب من المسؤولية.. لكن ضرورى يبقى لنا حياتنا الخاصة وهما كمان يعيشوا على راحتهم

نورا: طيب نسكن جنبهم

عمر: هو السكن بمزاجنا.. ومع ذلك ممكن تشوف لهم حاجة قريبة منا.. بحيث تقدرى تبصى عليهم.. وبعدين ما تزعلش احنا لازم نحسم الامور دى قبل الجواز ولو أننا اتكلمنا فيها مراراً وتكراراً.. لكن واضح أن ارتباطك بالست والدتك أقوى من ارتباطك بأى حد تانى

نورا: يا استاذ عمر.. اللى بيحب واحده بجد.. اكيد هايحب أهلها

عمر: يحب أهلها لكن مش هيتجوزهم معاها.. ولا هى مطلوب تتجوز أهله.. وبعدين أنا طول عمري عايش باسلوب معين فى حياتى

نورا: قصدك تقول عايش على راحتك

عمر: د. كلام سخيف أنا لا يمكن أقبه

نورا: ما تقبلوش.. بس هى دى الحقيقة يا استاذ عمر عن اذنك!.. يظهر اننا ملناش نصيب مع بعض!

(نهاية الحلقة)

(الحلقة الثانية والعشرون)

(١)

(مشهد زفة فرح في فيلم عربى قديم.. في مكتب أسماء)

أسماء: شفت فالك بيقول ايه.. مشهد فرح وزفه

عمر: ده على اساس المثل السينمائي اللي بيقول خدوا فالكم من أفلامكم

أسماء: ايوه كده.. أضحك وروق.. وبعدين دى مناوشات بسيطة يا مؤلف

عمر: مؤلف ايه بقى.. أنا وأنا جايلك على هنا.. كنت باضحك لوحدى وأنا سايق

عربيتى

أسماء: من غير سبب؟

عمر: لا طبعا لسبب بسيط قوى.. قاعد أعمل مشاكل في المسلسل واحلها..

وفاشل في معالجة مشكلتى مع نورا

أسماء: انت بتحبها مش كده؟

عمر: امال يعنى عايز اتجوزها تخليص حق

أسماء: يبقى تعمل نفسك ولا كأنك سمعت منها حاجة

عمر: والشرط اللي عاملاه سيف على رقبتي

أسماء: اقولك مفاجأة

عمر: بس ياريت تكون ساره

أسماء: لا ساره جداً.. وده اللي خلانى طلبتك على وجه السرعة

عمر: قولى يا أسماء شوقتينى

أسماء: قبل ما تيجى على طول.. انا كلمت نورا.. وبعدين كلمت والدتها واكتشفت انها رافضه تماماً تسبب بيتها القديم.. وقالت لى بالحرف مش ممكن اكون عزول بين بنتى وجوزها.. ده على اعتبار ما سيحدث أن شاء الله

عمر: امال هى شايله الدنيا على دماغها ليه

أسماء: لان احساسها بالمسئولية زايد عن الحد.. وده شىء يطمئنك على زوجة المستقبل

عمر: ويخوفنى فى نفس الوقت.. لان فيه مبالغه.. انا راجل باحسبها كويس قوي لكن بعد كده سايبها على الله

أسماء: وهى عكسك.. يعنى بتكملوا بعض

عمر: وجايز نقتل بعض!

أسماء: (ضاحكة لتخفف الموقف) وتفتكر مين هيكون القاتل ومين المقتول؟

نورا: (تظهر فجأة) انا المقتوله.. لو عمر سابنى!

(٢)

(عفاف فى مشهد تمثيلى إذاعى من الف ليلة وليلة ٢٠١٥.. بالاستوديو)

عفاف: وبعد سلسلة من المناوشات والشد والجذب والصراعات.. جرت مراسم الزفاف.. فى جو من الائتلاف.. ودخلت العروس إلى بيتها.. وتاج الملكة فوق رأسها.. وفى ذراعها تعلق عريسها وبعلمها.. وبعد ايام من العسل.. وحلاوة الكسل.. يبدو أن فيرس العكننة قد وصل.. واعلن عن وجوده

المشثوم.. وحلقت فوق الرؤوس طيور البوم.. العريس يبرم شنباته..
والعروسه التى هى فاهمه وهارشه حركاته تريد أن تربطه بحبلها وان يكون
كله بكافة مشتملاته تحت امرها.. حتى اندلعت الشرارة.. وارتفعت درجة
الحرارة

صوت المخرج: برافو يا استاذة عفاف

عفاف: انا متشوقه اعرف ايه اللى حصل للعروسين.. وهيروحووا على فين؟ (متأثره
بحوار المسلسل)

صوت المخرج: خيلينا نشوق المستمعين.. وبياتوا على نار مستنيين! (على طريقته
مداعباً ايها)

(٣)

(فى بيت عمر ونورا)

شوقي: الف الف مبروك.. وأظن حلوا كده انتوا ما شاء الله خلصتوا العسل كله

عمر: الله اكبر من عينين زوج عازب زى حضرتك

شوقي: طيب ادينى ركبك عشان اقرصك واحصلك فى جمعتك

نورا: انت بتقول ايه يا استاذ.. الجواز عندنا اتجاه واحد.. وهى مرة واحده زى

الحياة أو الموت.. ولا ايه رأيك يا استاذ عمر؟

عمر: ايوه.. ايوه.. مرة واحده يعنى منها جوازه ومنها جنازة

شوقي: بيهزر.. بيهزر.. اصلى شايف وشك ابتدا يقرب

عمر: انقذتنى يا فتى! (ضاحكاً)

شوقي: وانا خلاص قررت انقذ نفسى.. بس بجد مش هزار

(٤)

(محاضرة في الجمعية.. اصوات وهمهمات فيما قبل بدأ المحاضرة)

عفاف: بسم الله الرحمن الرحيم.. تفتح ندوة الليلة حول الزواج العرفي هل هو وسيلة لحماية المرأة من شبح العنوسة أو وسيلة لذبحها سرأً بعيداً عن أعين القانون .. وهل المرأة تقبله ومتى وكيف ولماذا؟! .. دى اسئلة هنظرها للمناقشة.. لكن بعد الاستماع اولاً إلى محاضرة الشيخ الفاضل.. مرتضى ابو النور من كبار علماء الأزهر.. (تصفيق)

الشيخ: بسم الله والصلاة والسلام على اشرف خلق الله سيدنا واستاذنا ومعلمنا محمد صلى الله عليه وسلم.. نختصر الطريق ونلخص المسألة في قاعدة ميسرة تغنى عن كل الجدل والجدال.. والقاعدة اساسها أن نعرف أسس وعناصر الزواج الشرعى المبارك.. اولاً القبول وثانيها الاتفاق وثالثها الاشهار.. وكلها خطوات تحفظ للمرأة كرامتها وحقوقها

عفاف: يعنى الزواج يبطل اذا تم بغير رضاها

الشيخ: بدون شك

عفاف: والاتفاق

الشيخ: يعنى السكن والمهر والمنقولات والمصاغ من الذهب وخلافه وكلكن يعرفن التفاصيل

عفاف: نجى للاشهار.. هل تكفى شهادة الشاهدين على العقد؟

الشيخ: الشهود اتنين.. لكن الاشهار هو اعلان الزواج.. اللى بتقول عليه الفرح.. وأظن حلم كل بنت تفرح فى الفستان الأبيض

عضوه: واللى بينادوا بتعدد الزوجات؟

الشيخ: لو كان جواز طفاسه وفيه ظلم لواحدة على حساب الثانية يبقى مكروه وهو حلال.. زى الطلاق مباح لكنه ابعض الحلال

عفاف: يعنى ينفع يا مولانا يتجوز عليها وهى ما تعرفش

الشيخ: سامحيني دى نداله.. لان لو عنده سبب يتجوز تانى زى مرض الزوجه أو عدم الانجاب أو أى سبب آخر يبقى ايه الحكمة فى الجواز السرى اللى فيه اهدار لكرامة الزوج والزوجه.. وكفايه أن تم فى الضلمه

عفاف: ياريت الرجالة يسمعوا الكلام ده

الشيخ: ما هى الكاميرات بتصور وهتوصل لهم كل حاجة.. ما تخافيش

عفاف: انا ما اخافش منهم.. لكن اخاف عليهم

الشيخ: هما مين؟

عفاف: الرجالة يا مولانا

الشيخ: (ضاحكاً) امال انا ايه؟

(٥)

(فى احد الأنديه) (عمر ونورا وشوقي)

عمر: ايه رأيك فى الجو الجميل ده

شوقي: يا سيدى كتر خيرك انت والست حرمكم المصونه على الفطار الابيه هنا فى النادى زى اولاد الزوات اللى كنا بنشوفهم فى الأفلام الأبيض والأسود

نورا: على فكرة احنا ما بنعرفش نعيش

عمر: احنا مين؟

نورا: احنا كلنا.. أنا أعرف عامل بسيط بياخد مراته وعياله ويطلعوا كل اسبوع
يقعدوا على الكورنيش وآخر انسجام ويروحوا المشوار الحلوده
بالاتوبيس النهري.. يعنى مش مشكلة فلوس.. لكن فى الاسلوب

عمر: عايزه تفهمك أن هى صاحبة الاقتراح اننا نيجى النادي هنا

نورا: ما تخلونا فى الشغل لغاية النسكافيه ما يجى

شوقي: مراتك عمليه ورومانسيه كمان.. ما شاء الله

نورا: طيب فيه سؤال قبل الشغل.. بحق العيش والملح

شوقي: يبقى عرفته؟

نورا: ايه هو؟

شوقي: انا ناوى اتجوز؟

نورا: انت بتهزر؟

شوقي: لا طبعاً

عمر: وبتقولها كده وش

شوقي: انا رحى قابلت أهل عفاف وبلغتهم اننا فى حالة خلاف ملهاش حل..
ومن مصلحتى ومصلحتها اننا ننفصل بكل احترام.. ونفضل زملاء عشان
خاطر اولادنا

نورا: وعفاف صاحبة الشأن هى احر من يعلم!

شوقي: انا ما احبش الاسلوب ده.. لافيه احترام لشخصى ولا ليها.. ولو أن
الست زودتها اكثر من اللازم وختلنا حكاية على كل قناة واكيد شوفتم
الندوة اللى كانت عملاها مخصوص

عمر: وانت يا شوقي بتحاول تستفزها برضه

شوقي: العند يورث الكفر.. لكن بسرعه باراجع نفسى واحس انى عيل

نورا: والسنت نوجه؟

شوقي: والله دى جت بالصدفه.. وزى الاستاذ عادل ما كان خطيب عفاف.. نوجه

فى يوم من الايام بالنسبة لى كانت مشروع جواز

نورا: لكن مش اى جواز يا استاذ.. دى ملكة الاغراء كله

عمر: نورا كده زياده! (يكلمها فى عصبية)

نورا: هو ايه اللى زياده.. انا باتكلم معاه بعشم فيها ايه؟

شوقي: صلوا على النبى يا عرايس.. هو انا جاى اولعها بينكم ولا ايه؟

عمر: اصلها بتتكلم زى ما تكون.. ولا بلاش

نورا: بلاش ليه يا مؤلف؟!

شوقي: خلاص يا نورا مش عايز يقول حاجه ممكن تضايقك المفروض تشكره

عمر: دى ما بقتش قعدة شغل دى قعدة عكته

نورا: طيب يا عم أنا هاريحك من العكته.. اقعد اشتغل براحتك ولما تعوزنى..

تبقي تيجى تاخذنى من عند والدتى.. بالاذن..!! (تبتعد)

شوقي: نورا.. استنى بس

عمر: سيبك منها.. خليها تمشى!! انا هيكون لى تصرف تانى معاها!!

(نهاية الحلقة)

(الحلقة الثالثة والعشرون)

(١)

(أسماء تقترب من عفاف حيث تحمل اليها القهوة في بيتها)

أسماء: القهوة اللي عمرى ما عملت زيها.. يا ست عفاف

عفاف: بس على الله اكون انا كمان ما شربتش زيها

أسماء: بطلى لماضه.. وأمسكى الفنجان

عفاف: مسكت.. خشى فى الموضوع اللي عملتى لى استدعا عشانه

أسماء: بصراحه رغم اننا قربنا نخلص المسلسل.. لكن خايفه أن المشاكل اللي

بنعيشها تعمل نتيجة عكسية.. يعنى دلوقتى مش عارفه اصالح عمر ونورا..

ولا انتى وشوقى؟

عفاف: لا من باب اولى تصالحي طليقتك

أسماء: طليقتى ايه ده راح اتجوز من اول يوم زى ما يكون كان عايش فى الجحيم

وهيدخل الجنه.. ومع ذلك أنا سألت نفسى بشكل عاقل ومحاييد جداً..

مش جايز اكون انا الغلطانه.. وانا اللي ظلمته

عفاف: ولقيت ايه؟

أسماء: لقيت أن الاستاذ المحترم كان بيعمل كل المشاكل دى لان خلفتى كلها

بنات.. وكان أنا السبب فى كده

عفاف: لسه فيه حد الأيام دى بيفكر بالطريقة دى؟

أسماء: وهاتندھشى اكثر لما تعرفى أن والدته ووالده.. كانوا بيشجعوه على كده

عفاف: جايز لانه من عيله كلها تجار وعندهم فلوس وعائزين وارث يحمل اسم العيله ويشيل المسؤولية

أسماء: وأهلى قالوا لى.. سيبه يتجوز ولما يلاقى الزوجه الجديدة جابت له بنات أو طلعت ملهاش فى الخلفه من أصله.. هيتربى ويعرف أن ده رزق من عند ربنا.. وممكن البنت تبقى بألف راجل

عفاف: انا جوز عمى عنده ورشة موبليا ضخمة فى دمياط.. ولما توفى بناته هما اللى مشغلينها وعلى احسن مستوى وفتحوا فرع جديد فى القاهرة ومعرض بيعوا فيه شغل المصنع

أسماء: طيب سيبك من قرابيك وخلينا فى مشكلة عمر ونورا

عفاف: ومالك متأثره كده.. هى قصة عمر وسلمى

أسماء: مش عاجباكى عمرو وسلمى خلينا فى شوقى وعفاف

عفاف: لا احسن لك تخليكى فى المسلسل وده مجهودنا كلنا احنا تعبنا فيه جداً

أسماء: بقى معقول.. نحل مشاكل غيرنا وأحنا مش عارفين نحل مشاكلنا

عفاف: عادى.. وبعدين احنا لازم ندخل مسابقة دراما ٢٠١٥ وانا واثقه اننا هنكسب الجايزه الاولى

(٢)

(صوت مذيعة فى تليفزيون بيت عمر ونورا)

المذيعة: هذا وقد نجحت رئيسة البرازيل (ديلما سليفيا) فى زيادة معدلات النمو فى بلادها وحل العديد من المشاكل الاقتصادية وحافظت على قوة البرازيل ضمن مجموعة البريكس التى تضم كذلك الصين وروسيا وجنوب افريقيا والهند ومع ذلك هناك اتجاه لمحاكمتها

نورا: (تهلل) ايوه كده ما يجيها الا ستاتها.. يا سلام لو المرأة تحكم العالم هتمشيه
زى السيف

عمر: واحنا بقى نقعد فى البيت نغير البامبرز للعيال

نورا: بتتريق يا سى عمر بدل ما تقول او كيه

عمر: لا اسمعى أنا دقه قديمه.. يعنى انا مع الست انها تتعلم وتشتغل وتنجح..
لكن مش لدرجة انها تبقى راجل بشنبات وهو يحط فى شعره توكة وحلق
فى ودنه

نورا: على فكره بقى انت بتتكلم فى شكليات واظن شباب كتير بيعملوها.. ديل
حصان وتوكة وعقد وانسيال

عمر: ودول بتحسيهم رجاله؟!

نورا: لا رجاله طبعاً

عمر: اللى يتشبه بالنساء ملعون وحديث سيدنا محمد عليه الصلاة والسلام واضح
جداً فى الموضوع ده.. ونفس الشئ بالنسبة للست اللى بتقلد الرجاله

نورا: وايه قولك فى الست اللى بتلاقى نفسها راجل وهى كلها انوثه؟

عمر: تقصدى الست المعيله أو اللى بتصرف على بيتها.. دى غالباً أرملة أو مطلقة

نورا: لا يا مؤلف.. جوزها زى الحيطه وصحته حديد.. وهى اللى بتشتغل وهو
مريح ومستعبط

عمر: طبعاً لا يمكن نحسب النوعية دى على الرجاله حتى لو كان شنبه يقف عليه
الصقر.. وبعدين احنا لازم فى الحلقات الباقية نتكلم عن الموضوع ده..
لانه مهم جداً

نورا: وأنا عندى اكثر من حاله.. يا ريت تشوفها على الطبيعة

عمر: طيب باقولك ايه يا مدام نورا

نورا: تحت أمرك يا استاذ عمر.. (ترد على طريقته)

عمر: ما تيجي نعمل حاجه مجنونه.. بمناسبة مدام واستاذ وجو الرسميات كأننا

اثنين قاعدين فى سوپر جيت

نورا: ولو انها مش ناقصه جنان.. لكن منكم نستفيد

عمر: نفسى نبقى اصحاب

نورا: اصحاب!! امال احنا ايه؟

عمر: احنا زوجين المفروض بيحبوا بعض

نورا: وايه المطلوب؟

عمر: انا هاكون اتنين عمر.. وانتى اتنين نورا.. عمر جوزك.. وعمر صاحبك..

لما تزعلي من الاولانى فضفضى مع الثانى وهو يجيب لك حقك.. وانتى

نفس الشئ.. عمرك سمعتى عن كده

نورا: وانت دلوقت جوزى ولا صاحبى؟

عمر: انا دلوقت المؤلف الدرامى!

(٣)

(كازينو ليلى.. وعازف كمان يؤدى لحنا خلال مشهد يتم تصويره)

عفاف: (تؤدى دورها كممثلها وامامها ممثل) انا مش مصدقه نفسى يا حبيبى.. بعد

عشرين سنه جواز.. اول مرة اخرج معاك ونعيش الجوارومانسى ده.. و..

الممثل: (يقاطعها) طبعاً بتسأل نفسك ايه اللى خلانى أعزمك هنا وبدون مناسبة..

لا عيد جواز ولا ميلاد ولا اى مناسبة تانية

عفاف: بصراحه كنت هاسألك وبعدين رجعت فى كلامى.. وقولت يا بنت كتر
الف خيريه على الجو الجميل ده.. بصرف النظر عن المناسبة.. الا اذا كنت
عاملى مفاجأة

الممثل: هى فعلاً مفاجأة.. لكن للأسف

عفاف: وقعت قلبى يا محمود

الممثل: انا حظيت رأس مال الشركة بتاعتى فى عملية ولكن خسرت ولازم ابيع
اصولها عشان اسدد الالتزامات اللى على والا هادخل السجن

عفاف: يالهوى انت بتقول ايه؟

الممثل: خليكى هاديه احنا فى مكان عام

عفاف: (منفعله) عام ايه وخاص ايه.. وانا كنت فىن من الكارثة دى

الممثل: حاولت اشيلها لوحدى.. وخبيت عنك واتحاملت على نفسى.. لكن
للاسف كل الحلول فشلت

عفاف: أنا معاك حتى لو أكلناها عيش حاف

الممثل: بعد المستوى اللى كنا عايشين فيه

عفاف: المهم نكون مع بعض

الممثل: ومصاريف الولاد ومدارسهم والمستوى اللى اتعودوا عليه

عفاف: خد دهبى وكل المجوهرات اللى عندى.. ما انت اللى جايها

الممثل: فكرت فى كده.. لكن مش هاتقدر تعمل حاجه.. دى يدوب تغطى بعض
مصاريف الولاد.. ومفيش قدامى غير حل واحد

عفاف: اى حل.. أنا موافقه عليه

الممثل: حتى لو كان على حسابك

عفاف: طظ في حساباتى كلها

الممثل: فيه واحدة مليارديره عرضت تدخل معايا شريكه وتسدد ديونى وتخلي

الشركة تقف على رجلها مرة ثانية

عفاف: وافق يا حبيبي مستنى ايه

الممثل: انا وافقت.. بس لازم انتى كمان توافقى

عفاف: موافقه (بحماس)

الممثل: بس عشان تعمل كده.. عايزه تتجوزنى!!

(٤)

(في مكان آخر بالاستوديو.. باستراحة المخرج)

شوقي: لازم اعترف انك عملتى المشهد بطريقة ممتازه

عفاف: اشكرك يا استاذ.. بس كان ممكن تقول الكلام ده قدام الزملا كلهم في

البلاتوه.. لكن هنا بينى وبينك.. فى اوضتك مسألة غريبه شويه.. الا اذا كان

عندك حاجه تانيه عايز تقولها

شوقي: احنا من امتى ما قعدناش مع بعض لوحدنا

عفاف: بصراحه مش فاكهه

شوقي: وانا كمان مش فاكهه.. لكن للضرورة احكام

عفاف: ما تدخل فى الموضوع وتخليك شجاع زى محمود فى المشهد اللى فات

اللى كنت بأمثله من شويه

شوقي: ما هو ده اللى هيحصل مستعجله على رزقك ليه

عفاف: (بذكاء) خلىنى اوفر عليك المسافه الطويله.. يا استاذ شوقي انت جايبنى هنا.. عشان تقولى لازم نفصل عن بعض

شوقي: ولانك عرفتى كده تبقى دى كانت رغبتك انتى كمان

عفاف: انا كنت ساويه الباب موارد قلت جازى تراجع نفسك.. وتعترف بغلطك.. وكنت ناويه اساعدك لو عملتها

شوقي: هو مين اللى غلط فى مين؟

عفاف: سيبك مين غلط ومين المسئول.. واسمعها منى يا استاذ شوقي.. انت لو رجعت فى كلامك وما طلقتنيش.. انا هاطلب الخلع.. لان الحياه بينى وبينك خلاص انتهت إلى غير رجعه!

(نهاية الحلقة)

(الحلقة الرابعة والعشرون)

(١)

(سارينة الاسعاف والشرطة في مشهد خلال التليفزيون في بيت فكري)

دلال: (تصيح في طفل من اطفالها) اطفى الزفت التليفزيون دلوقت .. اعصابى مش مستحمله .. وادخل جوه .. (ثم بعد برهه) ردى بقى يا أسماء على التليفون (ثم بلهفه) ايوه يا أسماء .. الحقينى يا اختى مصيبة وحصلت ومش عارفه أعمل ايه .. هاقولك هاقولك .. البنت ميادة والواد تامر ولاد شوقي وعفاف .. خرجوا ومش عارفه راحوا على فين .. وعفاف وشوقي تليفوناتهم خارج الخدمة .. اكيد عندك فى الاستوديو .. أنا مش عارفه أعمل ايه .. ايوه متأكد .. انا شفتهم من البلكونه واخدين شنطه وخارجين .. طيب .. طيب

(٢)

(فى الاستوديو شوقي يصيح فى عفاف)

شوقي: العيال راحت فين يا نجمة النجوم .. انتى المسئوله

عفاف: بتحدف المسئوليه على .. وهما مش ولادك برضه تقدر تقولى اخر مرة شفتهم امتى؟

عمر: يا جماعة مش وقت الكلام ده .. عايزين نعرف الولاد راحوا فين؟

عفاف: دول ممكن يعملوا فى نفسهم حاجة .. لما عرفوا أن البيه ابوهم هيطلق أمهم .. ويعيش على راحته مع النظام الجديد

شوقي: عمر الله يخليك.. انا دماغى مشلول.. ومش عارف أعمل ايه

عمر: الطباط الى كلمته طمنى أن مفيش بلاغ عندهم لغاية دلوقت بأى حاجه لا
قدر الله

عفاف: احنا مش هنقعد نحكى حواديت هنا.. أنا هاروح الف على كل
المستشفيات

شوقي: انا كلمت اصحابهم محدش شافهم

فكري: دلال قالت انهم خرجوا ومعاهم شنطتهم.. يعنى راحوا هنا ولا هنا.. وان
شاء الله مفيش حاجه وحشه

عفاف: يبقى العيال اتخطفوا وحد هيطلب فديه

شوقي: بطلى شغل الافلام الهابطه خيلنا نفكر

أسماء: (وهى تقترب) الولاد اكيد فى شقة اسكندرية وطبعاً مش هيردوا على
التليفون

عفاف: يبقى نطلع على اسكندريه

(٢)

(فى الطريق داخل سيارة عمر ومعه شوقي.. فيما تركب عفاف مع أسماء)

شوقي: الست عايزه تحملنى المسئوليه لوحدى

عمر: يا شوقي معذوره.. هى أم

شوقي: وانا يعنى لاقى عيالى فى الشارع.. لكن الست دلوقت عايشه فى

الدور ومشغوله بالفن والجمعيه لا.. وعايزه تدخل البرلمان كمان هى..

الست عشان تثبت وجودها.. تتخلى عن دورها الاساسى

عمر: وانت بقى دورك ايه؟.. تجيب لهم فلوس وبس

شوقي: انا كمان مسئول.. لكن الام هى كل حاجه

عمر: كويس أن عفاف راكبه فى عربية أسماء

(صوت السيارات على الطريق)

أسماء: عفاف اللي حصل درس مهم

عفاف: يا أسماء درس ايه دلوقت أنا فى العيال اللي مش عارفه عنهم حاجة

أسماء: ولادك بخير

عفاف: خير ايه وهو فين الخير ده؟ دلوقتي فيه عصابات بتخطف الولاد عشان

تاخذ فديه

أسماء: عيالك كبار ١٨، ١٩ سنة.. يعنى صعب يتخطفوا هما اكيد زعلانين منكم

وعليكم واستخبوا فى حتة عشان ترجعوا لبعض

عفاف: انتى بتتكلمى كأنك عارفه مكان الولاد.. ومش بعيد تكونى انتى اللي مدبره

الفيلم ده كله

أسماء: وايه اللي يخلينا نيجى من القاهرة للاسكندرية على ملا وشنا

عفاف: يا أسماء طمىنى لو عارفه حاجة.. (تليفون عفاف يرن) ده شوقي ومش

عايزه ارد عليه أو اتكلم معاها

أسماء: مش يمكن يكون عنده أخبار

عفاف: (ترد لهوفه بحماس) ايوه يا شوقي عندك أخبار (صوت الطريق..

كفاصل)

(بيت دلال)

(صوت مطاردة سيارات واطلاق نار تأتي من خلال فيلم يعرض تلفزيونيا)
(وقد طلبت أسماء تليفونياً)

دلال: ايوه يا أسماء.. أنا دلال.. لا مش دلال عبد العزيز انا دلال مرات فكري
مهندس الديكور جارة عفاف.. هي جنبك في العربية.. طيب ربنا يخليكى
اسمعينى ومن غير تعليق.. الولاد ما حدش خطفهم ولا هربوا ولا حاجة..
الولاد عندى في الحفظ والصون وأنا اللي فكرت معاهم في كده عشان أهمهم
وأبوهم يرجعوا لبعض.. وحياة ربنا يا ست أسماء ما تجيبى خبر لحد.. الله
يسترك.. انا قصدى خير.. لكن تقولى ايه في الغباوة

(صوت الطريق والسيارات) (ثم من داخل سيارة أسماء)

عفاف: ايه يا أسماء.. مالك اتغيرتى.. المكالمة دى كانت من مين؟

أسماء: ابدأ.. بس احنا لازم نرجع تانى على مصر

عفاف: نرجع ازاي واحنا في الكيلو ١٥٠ يعنى خلاص داخلين على اسكندريه

أسماء: اللي احنا عايزينهم مش في اسكندريه (في ثقه وهدوء)

عفاف: اهدى يا أسماء وادى اشارة يمين واركنى

أسماء: اركن ازاي في الطريق السريع

عفاف: انت اكيد عندك أخبار من المكالمة اللي جت لك

أسماء: خلىنا نطلب شوقي وعمر عشان يعملوا حسابهم ويرجعوا معانا لانهم

قدامنا

(صوت الطريق)

عمر: انا مش فاهم حاجة

شوقي: لف وارجع.. المهم نلاقى العيال احنا مش رايعين اسكندريه نتفصح

عمر: لكن اשמعنى أسماء هى اللى جه لها الخير

شوقي: وكمان ما قالتش مين اللى كلمها؟

عمر: على العموم احنا قربنا نوصل لهم وهنعرف كل حاجة (صوت الطريق)

(بيت فكري)

فكري: انتى اكيد مجنونه رسمى

دلal: وطى صوتك العيال جوه.. وخلينا نكمل خطتنا

فكري: خطة ايه.. اللى تودى الناس اسكندريه وترجعهم على ملا وشهم

دلal: مش بيقولوا الغاية تبرر الوسيله

فكري: وافرض أن اللى عملته خلاهم ركبوا دماغهم.. وانفصلوا رسمى

دلal: دلوقت مستحيل.. وبعدين يا سيدى استنى وشوف مراتك الساذجه

هتصرف ازاي!

(٣)

(الشارع.. امام الجمعية)

صوت شاب: انتى متأكده يا بت أن هى دى المدعوقه الجمعية

المغتصبه: ايوه هى

شاب: والوليه رئيسة الجمعية هتلاقيها فوق

المغتصبه: وانا ايش عرفنى

الشاب: طيب نزل النقاب على وشك وخلينا نطلع على فوق.. اعاين المطرح على الطبعه.. وزى ما فطمتك.. انا اخوكى وانتى عندك مشكلة مع طليقتك..
مش هما برضه بيساعدوا النسوان فى الحاجات دى

المغتصبه: ايوه

الشاب: طممتى قلبى.. كنت خايف الجمعيه دى ولمؤاخذه شغلها بس فى الفضايح.. واخده لى بالك من الفضايح

المغتصبه: ما قلت لك قبل كده.. الجمعيه والست بتاعها ملهوش اى ذنب.. دى كانت عايزه تساعدنى بأى طريقه

الشاب: (ساخراً) تساعدك عشان تمشى فى الطريق البطلال ياست ابوها!!

المغتصبه: ابوس ايدك بلاش تأذى الست عفاف دى طيبه قوى

الشاب: تهمك قوى الست

المغتصب: ايوه

الشاب: تبقى تدفعلى ٥٠ الف جنيه وأنا انفض لها مش كده وبس أنا ممكن أعمل لها عرض خاص يعنى تدفع الكاش.. واسلمك ليها ببلاش.. ايه رأيك يا أموره.. يلا فوتى قدامى

(٤)

(فى بيت فكري مع دلال وعفاف وأسماء وعمر)

عفاف: (تبكى وتضحك فى أن واحد) مش عارفه أقولك ايه دلال!؟

دلال: تقوليلى شكرا

شوقى: (فى عصبيه) شكراً على ايه.. خلتينا نلف حوالياه نفسنا.. وانت عامله

المقلب السخيف ده

أسماء: لا يا شوقي ده مش مقلب ده درس.. لنا كلنا احنا بنغلط ونعند وعيالنا
للأسف هما اللي بيدفعوا الثمن

عمر: اسمحيلي يا مدام دلال كمؤلف ارفع لك القبعه.. لانك رسمتها صح جداً

فكري: يا استاذ عمر مش وقت تحيات وتشكرات.. المهم النتيجة

أسماء: ايوه المهم النتيجة.. قلت ايه يا استاذ شوقي وانتي يا ست عفاف

شوقي: (متردداً) انا مستعد ارجع عشان خاطر الولاد لكن بشرط.. نعيش في شقتي
الجديدة

عفاف: أنا موافقه لكن برضه بشرط

أسماء: وده وقت شروط يا عفاف

عفاف: وفيها ايه شرط قدام شرط وزى ما بيقولوا المساواة في الشرط عدل

شوقي: شرطك ايه يا مدام

عفاف: تكتب الشقة الجديدة باسمي!!

(نهاية الحلقة)

(الحلقة الخامسة والعشرون)

(١)

(في مكتب المحامى الاستاذ سعيد مع شوقي)

شوقي: وبعد ما سمعت الحكاية كلها يا استاذ سعيد.. ايه رأيك؟

المحامى: عايزنى أجابوك كمحامى بيكلم موكله.. ولا كصديق بيكلم صاحبه
زميل الدراسة؟

شوقي: يا سيدى كلمنى زى ما يعجبك

المحامى: انت طبعاً صعبان عليك تصرف حوالى (٢) مليون جنيه على الشقة وفي
الآخر تتنازل عنها للمدام وتكتبها باسمها

شوقي: لا.. وبتشترط علىّ يا كده يا مفيش صلح

المحامى: المفروض انت تعرف اكثر منى يا ابو الشوق.. أن ده دلع.. والسـت
عفاف عايزه تشوف معزتها عندك قد ايه؟

شوقي: يعنى لو قلت لا ابقى باكرها.. وبعدين يا سيدى.. ياما رجاله جابوا
قصور وفيلات لستات كل اللي يربطهم ببعض سهرات ومزاج وبعد ما
يزهق يسيب لها الجمل بما حل

المحامى: لكن انت عشان ارتباطك بـ عفاف مقدس وفيه بيت وأولاد بتبص على
الموضوع بعين تانيه خالص

شوقي: يا سعيد يا خويا سيبك دلوقت من العيون والاولميت وخلينا في موضوعنا

المحامى: انا باكلمك فى صميم الموضوع.. وحق ربنا أن الشقة بتاعت الزوجة حتى لو كانت مكتوبه باسم الزوج

شوقي: احنا عيالنا كبار يعنى مفيش حضانه

المحامى: والكبار دول هتاخذهم ياسى شوقي وتقعد بيهم على القهوة.. انت طول عمرك عاقل وحقانى

شوقي: لكن عفاف عندها شقة

المحامى: بتاعتها وهى مش ملزمة توفر شقة للزوجية

شوقي: لانها رفضت تقعد فى شقتى القديمة بحجة انها صغيرة ومتطوحه بعيد عن اماكن شغلنا

المحامى: حقها

شوقي: انت معايا ولا معاها؟

المحامى: يا شوقي احنا اصحاب قبل كل حاجة وبعد كل حاجة.. والحق أحق أن يتبع

شوقي: يعنى اكتب لها الشقة باسمها

المحامى: الحقيقة شقتها وشقتك والهدوم اللى عليك واللى عليها لا اولادكم.. اللى قدروا يرجعوكم لبعض بعد كل اللى جرى

(٢)

(عفاف فى قسم الشرطة)

الضابط: والبلاغ ده يا استاذة عفاف بتتهمى فيه أى حد بعينه؟

عفاف: لا.. بس انا جاتلى تهديدات بقتلى و حرق الجمعية.. بحجة اننا بنخلى الستات تتمرّد على حياتها.. واحنا بنساعدهم يحلو مشاكلهم الى ملهاش اول ولا اخر.. الى جوزها مدمن وعايذها تشتغل وتصرف على مزاجه.. واللى عايذ يمشيها فى سكة الانحراف وياخذ الفلوس.. واللى راميهها فى البيت لا قرش ولا يحزنون هى وعيالها ويقول لها اتصرفى واللى سايبها متعلقه لا متجوزه ولا مطلقه

الضابط: كان الله فى العون

عفاف: وانا فى البلاغ طالبه حمايتى أنا والجمعية

الضابط: تعيين حراسه مخصوص مسألة صعبه شوية لكن احنا هنراقب المكان كويس بطريقتنا.. وارجو كى تدينا ارقام التليفونات الى جت لك منها التهديدات ولو انها دايماً ارقام من الشارع اصحابها بيستخدموها مرة أو اتنين ويرموها بعد كده (فتره) وتم اغلاق المحضر فى ساعته وتاريخه.. عندك اقوال أخرى

عفاف: لا شكراً

(٣)

(أسماء فى مكتبها تخاطب شوقى تليفونياً)

أسماء: يا استاذ شوقى انت فىن؟.. الموضوع مستعجل جداً

أسماء: كويس قوى انك على الباب تعالى

(خطوات شوقى يدخل ويقترّب من مكتبها)

شوقى: خير يا ستى ادينى جيت على ملا وشى

أسماء: دلوقتى فيه قناة فضائية كبيرة بعد ما اتفقت معايا تشتري المسلسل حصرى

وبسعر كويس جداً.. رجعت في كلامها

شوقي: ليه؟

أسماء: مدير المحطة يا سيدى راجل عقله راكب شمال ومتعقد ويقول انه شاف بعض حلقات وان المسلسل منحاز للستات بمناسبة وبدون مناسبة.. ويا اما نعمل تعديلات ونحذف بعض مشاهد صورناها ونضيف مشاهد جديدة على مزاجه والا يفسخ العقد وياخد العربون اللى دفعه

شوقي: والعقد فيه شرط جزائى

أسماء: انا ما باحبش حكاية الشرط الجزائى وهو كمان.. (فترة)

وبعدين ما طلبش نخطها فى العقد والمحامى قال خلاص مفيش داعى..
فأنت ايه رأيك؟

شوقي: اللى بيطلبه ده مستحيل

أسماء: ومستحيل هالاقى بيعه للمسلسل بالسعر اللى كان عارضه

شوقي: أى لعب فى المسلسل معناه أن احنا اشتغلنا فى موضوع احنا مش مؤمنين
بيه

أسماء: طيب خلى الكلام ده بينى وبينك وبلاش عمر ياخد بيه خبر.. لانه ممكن
يقلب الدنيا

شوقي: معلوم.. معلوم وأى مؤلف بيحترم شغله لازم يعمل كده

أسماء: المهم هتصرف ازاي دلوقتي؟

شوقي: هو عاوز تعديلات فى ايه بالظبط؟

أسماء: فى مشاهد كتير وقال انه مستعد يدفع تكلفة تصويرها

شوقي: كده احنا لازم نشك في المحطة وصاحبها

أسماء: ده عايز نعمل كام مشهد لواحدة منقبة بتشتغل داعية

شوقي: انا شخصياً ما عنديش مشكلة مع المحجبة أو المنقبة لكن المهم.. دورها
هيكون ايه في المسلسل

أسماء: بيقولك ما هي نموذج موجود في الحياة ليه نتجاهله

شوقي: بس كده هيدخلنا في أشكال تميز ملهاش محل من الإعراب

أسماء: ده مديني مهلة ٤٨ ساعة والا ياخذ فلوسه.. هنعمل ايه يا شوقي.. دبرنى
الله يخليك

(٤)

(بيت فكري.. اصوات متداخله لعدد من أقاربهم رجال ونساء وأطفال)

دلال: (تمس اليه وتبتعد به عن مصدر الضجيج) فكري تعالى لحظة.. عايزاك

فكري: يا دلال ما يصحش اسيب الضيوف واتوشوش انا وانتى

دلال: عايز اقولك حاجة بينى وبينك

فكري: ايه الحرب العالمية قامت؟

دلال: هتقوم

فكري: يا ساتر.. عايزه ايه؟

دلال: هما قرابيك دول وأولادهم ناويين يقعدوا هنا قد ايه؟

فكري: يعنى معقول اسألهم هتمشوا امتى؟

دلال: لازم نعمل حسابنا على أكلهم وشربهم وخدمتهم وهيناموا فين؟

فكري: في اوضة العيال والصالون وفي المطبخ لو عايزه

دلال: انت بتهزر؟

فكري: ما هي حاجة تفور الدم.. ايه بلاش اولاد عمتي وخالتي يزورنا؟

دلال: دول في عين العدو نص دسته غير العيال

فكري: اسمعى يا مدام.. دول أهلى ولازم اشيلهم على كفوف الراحه على قد ما يقعدوا

دلال: يا سلام.. ومين الخدامه الاتوماتيكي اللى هتقدر على مطالب الهلمه دى كلها

فكري: يعنى أخذهم اروح بيهم عند الجيران ولا أحجز لهم في فندق؟

دلال: انت من أول ما اتجوزنا مانعنى ازور أهلى ولا حد منهم يزورنى

فكري: منعتهم بأماره ايه

دلال: بأماره معاملتك الزفت ليهم وبعدين الناس عندها دم وبتحس

فكري: (يهددها هامساً) احفظى ادبك اتنى كده بتغلطى في أهلى

دلال: طيب يا سيدى مش هاغلط.. لكن هاتصرف ازاي؟

فكري: أن كان على الاكل.. هنطلبه جاهز

دلال: وان كان على النومه؟

فكري: الرجاله في حته والستات في حته.. وبطفى زن بقى الناس ابتدت تلاحظ أن

الجو مش حلو.. وانا خلاص رصيد الصبر اللى عندى نفذ والبطاريات

فضيت

دلال: ما تخافش أنا هاشحنها.. لكن بطريقتي

فكري: (بينه وبين نفسه) منك لله يا عفاف يا بنت مش عارف ايه؟

دلال: بتقول حاجه يا هندسه؟

فكري: عايزين شاي

دلال: اديهم كل واحد اتنين جنيه ينزلوا يشربوا على القهوة

(٥)

(في بيت عمر المؤلف مع زوجته نورا)

نورا: (تصفق في حماس) برافو يا استاذ عمر.. برافو

عمر: (مندهشاً) فيه ايه يا نورا.. ده وقت هزار

نورا: لا طبعاً.. ده وقت اكتشاف عمر حببي الجتل مان المؤلف اللي لا يمكن

يكتب حاجة.. الا اذا كان مقتنع بيها

عمر: ومع ذلك لازم نعرف اننا قدام مشكلة بتهدد مشروع المسلسل كله

نورا: يعنى هتغير المشاهد اللي بيقلوا عليها

عمر: ابقى كداب لو عملت كده

نورا: وأسماء اللي صرفت على المسلسل

عمر: ما هي دي المعضله؟ اللي مش لاقين لها حل

نورا: لا يا استاذ عمر.. الحل موجود

عمر: هو فين وعند مين؟

نورا: قدام عينك

عمر: يبقى الحل عندك.. ومستنيه ايه؟

نورا: اطلب أسماء على التليفون

عمر: ونطلبها ليه ما ننزل نروح لها بس اعرف الاول هنحل المشكله ازاي

(جرس التليفون يرن عمر يرد على عفاف)

عمر: ايوه يا عفاف.. ايه مالك بتعيطى ليه.. مالها أسماء.. فى المستشفى.. يا ساتر
يارب!

(نهاية الحلقة)

(الحلقة السادسة والعشرون)

(١)

(في المستشفى وقد انفردت عفاف بأسماء التي تبكى متأثرة)

عفاف: ارجوكى يا أسماء بطلى عياط بقى عايزه افهم منك ايه اللى حصل.. وادينا لوحدنا اتكلمى بقى

أسماء: أقولك ايه يا عفاف انا بيتى اتخرب

عفاف: يا ساتر يارب للدرجة دى

أسماء: زى ما يكون فيه حد متربص بالمسلسل.. وكان مستنى لما قربنا نخلص وضرب ضربته

عفاف: هو فيه حاجة حصلت جديدة

أسماء: بعد المحطة اللى حبت تفسخ العقد الحصرى معايا.. محطة تانية رجعت فى كلامها.. بس كانت عامله معايا شرط جزائى

عفاف: ودفعوه لان هما اللى طلبوا فسخ العقد!؟

أسماء: العجيبة انهم دفعوا بكل بساطة.. يعنى اللعبة مكشوفه وواضح.. عايزين يدمروا المسلسل قبل ظهوره

عفاف: كلامك مظبوط

أسماء: عشان كده ما أقدرتش اتحمل الصدمه وحصل اللى حصل

عفاف: أسماء.. المسألة بقت زى الشمس.. واحنا لو خايفين على مجهودنا
وشغلنا ضرورى ندافع عن المسلسل بكل طريقة

أسماء: هنعمل ايه يا عفاف خليكى واقعية

عفاف: هنخليها قضية رأى عام وسيبى الحكاية دى علينا!!

(٢)

(اجتماع لأسرة المسلسل.. أصوات مختلفة)

شوقي: يا جماعة من فضلكم.. احنا جاينين النهارده عشان عندنا مشكلة لازم
نواجهها بكل صراحة

عمر: بعد اذن الاستاذ شوقي انا اتأكدت أن فيه جهات معينة مش عايزه المسلسل
يطلع للنور.. لانها ضد رسالته على طول الخط

نورا: يا استاذ شوقي ويا زملائى الأعراء.. انتم عارفين أن فيه ناس ضد المرأة
وحقوقها مهما قالوا غير كده

صوت رجالي: يا جماعة ده مسلسل.. هتعملوها حرب ليه ولا هى تليكيه عشان
نوزع الاتهامات على الناس بالباطل

عمر: ايه اللي بتقوله ده يا همدى.. وبعدين ما انت ميولك معروفه ومفيش داعى
نتكلم قدام الزملا

الصوت: لا يا حضرة المؤلف.. اذا كنت بتلمح على انى متجاوز تلاته ده شرع
ربنا.. عايزين تمنعوه امنعوه وحاربوا ربنا.. وبعدين ترجعوا تزعلوا لما
تلاقوا أن فيه ناس رافضه افكاركم وبتدافع عن الدين

شوقي: اظن كلامك ده اكبر دليل على أن اللي بيحصل للمسلسل مؤامرة متعمدة

الصوت: ما تخليك دوغرى يا استاذ شوقي وتقول أن كلامك ده سببه انى ملتحتى
وزوجاتي منقبات

شوقي: انا ماليش دخل بدقنك وزوجاتك.. وبعدين انت مش اول مرة تشتغل
معايا

الصوت: بس يظهر انها بقت موضه الهجوم على الملتزمين
عمر: يا حمدي بلاش تدخلنا فى متاهات.. وبعدين لو انت مش مقتنع باللى بنعمله..
بتشتغل معنا ليه انت راجل صنايعى كهربائى شاطر

الصوت: انا لمؤاخذه اشتغل فى الحته اللى تعجبني
شوقي: خلاص يا عمر خلاص.. خرينا فى مشكلتنا.. (فترة) اسمعوا يا جماعة..
الشغل اللى عملناه فى خطر ومجهودنا كله معرض للضياع.. عندكم
استعداد تدافعوا عنه؟!

اصوات مختلفه: ايوه.. ايوه

شوقي: يبقى اول خطوة نعملها.. نقدم شكوى لاتحاد النقابات الفنيه.. ولازم
وزارة الثقافة يكون لها رأى فى الموضوع

نورا: احنا نعمل اجتماع لاصحاب القنوات الفضائية كلهم ونصعد المشكله..
لأعلى مستوى

عمر: احنا عايزين نلم مش نوسع

نورا: توسيع الموضوع مهم جداً.. عشان صوتنا يوصل لكل القنوات
والمؤسسات.. ويستفز الجميع وساعاتها بدل القناة اللى انسحبت هنلاقى
عشره.. وبسر أعلى.. لان المسلسل هيقى حدث تاريخى الدنيا كلها
بتكلم عنه

شوقي: معنى كده انا هنوقف الشغل

عمر: احنا كلنا نأجل الفلوس اللي لينا عند أسماء لغاية ما نحل المشكلة وده هيقوى ضمورها وهي بتتفاوض مع القنوات.. اظن كلكم موافقين على كده

اصوات مختلفه: نوافق.. ايوه.. معاكم

الصوت الرجالي: يعنى محدش سألنى عن رأيي

شوقي: اتفضل يا استاذ حمدي ولو أن رأيك معروف مقدما

الصوت: انا ما عنديش مانع انا كمان أأجل الفلوس بتاعتى لكن رأيي في المسلسل مش هيتغير!

(٣)

(صوت اصابع أسماء تستخدم الكمبيوتر)

عفاف: (تصيح في هلع) انا مش قادره أصدق يا أسماء اللي انا شايفاه على النت.. دى أخبار كلها كذب عن الجمعية

أسماء: عارفه يا عفاف عارفه

عفاف: دول بيقول أن الجمعية بتعمل عمليات اجهاض مجانا عشان تشجع البنات على الغلط وانتي عارفه انا تدخلنا نقذ بنت كانت هتموت بسبب الاعتداء عليها يعنى مش اجهاض خالص

أسماء: ما تردى على المواقع والجرايد اللي قالت الاخبار دى

عفاف: ارد على مين ولا مين؟

أسماء: اعملى مؤتمر صحفى وقولى الحقيقة

عفاف: عملت كده.. وكتبوا اللي يعجبهم وأخذوا نص الكلام وسابوا نصه..

لدرجة انى فكرت افتح جريدة باسم الجمعية

أسماء: وهتعمل قناة تليفزيونية.. يا عفاف خليكى واقعية

عفاف: طيب انتي عملتي ايه بالواقعية بتاعتك الى خلتك واقعه ودخلتى

المستشفى.. ومعرضه لخسارة مادية وأدييه رهية بعد اللي حصل

للمسلسل.. وأنا والجمعية والبهذلة اللي احنا فيها.. والتهديدات اللي ربنا

يعلم ممكن توصل لايه.. يا أسماء انا بامشى زى المجنون فى الشارع وكل

عربية.. تقرب منى احسن انها هتخبطنى.. وكل واحد يبص لى اخاف حتى

لو كان من الجمهور اللي بيحبنى أنا فعلاً تعبت وأعصابى تعبت ومش

عارفه أعمل ايه (تبكى)

أسماء: بس يا عفاف بس احسن اعيط انا كمان انا ماسكه نفسى بالعافيه

عفاف: آسفه يا أسماء آسفه.. المفروض انتي كمان عندك اللي مكفيكى

أسماء: الحقيقة موضوع المسلسل بقى حياة أو موت والموقف اللي عملوه الزملا

رفع معنوياتى للسما

عفاف: ولما نعمل مؤتمر صحفى عالمى.. ونصعد المشكلة لأعلى المستويات..

انا واثقه أن اللي حصل باذن الله هيكون لصالحنا

أسماء: يارب يا عفاف يارب

عفاف: ودلوقت نبدأ نعمل خطتنا

(٤)

(شقة شوقي الجديدة ومعه عمر.. يفتح الباب يفاجئ بمشهد غير متوقع)

شوقي: ايه ده شايف اللي انا شايفه يا عمر!

عمر: الشقة مبهدله على الآخر.. والحاجات مرمية في كل حته
شوقي: (وهو يقلب الاشياء) واضح اللي دخل الشقة جاب عاليها واطيها.. وفتش
في كل حاجة

عمر: ده لا يمكن يكون حرامي

شوقي: أنا مش شايل هنا فلوس ولا ذهب

عمر: يبقى اللي دخل كان له هدف واحد

شوقي: (شوقي يصيح فزعاً) الشرايط وشغل المسلسل انا جايب كل السيدهات
هنا

عمر: يعنى ما عندكش نسخه منها؟

شوقي: عندى.. فى الاستوديو لكن بدون مونتاج.. لكن النسخة الكاملة كانت
هنا.. عشان نشوف هنعمل ايه؟

عمر: يبقى لازم نتصل بالاستوديو ونتأكد أن الكمبيوتر اللي عليه الشغل فى الامان

شوقي: (يطلب الرقم ثم ينتظر) مفيش حد بيرد فى الاستوديو

عمر: انا هاطلب المهندس ظريف على الموبايل (يطلبه) (نسمع الرساله المسجله
أن الموبايل خارج نطاق الخدمة أو قد يكون مغلقاً).. وبعدين يا شوقي

شوقي: بعدين ايه احنا ننزل نعمل محضر فى الشرطة باللى حصل.. وبعده كده
نروح الاستوديو

عمر: بلا بينا (يخرجون والباب يغلق.. ثم صوت اقدم.. ثم الاسانسير.. ثم
الشارع)

شوقي: عمر.. بص على العربية

عمر: مش معقول الاربع عجلات فاضية وعلى الأرض

شوقي: العملية بقت حرب عنيه.. ومش بعيد توصل لأكثر من كده

عمر: يعنى ايه يا شوقي ممكن يقتلونا؟

شوقي: يعملوا اى حاجة.. الشقة بهدلوها.. والشرايط سرقوها.. والعربية جابوها
على الجنط

عمر: يلا نعدى الشارع وناخد تاكسى من الناحية الثانية اسرع.. بدل ما يلف بينا
وضرورى نروح قسم الشرطة

شوقي: يلا يا عمر.. عدى

عمر: انا وراك.. وبص قدامك

شوقي: (صوت سيارة مسرعه تقترب)

(شوقي يصيح فى هلع) اوعى العربية اللي جايه يا عمر.. (صوت السيارة يقترب
اكثر)

شوقي: (يصرخ) عمر (يتردد صدى الصوت ثم F.O حتى يتلاشى تماماً)

(نهاية الحلقة)

(الحلقة السابعة والعشرون)

(١)

(في الشارع زحام من الناس أصوات مختلفة مع عمر وشوقي)

(١): الحمد لله جت سليمة

(٢): قدر ولطف.. الاستاذ كان بينه وبين العربية المجنونة شعره واحدة.. لكن الحمد لله

عمر: خلاص يا جماعة كتر ألف خيركم انا كويس اتطمئنا (ثم يتحدث إلى شوقي).. لكن أنت ملحقتش تاخذ نمرة العربية

(١): النمرة على ما أظن س م ن ٢٨٠

(٢): لا.. يا أخي ط م ع.. وبالأمارة سوده وموديل جديد فور باى فور

(١): يا أخي انت بتكلم على عربية تانيه خالص.. كانت ماشية.. جنب العربية الفضى

شوقي: كتر ألف خيركم.. احنا هنتصرف.. (ثم ينادى على تاكسى أجره).. تاكسى.. لو سمحت

السائق: على فين يا استاذ؟

شوقي: على قسم قصر النيل

(٢)

(في مكتب أسماء مع عفاف ونورا)

عفاف: خرجوا من القسم يا أسماء

نورا: والظابط قال لهم أن موضوع بهدلة شقة شوقي هيشغلوا عليه لان فيه شبهة

تعمد.. لكن حكاية العربية اللي حاولت تأذيهم صعبة شوية

أسماء: لان مواصفات العربية مش واضحة.. والموديل اللي قالوا عليه في المحضر

فيه منه الآف العربيات

عفاف: بس يدوروا في أسماء أصحابها

نورا: ممكن تكون عربية متأجرة

أسماء: واللى آخذوا الشرايط من شقة شوقي كانوا برضه متأجرين

عفاف: وهما نفسهم اللي بيحاولوا يوقفوا حال المسلسل بكل طريقة

أسماء: ودول هنعرفهم ازاى؟

عفاف: احنا جايز ما نقدرش نوصل لهم بسهولة.. لكن الشرطة ليها اساليبها

وتقدر توصل لهم هما واللى وراهم

نورا: يبقى اعملى حسابك يا مدام عفاف.. أن التهديدات اللي جت لك بخصوص

الجمعية.. ممكن تنفذ في أى وقت.. واضح انها عصابة واحدة اتجمعت

على هدف واحد

أسماء: طبعاً لان اللي ضد الفن المحترم.. هو اللي ضد حرية المرأة وتمكينها

(تليفون عفاف يرن)

عفاف: دى امينه سكرتيرة الجمعية.. ربنا يستر.. (ترد على السكرتيرة) ايوه يا

أمانة.. مالك.. طيب اهدي عشان أعرف منك ايه اللي حصل

أسماء: مالها امينة

عفاف: امينة منهاره.. وبتقول انها لقت خزينة الجمعية مكسورة.. واوراق كثيرة
متقطعه.. والعفش كله متكسر

نورا: هو ده اللي كنت خايفه منه

(٣)

(في بيت فكري مع زوجته دلال)

دلال: طبعا حضرتك شمتان في اللي حصل

فكري: اللي حصل كتير.. وبعدين أنا معقول اشمت في شوقي ولا في عمر اللي كان
هيروح فيها

دلال: لا تشمت في الجمعية واللي جرى لها

فكري: انا ممكن ابقى متضايق من حاجة من فكرة من طريقة لكن مش معقول
ابقى همجي بالطريقة دي

دلال: انت مش همجي.. لكن مبسوط من بعيد لبعيد

فكري: بطل اسلوبك ده يا دلال

دلال: يعن انت ممكن تساعدنا ازاى؟

فكري: اولاً.. أنا وافقت تنزلي الجمعية.. ووافقتك تدرسي وتنزلي في طوابير
الانتخابات والدستور.. ولو معترض كنت قدرت اوقفك وامنعك.. بس
مقتنع

دلال: بجد يا فكري بجد؟

فكري: بجد يا دلال.. والدليل على كده انا اللي هاوضب الجمعية وارجعها أحسن من الأول.. ونفس الشيء لشقة شوقي

دلال: (في حماس) الله عليك يا فكور.. ايوه كده اكشف عن وشك الحلو.. يا حلو انت يا حلو

(٤)

(مذيع تليفزيونى أو مذيعه فى نشرة اخبار داخل بيت عمر ونورا)

المذيع: هذا وتواصل النيابة تحرياتنا بشأن الهجمة الارهابية البلطجية بشأن الاعتداء على جمعية واحدة + واحد.. والتي تزامنت مع الاعتداء على شقة المخرج شوقي شريف زوج الفنانة عفاف إبراهيم رئيس الجمعية.. وكذلك محاولة قتل المؤلف عمر محمد بسيارة مسرعة ولكن العناية الالهية انقذته.. إلى جانب ما تعرض له المسلسل التليفزيونى من هجمة انتقامية ومحاولات عرقلة عرض المسلسل من خلال عصابات ظلامية.. خاصة أن العمل يتعرض للعديد من مشاكل المرأة ويكشفها بطريقة جريئة وقد اعلنت نقابة المحامين العرب تضامنها مع اسرة المسلسل.. وارسلت بعض المحطات الفضائية تطلب شراء المسلسل ودعمه للخروج للنور وتعقد اسرة المسلسل مؤتمراً لفضح المؤامرة وكشف الكثير من اسرارها التى لا تؤثر على مجريات التحقيق

عمر: هايل هايل

نورا: الحمد لله.. الدفه بتتحول ناحيتنا بشكل كبير.. وأظن انا توقعت ده كله

عمر: ما هو مش معقول يبقى اللي بنعمله كله عشان نجيب للسنتات حقوقها..

والستات تقعد تتفرج علينا

نورا: الخطوة اللي جاية.. أهم من كل اللي فات

عمر: وايه هي الخطوة.. يا مداد زرقاء اليمامة

نورا: لا.. دى خليها مفاجأة

(٦)

(مشهد تمثيلي لعفاف في الأستوديو)

عفاف: (بحماس واضح وتأثر حقيقى).. اعملوا اللي تعملوه.. خربوا اللي تخربوه.. واحرقوا اللي تحرقوه.. واسرقوا اللي تسرقوه.. لكن اللي عملته لا يمكن ارجع عنه.. والخطوه اللي مشيتها لقدام عمري ماها رجعتها تانى لورا.. هي دى سنة الحياة.. واللى عملتوه عشان تهددونى.. خلانى أقوى من الأول بكثير.. ممكن تكسروا دولاب.. تاخذوا ورقة.. لكن مش ممكن تكسروا ارادة.. أو تمسحوا ذاكرة.. أو تخفوا حقيقة باينه زى الشمس

انا أمك اللي حملت وشالت وربت وكبرت انا اختك اللي طبطبت وراعت وحببت

انا مراتك.. اللي وقفت واتحملت.. وكان ايدها على ايدك كل ما كانت ايدك فاضية وجيبك كمان

انا مراتك اللي شفت فيها نفسك وصلحت فيها عيوبك انا شرك وسكنك وحكايتك الحلوة والمرة

فاكر لما اشترينا هدم اول عيل من عيالنا.. واول شقة صغيرة.. كبرنا فيها

وكبرت معنا.. الخاتم ده كان هدية اول مشروع عملته.. اسأل كل ركن في البيت هيحكى لك حكايتنا.. حتى المعالق والشوك والسكاكين وبراد الشاي اللي فضل معنا وكنت بتعتبره واحد من العيله.. دلوقت عايز تدوس على كل ده.. وتمسح اللي فات كله.. وتغمض عينيك عن اللي جاى..
الحقيقة انت مش بتبغنى أنا انت بتبيع نفسك

شوقي: (من غرفة الكترول) هايل يا استاذ (يصفق لها ويصفق لها الجميع)

نورا: ايه الحماس ده كله يا استاذ شوقي

شوقي: (متأثراً) انا نسيت اننا بنعمل مشهد في مسلسل وحسيت أن الكلام موجه ليا وكل راجل

نورا: يعنى خلاص صافى يا لبن مع عفاف

شوقي: هتشوفى بنفسك.. والاستوديو كله هيشوف (خطوات ثم وسط اصوات مختلفه متداخله في الاستوديو) لحظة يا حضرات من فضلكم

عفاف: عندك ملاحظات يا استاذ

شوقي: لا عندى اعتراف

عفاف: وناوى تعترف على الملاء فى الاستوديو

شوقي: وممكن اعترف قدام الدنيا كلها

صوت رجالي: ما بلاش يا استاذ الطيب احسن (يضحكون)

شوقي: الخلاف اللي حصل بينى وبين عفاف.. والمشاكل اللي اتعرض لها المسلسل.. والهجمة اللي حصلت على بيتى وعلى الجمعية.. خلتنى اشوف الامور بعين جديدة.. مش عين المخرج لا عين الزوج والأب والأخ والصديق والأبن

عفاف: شوقي كفاية الله يخليك

شوقي: انا لسه عايز أقول

نورا: ما يمكن عايزه تسمع الكلام ده لوحدها.. وأظن حقها يا استاذ

عمر: خليهم يقولوا.. لان اللي هنسمعه دلوقت.. مفيش مؤلف مهما كان مين يقدر

يكتبه بنفس المستوى خليه يقول.. وكلنا لازم نقول

عفاف: فعلاً يا جماعة احنا لازم نقول.. وزى ما انا بادور على حقوقى وبازعل من

اللى قدامى لموقف باحس فيه انه غلطان.. لازم انا كمان يكون عندى

شجاعة الاعتراف بغبائى وغلطى.. احنا بشر مش ملايكه

أسماء: احنا كده هنعمل مسلسل تانى.. (ضحكات)

صوت نسائى: مش لما نخلص المسلسل الأولانى يا استاذ

أسماء: لا انا عايزه أقول لكم خبر جديد بالمناسبة السعيدة اللي احنا فيها.. بس قبل

كل حاجة لازم اشكركم كلكم على موقفكم النبيل الكريم معايا فى اللي

حصلنا.. والشرايط الماستر اللي الاستاذ شوقي زعلان لانها اتسرق من

بيته.. وكان هيعيدها من الاول تانى.. أنا لقيت نسخه منها عندى فى

البيت.. والمهندس رؤوف بتاع المونتاج.. أهو جاى يبشركم بنفسه لانه

كان يفحصها

عفاف: ده شكله زعلان.. حصل ايه يا رؤوف؟

أسماء: مالك اتكلم

رؤوف: للأسف الشرايط فاضيه ومفيش عليها أى حاجة!

(نهاية الحلقة)

(الحلقة الثامنة والعشرون)

(١)

(في الشارع داخل سيارته.. شوقي يستمع إلى

أغنية عبد الوهاب جفنه علم الغزل.. ثم فجأة يضغط الفرامل بقوة)

شوقي: يا بنت المجنونة.. عايز تموتى نفسك على ايدى وجاى تقعى قدام العربية
هو أنا ناقص

المغتصبة: يا استاذ شوقي.. يا استاذ شوقي

شوقي: أنتى مين.. انا مش شايفك من النقاب

المغتصبة: لكن انا شايفاك وعرفاك وقاعدة مستنية لم تخرج من بيتك عشان
أكلمك أرجوك اسمعنى

شوقي: وعشان اسمعك عايزة تجيبى لى مصيبة

المغتصبة: انا مش هاخذ من وقتك كثير.. بس عندى كلام خطير.. وممكن حد
يجى يقتلنى دلوقت

شوقي: هى وصلت للقتل

المغتصبة: خيلنا نمشى من هنا الله يخليك بسرعة

شوقي: الحمد لله ماحدث شافك وانتى بتعملى عملتك اركبى يلا.. تدخل السيارة
ويمضى بها)

المغتصبة: انا اسفه جداً مكانش فيه طريقة اقابل بها حضرتك غير كده

شوقي: خشى فى الموضوع الله يخليكى

المغتصبة: انا البنت اللى اتعرضت لحادثة اغتصاب ومدام عفاف الله يسترها

وقفت جنبى فى الجمعية ودافعت عنى

شوقي: وانا علاقتى ايه بالموضوع

المغتصبة: ما هو اللى حصل فى الجمعية وفى بيتك مرتبط ببعضه

شوقي: يعنى أنتى عارفه مين اللى عمل كده

المغتصبة: عارفه

شوقي: تقولى الكلام ده فى النيابة

المغتصبة: ما أفدرش.. لكن أقوله قدامك وانت تتصرف لان المجرم للاسف

أخويا ومعاه خطيبى قصدى اللى كان خطيبى

شوقي: برضه مش فاهم

المغتصبة: هما بعد اللى جرى.. اتصلوا بيه ناس قالوا لهم الجمعية بتشجع البنات

والستات على المشى البطال بحجة انها بتجيب حقوقهم.. وبتعمل لهم

عمليات اجهاض وحاجات تانية.. والمسلسل بيقول نفس الكلام

وهيخرب بيوت كثير.. واحنا بلد فيه دين وماينفعش فيه الكلام ده

شوقي: وطبعاً أخذوا منهم فلوس!؟

المغتصبة: واتجننوا لما عرفوا المبالغ اللى ممكن ياخذوها عشان العملية على

بعضها

شوقي: ودلوقتى نركن على جنب فى الحته الفاضية دى وتحكيلى بالتفصيل (يركن

(السيارة)

(٢)

(في مكتب أسماء.. تسجيل صوتي لبقية حوار المغتصبة

مع شوقي وقد سجل لها دون أن تشعر)

صوت المغتصبة: وهما اللي خربوا الجمعية ودخلوا بيتك.. عن طريق واحد من النقاشين يعرفهم.. وكان معاه نسخة من مفتاح الشقة.. كان واخدها منك لانك مش فاضى وهو متعود يعمل منها نسخة ويديها للمجرمين (يضغط زر الإيقاف)

شوقي: ايه رأيك يا أسماء

أسماء: ده كلام خطير

شوقي: تفتكرى.. ادى الشريط زى ما هو لوكيل النيابة

أسماء: ضرورى لان فيه كل المعلومات

شوقي: والبنت اللي انا وعدتها تبقى بعيدة عن الموضوع

أسماء: هى ملهاش ذنب.. وبعدين احنا نقول الكلام ده لوكيل النيابة الى ماسك

التحقيق.. واكيد هيعتبرها شاهد ويقدر موقفها

شوقي: للدرجة دى.. فيه ناس ممكن تسرق وتخرب وتحرق.. لمجرد انك

مختلفه معاهم فى رأى

أسماء: ويعملوا أكثر من كده وبعدين منتظر ايه من ناس حرموا كل شئ.. وهما

حياتهم كلها حرام فى حرام

شوقي: تعرفى انا وصلت لنتيجة مهمة جداً

أسماء: نتيجة ايه؟

شوقي: اللي بيحاربوا الفن كله بدون ما يفرقوا بين حلاله وحرامه.. واللى بيحاربوا الناس كلها باعتبارهم حراس العقيدة واولياء الله فى الأرض.. واللى للأسف بيشتغلوا فى الفن وواخدينه سكة لحاجات تانية.. كلهم وصولوا المجتمع لنفس النتيجة

أسماء: شوقي.. يلا بينا على النيابة دلوقت حالياً

شوقي: لا احنا لازم نروح كلنا بربطة المعلم.. كلمى عفاف وعمر ونورا يبقوا معانا

أسماء: خايفة الكلام يتسرب للصحافة.. قبل النيابة ما تكمل شغلها وتقبض على المجرمين

(٣)

(عمر يكتب احد المشاهد وبعجواره نورا تقرأ معه فى البيت)

عمر: مشهد رقم ٩٨٠ ليل خارجى داخل مدرج كبير بجامعة القاهرة.. تجلس الهام امام لجنة مناقشة الدكتوراة فى رسالتها بعنوان المرأة على الشاشة بين الحقيقة والتزييف.. رئيس لجنة المناقشة يعلن قرارها

صوت رجال: بعد مناقشة رسالة الباحثة الهام عبد العزيز مبروك قررت اللجنة منحها درجة الدكتوراة مع مرتبة الشرف امتياز (تصفيق وتهليل وزغاريد)

عمر: تقف الهام باكية متأثرة.. تمسك الميكرفون على غير المعتاد وتتحدث وينصت الجميع ويسود المكان حالة من الهدوء التام

صوت الهام: لازم أعترف دلوقت بأن سر نجاح ده هو جوزى وحبيبى واستاذى.. اللى ارتبط بيا وأنا معايا الإعدادية وشجعنى رغم مشاغل البيت والعيال..

اكمل دراستي.. ولما أخذت ليسانس الآداب قلت خلاص بقينا زى بعض الهام: هنا ظهر معدنه الأصيل وقال لى أنا يشرفنى يكون معاكى دكتوراه وانا ليسانس لانه ده اختيارى.. وقال لى جملة هى مفتاح نجاحى.. أحنأ يا الهام بنجح مع بعض ونجح لبعض (تصفيق حاد وزغاريد)

عمر: وفي مشهد جليل تتابعه العيون التى تراقبه والكاميرات يحتضن الزوج زوجته.. قطع

نورا: (متأثره) برافو يا عمر برافو.. انا مش قادرة امسك دموعى وانت بتقرأ المشهد ما بالك لما يتصور ويتجسد صوت وصورة وحركة

عمر: وانا مش أقل من جوز الهام

نورا: طبعاً يا حبيبي.. بس ليه بتقول الكلام ده

عمر: عشان المسلسل اللى جاى هيجمل لاول مرة اسمك كمخرجة هيكون من تأليفى (يرن تليفونه) ايوه يا شوقى.. نيابة.. نيابة ايه؟

(٤)

(في الجمعية.. عفاف مع دلال في مكتبها)

دلال: يا عفاف اسمعنى كويس.. مفيش داعى للاجتماع العاجل اللى عايزه تعملية

عفاف: مش كانوا عايزين يسحبوا مني الثقة.. يسحبوها وبينى وبينهم الجمعية العمومية

دلال: الناس كلها معاكى.. والجمعية بقى اسمها زى الطبل

عفاف: انا مصممه اوريهم حجمهم الحقيقي.. أنا لا محتاجه شهرة ولا ناقصنى فلوس.. أنا باصرف على الجمعية من جيبى ولقيت نفسى يا ترجم اللى باقوله فى الفن.. لفعل

دلال: وافرض يعنى بطريقة أو بأخرى عملوا كومبينه عليكى.. والانتخابات فيها العاب كتير.. افرضى يعنى.. بالإشاعات والأكاذيب.. نجحوا وكسبوها هتعملى ايه؟

عفاف: هاشتغل فى الجمعية زى أى واحدة.. ما قلت لك يا دلال أنا مش واخده الحكاية منظره

دلال: يعنى هتعملى اجتماع الجمعية

عفاف: بس قبل كده كله.. هنعمل اكبر حملة لمحو الأمية وتأهيل المرأة الأرملة والمعيلة.. ازاي تخدم نفسها بدراعتها.. وتخدم عيالها وهى رافعه رأسها فى السما.. ومن غير ديون تدخلها السجن

دلال: يا بنت الايه.. مخك يوزن بلد فعلاً

عفاف: طيب اسمعى الخبطة اللى جايه

دلال: هو لسه فيه خبط تانى؟

عفاف: تانى وتالت

دلال: قولى شوقتينى

عفاف: الناس فاهمه أن احنا عاملين الجمعية عشان نحارب الرجاله.. لا احنا هدفنا نحارب مع الرجاله معارك الحياة.. لان هزايما واحدة.. وانتصارتنا واحدة

دلال: ومشكلتك مع شوقي

عفاف: بقت صغيرة قوى وتافهه قدام مشاكلنا الكبيرة مع اللى عايزين ياخدونا كلنا ويرجعوا بينا لعصور الجاهلية!

(٥)

(في مكتب أسماء مع شوقي)

أسماء: ودلوقت قولى بقى يا استاذ هنعمل ايه فى المسلسل والمشهد الى اتسرفت

شوقي: انا لقيت نسخه بدون مونتاغ.. لكن معلش تعب المونتاغ اهون من تعب

التصوير من اول وجديد.. انتى بقى ايه أخبار البيع للمحطات

أسماء: فيه اخبار كويسه.. لكن لسه فى اطار المفاوضات

شوقي: اول الشرطة ما تمسك العصا المجرمة.. هتلاقى المحطات تخطف

المسلسل وبسعر أعلى من الاول

أسماء: طيب ايه رأيك ناخذ الاحداث الى حصلت معنا فى المسلسل

شوقي: والله فكرة.. ناخذ فيها رأى الاستاذ عمر

أسماء: طيب بما أن الغزاله رايقه.. ومشكلتنا قربت تحل.. ايه رأيك تعمل شهر

عسل جديد انت وعفاف

شوقي: مفيش عسل قبل المسلسل ما يتسلم كله ونظمئن عليه.. ونبيعه لأكبر عدد

من المحطات

أسماء: والشقة الجديدة

شوقي: انا ممكن اصلح الى حصل فيها خلال اسبوع

أسماء: انت فاهم قصدى يا شوقي بلاش لف ودوران

شوقي: (فى عناد واصرار).. لا يا أسماء مش هاكتب الشقة باسمها!!

(نهاية الحلقة)

(الحلقة التاسعة والعشرون)

(١)

(عفاف تضحك مع أسماء)

عفاف: يعنى عملها فيكى المخرج

أسماء: انا صدقته فعلاً.. لغاية ما لقيته بيقولى.. انا هاكتب الشقة باسم الولاد

عفاف: وانا خلاص نسيت الشرط ده.. لان اتضح لى أن الثقة اهم من كل العقارات

أسماء: بمناسبة الثقة نسيت ابارك لك على التأيد الكاسح للجمعية

عفاف: وخلي بالك احنا كده اول جمعية نسائية فى مصر والعالم العربى.. يبقى فيها أعضاء رجاله يمثلوا مجلس برلمانى جوه الجمعية وبموافقة كل الستات

أسماء: طيب هاسيبك دلوقت وانزل اروح لاختى اشوف مشكلتها مع جوزها

عفاف: خدينى معاكى

أسماء: معلش يا عفاف ده راجل منخه ضيق ولما يشوفك جايز يعتبرها عملية احراج له

عفاف: هو لسه فيه حد بيفكر بطريقته.. باسم الله ماشاء الله عنده سبع عيال عايز ايه تانى

أسماء: بيقولها.. انا راجل مقتدر وكنت وحدانى وعايز يكون لى عزوه

عفاف: ماشى.. ربنا يزيد فلوسه كمان و كمان.. لكن المسكينة تجيب صحة منين
عشان تربي العدد ده كله

أسماء: بيقولها اجيب جيش شغالات

عفاف: الشغالة تساعد فى امور البيت.. لكن الام هى المدرسة اللى بتربي.. ولما
عينها تبقى على واحد أو اتنين أو ثلاثة.. غير ما توزع اهتمامها على سبعة فى
عين العدو

أسماء: كلامك مطبوط.. لكن هو ليه تفكيره و دماغه ناشفه بشكل غير طبيعى؟

عفاف: طيب سيبنى عليه.. أنا خلاص حطيته فى دماغى!

أسماء: هتعملى ايه؟

عفاف: هاعلمه الأدب هو واللى زيه!!

(٢)

(فى بيت فكري.. يقرأ مثل التلميذ الذى يذاكر ليلة الامتحان)

فكري: وتتخذ الدول التدابير المناسبة لتحقيق ما يلى وفقاً للمادة رقم ٥ من اتفاقية
القضاء على جميع اشكال التمييز ضد المرأة واحدها.. وذلك بـ تغيير
الانماط الاجتماعية والثقافية لسلوك الرجل والمرأة بهدف تحقيق القضاء
على التحيزات والعادات العرفيه وكل الممارسات الأخرى القائمة على
الإعتقاد بكون أى من الجنسين أدنى أو أعلى من الأخر أو على ادوار نمطية

دلال: (مندهشه) ايه يا فكري عندك امتحان الاعدادية بكره؟

فكري: بس يا دلال انا مش فاضى

دلال: طيب قولى بتعمل ايه عشان اذاكر لك

فكري: باحفظ اتفاقية القضاء على جميع اشكال التمييز ضد المرأة

دلّال: مش مهم تحفظها.. المهم تعمل بيها

فكري: ها حفظها وأعمل بيها

دلّال: طيب سمع لي بقية المادة رقم ٥ بتقول ايه بس غيبا؟

فكري: يجب أن تكون التربية العائلية قائمة على الفهم السليم للأمومة بوصفها

وظيفة اجتماعية والاعتراف بان تنشئة الأطفال وتربيتهم مسئولية مشتركة

بين الأبوين على أن يكون مفهوماً أن مصلحة الأطفال هي الاعتبار

الاساسى في جميع الحالات

دلّال: (تصفق له على طريقة المس في الحضانه) برافو يا فكور يا حبيبي هاييل

فكري: (بطريقة طفولية ايضاً) يعنى هاتجيبى لي حاجة حلوة يا ماما

دلّال: وهاخذك جنينة الحيوان

فكري: واسلم على عمو الأسد

دلّال: لا.. هاتسلم على خالتك الغزاله

فكري: طيب يا ماما.. أنا داخل أغسل المواعين!

(٣)

(في مؤتمر صحفى)

أسماء: دلوقتي على بركة الله نبدأ مؤتمرنا الصحفى.. وأحب أقول في كلمة البداية

شكراً لحضوركم وشكراً لرجال الشرطة اللي قدروا في زمن قياسي يحطوا

ايدهم على المجرمين اللي حاولوا يرهبونا.. ويخلونا نتراجع عن

مشروعنا.. واتفضلوا انا وفريق العمل تحت امركم في الاسئلة

صوت رجالي: نبيل الغندور من جريدة المواقف وسؤالى موجه للاستاذة عفاف

عفاف: تحت أمرك

الصوت: هل نجاحك فى الجمعية ممكن يآثر على شغلك وعملك الفنى

عفاف: على فكرة اللى عملته مش بدعه.. نجوم العالم بيشتغلوا فى العمل العام

بطريقة أو بأخرى.. انجيلينا جولى.. وبراد بيت واوبرا وينفرى.. وغيرهم

وبعدين الناس اللى بيتهموا الفنان بأنه خيالى وعائش فى برج معزول هيعرفوا

اننا موجودين معاهم ومشاكلنا هى مشاكلهم

صوت نسائى: سؤال للاستاذ شوقى.. عرفنا أن كان عندك مشكلة مع الاستاذة

عفاف.. وصراع جوه البيت والأستوديو

شوقى: عادى نختلف نتفق.. المهم الاحترام موجود.. والعشرة موجودة.. بس

احنا عشان تحت الاضواء مشاكلنا بتبان قوى وأكثر من غيرها

الصوت النسائى: يعنى خلاص رجعت البيت

شوقى: وهو انا لدواعى العمل لما أبات بر البيت يوم أو اتنين ابقى سبيته..

وبعدين احنا بنسكن البيوت بس هى كمان بتسكنا

صوت رجالي: سؤال للاستاذ عمر.. بعد شهر من جوازك وشغلك فى المسلسل

اللى انت منحاز فيه للمرأة ممكن نعرف انت بتطبق اللى قلتة فى المسلسل

جوه البيت

عمر: ده سؤال توجهه لست حرمانا الاستاذة نورا

نورا: الاجابة عندى واضحه بس اخاف اقولها معنا للحسد

أساء: انا ملاحظه أن الأسئلة معظمها شخصية.. رغم أهمية المسلسل

صوت: طيب ايه اخبار توزيعه وتسويقه

أسماء: هو دول السؤال.. الضربة الغشيمة اللي حاولت تكسر المسلسل.. خلته نمرة واحد.. ولغاية دلوقت عندنا عروض حصرية من ١٠ محطات والمفاجأة أن المحطة اللي رفضته لانه منحاز للستات.. طلبت بشكل غير مباشر تشتريه.. لكن انا رفضت.. لان عدو المرأة هو عدو للانسانية لو كانوا يفقهون (تصفيق)

(٤)

(أغنية محمد رشدي بيتنا الصغير الأخضرانى.. فى تليفزيون البيت)

شوقي: (مناديا) عفاف يا عفاف.. انتى فين؟

عفاف: جايه يا شوقي بأعمل لك البيض بالسطرمة

شوقي: تعالى بسرعة

عفاف: حصل ايه

شوقي: الواد عمر ده عبقرى.. بعث لى المشهد بتاع الراجل المجرم اللي كان أكثر واحد بيتكلم فى المبادئ وهو ضدها واكثر واحد متعقد من الستات وهو متجاوز سبعة منهم اربعة على ذمته

عفاف: أه ده فعلاً مشهد أهم من البيض بالسطرمة لكن مش أهم من شوقي حبيبي.. قول يا سيدى

شوقي: (يقرأ المشهد ويمثله احياناً لكن بطريقته).. المفروض أن المشهد ده فى قاعة المحكمة بعد الراجل ما اتقبض عليه

عفاف: بيقول ايه؟

شوقي: (مع اكو) يا حضرة القاضى.. يا ناس.. يا هوو ربنا خلقنا من نفس واحدة

وخلق منها زوجها.. بالمودة والرحمة

شوقي: والى انا عملته مع الستات اللى اتجوزتها.. والبنات اللى بهدلتها وحبستها
وقطعت لسانها ومنعتها من مجرد ضحكة تضحكها.. كان جهلى منى
وغباوة.. وقلة دين مع إني باصلى الوقت بوقته.. وجلابيتى قصيرة ودقنى
طويلة

انا كبير.. بس فيه ناس لعبت فى عقلى.. كلمونى عن الزهد وهم عايشين فى
قصور.. كلمونى عن الحلال وأغلب تصرفاتهم حرام فى حرام.. كلمونى
عن الامر بالمعروف والنهى عن المنكر.. وهما فى الحقيقة كانوا بياأمروا
بالمنكر ويكرهونى فى المعروف

انا فهمت الرجولة غلط.. شخط ونظر وصوت على.. ونسيت انها العقل
والحكمة والقلب الكبير

يا حضرة القاضى انا راضى بحكمك مهما يكون.. لانه هيكون أهون ألف
مرة من حكم ربى

يارب توب عليا يارب.. يارب اغفر لى وسامحنى يارب.. يارب.. يارب

(٥)

(فى سوير ماركت تشتري نورا بعض الأشياء.. وتسمع صاحب المحل يؤنب..)

سيده شابه تعمل بائعة وهى حامل)

صاحبة المحل: انتى ياستى.. يالى بطنك زى البطيخه.. لما مش قد الشغل جايه
تشتغلى ليه وانتى حامل؟

السيدة: عشان محتاجه للفلوس.. انت مش عايز تدينى أجازة

صاحب المحل: لان ده محل قطاع خاص يا أموره.. أنا مش حكومة تحملى

وترضى وتنامى فى بيتكم على حسابى.. أنا اللي يشتغل عندى يقبض..
مفيس شغل.. يبقى مفيس فلوس

السيدة: لكن قانون العمل ما يقولش كده

صاحبة المحل: القانون ده تعليمه شوربة لسان عصفور ومش عاجبك خدى
حسابك واتكلى

نورا: (تدخل) ايه اللي بتقوله يا راجل انت!

صاحب المحل: لمؤاخذه يا مدام شغلى وأنا حرفيه

نورا: بس اللي بتعمله مع الست يبقى سخره مش شغل وعصر العبيد انتهى واذا
كان القانون مش عاجبك أنا هاشاكيك

البائعة: ابوس إيدك يا ست هانم بلاش شكاوى أنا عايزه الشغلانه وبعدين بلاش
زعيق وحضرتك حامل برضه

نورا: أن كان على الشغل.. أنا هاجيب لك أحسن منه ما تحمليش هم

صاحبة المحل: اعملى حسابك يا بنت انتى لو خرجتى من هنا مش هتخطى
رجلك فى المحل مرة تانية

نورا: (بعصية) بطل زعيق.. وأنا مش هاشتري منك ومش هاخلى حد يدخل
المحل وهافضحك على الفيس بوك.. (ثم فجأة) أى.. أى.. بطنى بطنى

البائعة: اسندى عليا يا مدام.. اطلب الاسعاف يا معلم

(نهاية الحلقة)

(الحلقة الثلاثون)

(١)

(في غرفة عمليات الولادة.. بكاء طفل يخرج للحياة)

الطبيب: الف مبروك يا مدام ولد

نورا: (وهي تعانى) الله.. شكل عمر

الطبيب: استنى على رزقك لسه فيه بنت طالعه حالياً

نورا: يبقى آدم وحواء.. فين عمر.. عايزه عمر

(صوت بكاء الأطفال حديثى الولادة)

عمر: ايوه يا حبيبتى خدا الله على سلامتك

نورا: فين آدم وحواء؟

عمر: انتى قوام سمتيهم كده

نورا: وكأننا بنبدأ الحياة من أول وجديد.. رأس براس وايد بأيد وخطوة بخطوة..

وكل واحد له دوره

عمر: ارتاحى دلوقتى وبعدين نتكلم

نورا: انزل شوفهم يا عمر فى الحضانه.. قمرين

عمر: طبعاً يا حبيبتى.. ها يطلعوا حلوين لمين غير لأهمهم

نورا: لا لأبوهم

عمر: لا لأهم

نورا: طب نقسم البلد بلدين

عمر: قسمه تانى لا.. كفاية قسمه.. ولد وبنت.. وراجل وست.. وصعيدى
وبحيرى.. وابيض واسمر.. وسنى وشيعة.. واخوانى وسلفى.. قسمة
تانى لا.. لا

(٢)

(تصفيق حاد في حفل حاشد لتوزيع الجوائز لأفضل الأعمال الفنية)

مذيع الحفلة: الان جاء وقت الإعلان عن المسابقة الكبرى لأفضل الأعمال
الدرامية لهذا العام.. الجائزة البرونزية من نصيب مسلسل (دموع الأيام)
(تصفيق وتهليل) الجائزة الفضية للمسلسل الكوميدي الهادف (مراتى
حياتى) (تصفيق وتهليل).. وقد ذهبت الجائزة الأولى الذهبية بإجماع آراء
لجنة التحكيم إلى مسلسل (احلامنا) (تصفيق وتهليل)
(أسماء وعمر ونورا وشوقي وعفاف ودلال وفكري يتبادلون التهاني كل
بطريقته)

أسماء: له فيه جوايز تانية للمؤلف والبطلة والمخرج ومهندس الديكور..
هناخدها ونخرج نحتفل مع بعض

(تصفيق وتهليل)

(المجموعة تغنى بطريقة ارتجالية)

الناجح يرفع ايده.. ويغنى في عيدنا وعيده ونقول على طول... و..

(فجأة تصرخ عفاف)

عفاف: شوقي مالك يا شوقي.. الحقونى يا جماعة شوقي وقع مرة واحدة

(سارينة سيارة الاسعاف ثم من داخلها فى شارع مزدحم)

عفاف: (باكية متأثرة) شوقي.. كلمنى يا شوقي

عمر: يا عفاف مش هيعرف يرد عليكى كمامة الاوكسجين على بقه

عفاف: قوله يمشى بسرعة الله يخليك يا عمر

عمر: الشارع زحمة والسواق بيحاول يجرى على الاخر.. وبعدين احنا قربنا على

المستشفى

عفاف: لا.. المستشفى دى لا.. هناخدته على مستشفى تانى

عمر: نتظمن عليه هنا وبعدين نوديه مطرح ما انتى عايزه

عفاف: لا.. يا عمر.. المستشفى ده رغم أن فيه اقسام خاصة لكن سمعته وحشه

جداً

(سارينة الاسعاف فى الشارع)

(مزج صوت القرآن الكريم من سيارة أسماء وهى تمضى خلف سيارة

الاسعاف)

صوت قارئ القرآن: ﴿ وَيَكَادُمْ أَنْتَكُنْ أَنْتَ وَرَوِّجَكَ الْجَنَّةَ فَكَلَّا مِنْ حَيْثُ يَشْتُمَا وَلَا تَقْرَبَا هَذِهِ الشَّجَرَةَ

فَتَكُونَا مِنَ الظَّالِمِينَ ﴿١٩﴾ فَوَسَّوَسَ لَهَا الشَّيْطَانُ يَبْدَى لَهَا مَا وَرَى عَنْهُمَا مِنْ سَوَاءٍ يَهُمَا وَقَالَ مَا

بَهَنَكُمَا رَبُّكُمَا عَنْ هَذِهِ الشَّجَرَةِ إِلَّا أَنْ تَكُونَا مَلَكَتَيْنِ أَوْ تَكُونَا مِنَ الْخَالِدِينَ ﴿٢٠﴾ وَقَاسَمَهُمَا إِنِّي

لَكُمَا لَيْنَ النَّصِيحَاتِ ﴿٢١﴾ ﴾ [الأعراف].

(F.O لصوت القرآن الكريم)

أسماء: (تتحدث تليفونياً مع عفاف) ابوه يا عفاف ايه الأخبار.. أنا وراكى على

طول.. في عربيتي.. أحسن كده.. خرينا في مستشفى الحكيم.. لغاية ما
نأخذه على مستشفى من بتوع الجيش أضمن.. طيب.. طيب.. أن شاء الله
بسيطة

(سارينة الاسعاف)

(ثم من داخل المستشفى)

عفاف: ايه يا دكتور طمنى الله يخليك

الدكتور: اطمنى يا استاذ.. شويه ارهاق وهنعمل اتشك أب

عفاف: يعنى مفيش حاجة خطيرة؟

الدكتور: هو بس عايز يتأكد.. انتى بتحببيه زى الأول ولا اكثر من الاول

عفاف: (تبكى) انا عمرى ما حبيت ولا هاحب حد غيره

الدكتور: طيب بصي عليه كده.. عايز يقولك حاجه

عفاف: بيشاور لى.. ويقول أنا كمان.. يا حبيبى يا شوقى العين كانت جامده علينا
لكن قدر ولطف

والحمد لله على كل حال

(صوت بكاء الطفلين في وقت واحد)

عمر: يا نورا سكتى حوا

نورا: (من المطبخ ترد عليه) سكت انت آدم

عمر: يا نورا باشتغل

نورا: وانا باعمل لهم الأكل.. وقهوتك على النار.. وماليش عشر ايدين

عمر: يعنى ايه

نورا: يعنى تقوم تعمل القهوة

عمر: والشغل اللى فى ايدي

نورا: آدم وحواء أهم من كل الشغل

عمر: ما هو الشغل عن آدم وحواء

نورا: فى الحالة دى أجى اسمع (تقترب منه)

نورا: سمعنى ولو طلعت حاجة حلوه.. هاعمل لك قهوة دبل

عمر: طيب اسمعى وأمرى إلى الله.. (موسيقى ناعمه مع اكو)

من ضلع آدم خرجتى

للحياة وياه

بقى هو شمسك وضلك

وبقيتى ارضه وسماه

فى المبتدأ والخبر

سره وستره وغطاه

يا شركته وعزوته

لها خرج من مدارك

تاه يا حول الله

من ضلع آدم خرجتى

للحياة وياه

(فريد الاطرش يغنى أنا وانت والحب ثالثنا)

(ومنها تعود إلى غرفة شوقي بالمستشفى حيث تذاع الاغنية من خلال تليفزيون الغرفة)

شوقي: (بصوته الواهن الضعيف) فاكره الغنوه دى يا عفاف

عفاف: فاكره يا حبيبي فاكره

شوقي: انا عايز ارجع البيت

عفاف: الدكتور قال الصبح هيشوفك ويكتب لك على خروج

شوقي: هو أنا جرى لى ايه انا مش فاكر حاجة غير انى كنت فى الحفلة

عفاف: انت كان بقى لك كام يوم مانمتش.. عشان تسلم المسلسل.. واحنا بقى

لنا قد ايه على اعصابنا

شوقي: المهم اننا نجحنا والحمد لله

عفاف: المسلسل ده مجرد بداية لسكة طويلة

شوقي: ابوه يا عفاف.. سكة كنا ماشيين فيها برجل واحدة مع أن رجلينا الاتنين

سليمة

عفاف: لاننا أهملنا الست واعتبرناها كماله

شوقي: هو ده قصدى.. واوعدك اول ما اخرج من هنا هاعمل فيلم تسجيلى عن

الجمعية ونشاطها

عفاف: ومش خايف من الجماعه اياها

شوقي: لو خفنا نموت أحسن بكرامتنا

(فاصل)

(في مكتب أسماء)

عمر: ايوه يا استاذ تحت امرك

أسماء: ومستعجل على ايه

عمر: عايزين نروح نزور شوقي في المستشفى

أسماء: كلنا هنروح له بربطة المعلم

عمر: شكلك عندك أخبار حلوة

أسماء: هي حلوة بعقل.. دى حلوة جداً جداً جداً

عمر: طيب فرحيني

أسماء: اتفضل امضى يا استاذ

عمر: امضى ايه

أسماء: عقد الجزء الثاني من المسلسل وبضعف أجرك وعلى فكرة أنا عملت كده.. لان محطات كثير مضت معايا ودفعت عربون على بياض

عمر: بس احنا تقريباً قلنا كل حاجة في الجزء الأول من المسلسل

أسماء: بيتهيألك.. امضى يا استاذ امضى ولا مش عايز فلوس لآدم وحواده رزقهم.. وفوق ده كله مع العقد.. هاجيب لك اول قصة في المسلسل

الجديد قول بسبوسة ٣ مرات تلاقي القصة قدامك

عمر: (ضاحكاً) بسبوسة ٣ مرات

(تدخل عفاف ومعها المغتصبة بعد أن تزوجت ومعها رضيعها)

عمر: ايه ده عفاف

المغتصبة: وأنا يا استاذ ربنا يكرمنا على حسكم براجل ابن حلال ارتبط بيا
وعايشه معاها عيشه محترمه وأدى النتيجة على دراعى.. (تكلم الرضيع)
عيط يا قاسم سمع الناس صوتك يا ولد

عمر: قاسم اخو على بابا

عفاف: لا يا استاذ عمر.. هي سمته على اسم قاسم أمين.. الراجل اللي اتكلم بدرى
جداً عن المرأة وحقوقها ودفن الثمن غالى وانت عارف طبعاً

عمر: بس دلوقت عرفته اكثر

أسماء: دلوقت يلا بينا على شوقي

(داخل غرفة شوقي بالمستشفى.. يردد الجميع فى صوت واحد)

من ضلع آدم خرجتى للحياة وياه

بقى هو شمسك وضلك

وبقيت ارضه وسماه

فى المبتدأ والخبر

سر وستره وغطاه

من ضلع آدم خرجتى للحياة وياه

(انتهت الحلقات بحمد الله)